

NKONKO NÈ MANDAMUNA



... apa, ndi ànu ncivùnga. Cìdi cyàmba nè:

24b. Udi wangata ditùkù dijimà bwà kwela meeji pa bintu byùdi nè cyà kwamba dilòlò anyi?

Ncyà bushùwà nè mbifwànyine kwangata ditùkù dile, kí mmwòmò anyi?

To, mwanèètù wanyì, mwena Kilistò, Ncitukù ndifwànyikijila cintu nànsha cìmwè cìndi nè cyà kwamba mu cyambilu to. Ndi mwà kubala Mufundu mwaba kampàndà. Nè nkàadi—nkàadi mufile mamanyisha misangu yàbùngì nè nêngiikale mwà kubanda ku cyambilu, mvwa nè cyà kuyiisha pa cyena-bwalu kampàndà, mfika kuntwaku, Nyumà Mwimpè ùnkùdimuna ùngaaluja paanyimà, ùngenzeja cintu kampàndà cìkwàbò.

Nkaatukù muciteete misangu yìbìdi anyì yìsàtù bwà kufùnda tuntu nè bwà kuyiisha pa tuntu tufùnda atu. Mu ntàntà yònsò ùndì munkaci mwà kutàngila ku tuntu tufùnda atu, meeji àànyì kaèna kùdi Nzambi nànsha. Pa nàнку bikèngela ànu mèmè kubìvingutula nè kubyèla panshì nè kwamba ànu cyònsò cyàmbambà Ye aci. Míngà misangu ntu mbangila mu Genèsè nè nkuupuka mu Bwàkabuulwibwà, ndi . . . Pa nàнку ncyèna ànu bikolè menemene mwambi wa—wa nsongo ewu bwà—bwà . . . Ànyì mayiisha bikèngela ngàpetèlè àfùmìna Muulu.

Nèнку ndi—ndi mbala Mufundu kampàndà, bu mungàmbì amu, pa cimanyinu cyà nyama wa lwonji. Ndi . . . Mukàjàànyì, mààmù wanyì, nè bakwàbò bàdi bamanye, màmwènàànyì udi musòmbe kaaba aka, utu upìcishilaku díbà kwètù, ndi ànu, lwà pa díbà isàtù jaajaaja wa mapingaja, ndi mbanga disambila. Ndi mbwela, mbanga disambila. Pashìishe ndi ànu mpweka, ndyàmbidila nè: “Èè, mvwa mwàmbè nè nêngàakulé dilòlò edì pa *Cimanyinu Cyà Nyama Wa Lwonji*.” Nènye kuntwaku’s. Nèнку ndi mutwàle, dilòlò edì, mukàndà wà—wà Cruden wà myaba yìdi cikèbelu cyà myàkù. Kàdi aci’s mbwà kupeta mandamuna, anyì, kí—kí mmandamuna to, kàdi’s nudi bamanye cìdi ciikàlangane mukàndà wà cikèbelu cyà myàkù nè ncinyì’s: mmyàkù yònsò yà Bible mifùnda patòoke. Pa nàнку, ndi nkèbangana nè mukàndà wà cikèbelu cyà myàkù bwà kujandula, misangu mikwàbò, mwaba wùdi lukonko lwà muntu kampàndà lùsanganyibwa.

Kàdi bu mùdìbì nangànangà nè, bu mùndì mmòna umwe wa ku balundà bàànyì kaaba aka ùndì mutwilàngàne nendè mu màkàjiinyì, anyì lwà ku màkàjiinyì mu mapingaja emu, yèyè . . . tuvwa tuyiikila bwà nkonko eyi, nè bikwàbò, byà mùshindù awu.

Mpindyewu, mu nsòmbelu wanyì mujimà mwà ànu nè, kacya ngiikala mwambi, byàkankèngela ànu bwà mèmè kulwa mvità bwà cintu pàmwè nè cyònsò. Kacya ncitukù muyè ku cilongelu kampàndà cyà sèminèrè nànsha. Nè cyònsò cínkaadiku muyiilè citu ànu cidìYe mungambìle aci. Nènku díbà adi mèmè kushààla ànu pa cyôci aci nè—nè kuciitabuujà. Nè byàkankèngela ànu bwà mèmè kulwa mvità bwà cintu pàmwè nè cyònsò cìndi—cìndi ngiitabuujà eci, pa buloba bujimà. Ndi. . . Bòbò. . . Mu Àfrikè mwàmwa, mu myaba mishiilèshìilàngàne nè nu budimi bwà bwambi bwà kùbaabèndè, nudi nusanganamù tusùmbù tütù kacya Àmèrikè kàyìku mwà kudifwànyikijila to. Nè bàdi bàkwela biinè abi. Kàdi cintu cyà musinga ntu misangu yònsò ànu nteeta kushààla ànu ne Dìyì edi, ànu mwaba awu; nwamònu's, kí ng'ànu pa Mufùndu wùmwèpelè to, cìdi nè cyà kulwila mu Bible mujimà.

Mpindyewu, s'udi mwà kwangata Mufùndu wùmwèpelè nè kuwùfikisha ku dyamba cintu kamà cyònsò. Nudi bamanyè nè beena dyabùlù bàtu bàngata Bible bu mukàndà wàbò wà dikòkelanganapù anyi? Bushùwà. Kàdi bikèngela ciikalè cyà mwomùmwè myaaba yònsò. Mpindyewu, bu nwènu mwà kufwàku luse bwà cyakwidi eci (Ndi mwà, ànu, nànkù, mbwà mùshindù wa twètù kulonga), Bible ewu ùdi ànu bu dijimbù dikosolola dyà dipanda mutù diikàle disùnsulula. Menemene. Nènku nebikengelè bwà wèwè kutàngila kùdì Kìlistò Yesù, Citembelu aci, bwà kumanya mwà kucitwàngaja pàmwè. Wèwè kùyì mwenzè nànkù to, udi wangata webè mmwènenù sungasunga, dyàkàmwè, neùpete mu dinàya dyèbè amu, ngombe munkaci mwà didìila mashinde kuulu ku lusongo lwà mucì kampàndà. Kabyàkukùmbanakù to. Kàdi bu wèwè ànu mwà kulekela Nyumà Mwímpè; kùyì ànu ukwàta mudimu nè meeji èbè wèwè mwinè paùdi ulonga Bible apu to. Wèwè uteeta kukwàta mudimu nè dimanya dyèbè wèwè mwinè anyi meeji èbè wèwè mwinè, ncyà bushùwà nè neùdisàngànè mupàmùbuke díbà dyònsò. Nwamònu anyi?

Bwalu ànu bu mwàkambà Kìlistò nè: “Ndi mucisokòke ku mèsù kwà sèminèrè, beena lungènyì nè batàlame, kàdi nèncisokòlwèlè bânà bàdi baswè kuyiila.” Nwamònu's. “Ndi mucisokòke.” Pa nànkù kakwèna bilongelu nè bisùmbu, nè—nè tusùmbù twà èkèleeziyà, tùdì tùlongesha Mifùndu mu mùshindù wùdìbi bikèngela to. Mpindyewu, aci's ncintu cinène cyà kwamba. Bàdi mwà kwikala nè bulelèlè bwàbùngì, kàdi Nyumà Mwímpè ùtu ùcibuulwila bantu-nkààya. Ki bwà cinyì, Nyumà Mwímpè ùdi bwà bantu-nkààya. Ke bwà cinyì bulongolodi bùdì bùpàtula bantu mu njila wa Nzambì misangu yònsò. Bwalu Nzambì ùtu ùfla cintu kampàndà cyà cipyacipyà ku musangu nè ku musangu, Yèyè ùtu ùtùngunuka mùshindù awu. Nènku, kàdi eci cìdi misangu yònsò ànu nshindameenu. Tàngilàayi bwà nùcimònè mùdici cidìleeja mu Bible, cìtàngilàayi mùdici

munkaci mwà kudileeja mu cikondo. Dìbà adi nudi mwà kumòna kunùyaaya kafiika.

Mpindyewu, mu mandamuna aa, bu mûngãmbi amu, mêmè ndi mulongeshi wa wënza luse wa dikëma. Kàdi ndi muswè kwamba nè cîndi mumanyè pa bwalu abu, ndi njinga bwà—bwà kucyùmvwija bakwàbò. Kàdi wêwè ubèngangana nè wamba nè: “Èè, Mwanèètù Branham, mêmè ncyèna ànu nciitabuuja mùshindù awu to,” abi’s bìdi ànu bîmpè, aci kaciyèna citùpangisha bwà kwikala ànu bânà bàà muntu to, nwamònu’s. Tudi ànu bânà bàà muntu. Ndi . . . Pawikalà muswè kwikala mu—mu—mu . . . wa mu Ntempèlù wa Ntùngunukilu, nudi bamanyè’s, aci cidi ànu cîmpè bwànyì mêmè. Nwamònu’s. Nènku wêwè mwitábùùje Mukalenge Yesù Kilistò, netwikalè ànu banyânà nè tutùngunuka ànu nè kuya kumpalà. Nènku—nènku ndi ngèèla meeji nè dijidiibwa dîmpè dyà nkùlunkulu nedìnùfikishè ku didyùmvwa mùshindù awu pa bwalu abu. Kí mmwòmò anyi? Ncyà bushùwà, necitùfikishe ku dipetangana ku mèyi.

Bu mùdi muntu uvwa mwimàne dilòlò dishààle ewu, mwimàne kaaba aka mene, mwikalè nè ngiimànyinù wa mùshindù awu. Nè—nè ndi mutwilàngàne . . . Ke mwèpiskòpò mutàmbidile wa mu Inde emu nyèyè ewu, pa bantu batwè ku miliyò nkàmà yinaayi nè makùmi mwandamutekète. Ke kulwayè, nè ùvwa múmvwè bwà bwalu abu nè kulwayè mwaba ewu, kwambayè nè: “Eci mbulelèlè anyi?”

Mêmè nè: “Ke mùdibi.”

Yèyè nè: “Mmunyi mùndiku mwà kupeta Nyumà Mwîmpè?”

“Ditentekelangana dyà byanza.” Kumutentekela byanza, ke Nyumà Mwîmpè kulwaYè pambidi pèndè.

Yèyè ùvwa mwimàne mu Chicago, kaaba aka, kùkaadi ndambù wa mbingu, ku disangisha dinènè dyà beena Kilistò bàà Kantu-ku-byanza, kwambayè nè: “Baakàrdinal bônso nè bikwàbò byônso bàakantentekela byanza kuntwaku; bantu banène, bèèpiskòpò banène, nè bikwàbò, bantentèkèle byanza pàvwàbò banjidila bu mwèpiskòpò mutàmbidile wa ku Inde, Mwèpiskòpò mutàmbidile wa baa Èpiscopalians wa mu Inde nè mfùmù wa Bwobùmwè bwà beena Kilistò bàà mu Inde.” Cimanyinu cyà citàmbe bunènè cyà ntèndeleelelu mu Inde amu. Ke yèyè nè: “Kakùvwakù cintu nànsha cìmwè cyenzèke pàakantentekelàbo byanza apu to.” Yèyè nè: “Ndi mulwè mwab’ewu kùdi muntu uvwa kàyì nànsha mumanyè ABC bîmpè to, ànu nè lutàtu, ke kuntentekelayè byanza, nè mêmè kupeta Nyumà Mwîmpè.” Ncyà bushùwà. Aci’s ncyà pabwàci, kí mmwòmò anyi? Nwamònu’s.

Pa nànkù, kaciyèna cìfùmina ku dilonga dyà tùlaasà anyi ku dimanya to; cidi cilwila ku didipwekesha kumpalà kwà Nzambì. Ncyà bushùwà.

Nè pashiishe, mùshindù ewu ke wuwàmanya nè wêwè udi mwena Kilstò: Ku mamuma àùdì ukwàma. Mpindyewu, kí nku mùshindù wùdì wela mbilà awu to. Mémè ntu ngiitabuujà dyela dyà mbilà, kàdì kí nnè mbwalu udi wela mbilà, anyi to, ndi . . . anyi—anyi nè mbwalu udi wakula mu myakulu, anyi to. Aci . . . Mémè ndi ngiitabuujà dyakula dyà mu myakulu. Kí nnè mbwalu wêwè udi wondopa babèèdì, anyi to. Mémè ndi ngiitabuujà dyondopa. Kàdì mamuma à Nyumà's ngôwò aa: dinanga, disànkà, ditalala, mwoyi mule, bwimpè, musàngeelu, lutùlù. Ke mamuma à Nyumà ngôwò awu. Nwamònu anyi? Nènku piikalàbì nè bimanyinu abi bìdì bikulonda, díbà adi ndi—ndi bu ndikù mwà kwitabuujà nè ke civwà Yesù mungambile bwà kukèba.

Yèyè nè: “Ku eci bantu bònsò nebàmanyè nè nudi bayiidi Bàanyi, panùdì nè . . .” [Disangisha didi dyàmba nè: “Dinanga muntu nè mukwèndè.”—Muf.] Ncyà bushùwà. “Panùdì nè dinanga muntu nè mukwèndè.” Nànsha mùdì muntu awu mufwànyine kupangakana neebè amu, nànsha nànkù wêwè udi mumunangè ànu bu nè kakwèna bwalu to. Nwamònu anyi?

Kaa, pawikalà ànu unanga aba bàdì bakunangè, ndifutu kaayi dyùdì naadi? Bangènzàmpèkààtù bàdì bènza cintu cimwècimwè aci. Nwamònu anyi? Nwamònu anyi? Kàdì udi nè cyà kunanga aba bàdì bakukine, kí ng' ànu kudingidija bu udi mubànange to, kàdì mubànange bulelèlè. [Disangisha didi dyàmba nè: “Amen.”—Muf.] Twasàkidilaayi. Ncyà bushùwà. “Amen,” ncyà bushùwà. Nwamònu anyi? Muntu yèyè mukukine bulelèlè nè mujaadike nè mmukukine, kàdì nànsha nànkù mu mwoyi wèbè amu wêwè ànu mumunangè, udi wenda usemena pabwìpì menemene nè Bukalenge. Ncyà bushùwà.

Mpindyewu kùyì ànu mumunangè, wamba nè: “Èè, ndi mumanyè nè ndi nè cyà kucyènzà.” Kàdì wêwè udi mumunangè nànsha bishi. Wêwè kùyì mumunangè byùmukila munda mwà mwoyi wèbè to, wêwè wamba nè udi mumunangè pèèbè kùyì mumunangè to, udi mumanyè cìdìcì cikuvwijà? Mwena lubombo. Nwamònu's. Pa nànkù kùyì kamwambila nè udi mumunange paùdì kùyì bulelèlè mumunange nànsha. Nènku wêwè kùyì udyùmvwà mùshindù awu to, shààla wêwè ànu kaaba aka too nè paùdì udyùmvwà mùshindù awu. Bwalu nènkujaadikilè nè, kùdì ngàsà mukùmbàne bwà kukufikisha ku didyùmvwà mùshindù awu. Ncyà bushùwà. Neàcyenzè cyà bushùwà.

Mpindyewu—mpindyewu, nkonko eyi . . . Nènku vùlukàayi mpindyewu nè, bìdì ànu bu mu masangisha, bintu byònsò abi kí mbiludikila èkèleeziyà wa muntu kampàndà, diitabuujà dyà muntu kampàndà yònsò ewu to, nànsha kakesè. Mémè ndi ànu mu kaatabernacle kàanyi kakesè kàà kale aka munkacì ànu mwà kuleeja patòòke njiyà yànyì pa byena-bwalu ebi. Nwamònu's.

Nènku mpindyewu, nwènù nupangakane, abi nebìikalè

ànu bîmpè. Nutukù bamanyè nè kakwènakù, mbikolè, nànsha bàbìdì bàà kutùdì mwab'ewu, nè kakwèna bantu mu twètù emu bàdì nè byâlà bifwànàngàne to. Kakwenàku munkacì mwètù maùlu mafwànàngàne to. Ndi ngèèla meeji nè udi nè disànkà bu mùdì kùyì naadi difwàne dyànyì to. Kàdi—kàdi cidi . . . Kàdi kakwènakù kaaba aka àdì mafwànàngàne to. Nwamònu anyi? Nènku dîbà adi netwikalè mwà kubènga kupetangana. Mpindyewu, ndi mufwànyine kunanga dyâmpà dyela cèrise nè wèwè munangè dyà pomme, kàdi's bònsò bwètù tudi munkacì mwà kudyà dyâmpà. Ke cintu ncyôci aci ànu—cyôci. Pa nàнку, twètù . . . Ke mmwènenu nyèyè awu. Patùcìdì ànu banangè Mukalenge Yesù, nè balediibwe cyàkàbìdì ku Nyumà wa Nzambi, tudi beena Kilistò. Mpindyewu, èkèleeziyà kèna mwà kukwenzela aci to. Yesù ùdi mwà kukwenzela aci. Nwamònu's.

Mpindyewu, mu nkonko eyi, pa kwoshamù dîsù, mùdì yimwè yà yipanda mutù. Nàнку awu, mu diyàndamuna mpindyewu, muntu yònsò enzèku dibalulula dyà dîmpè menemene dyà eci, nwamònu's, kucifùnda: Ndi ànu munkacì mwà kuyàndamuna ku dyànyì pàanyì dimanya dyà ditàmbe bwîmpè ku Diyì dyà Nzambi. Nwamònu anyi? Nè cyôci kaciyì cyandamuna mùdibi bìkèngela ku lwèbè . . . nè wèwè, lukonko lukwàbò, mòna's, wèwè udi . . . Ndi ànu mwà kunanga bwà wèwè kulwàluja pa cyambilu apa anyi kulwa kuyiikila neetù bwà bwalu abu, anyi cintu cyònsò citùdì mwà kwenza aci. Nènku pàmwàpa mèmè nè Mwanèètù Neville ewu, tudi bafwànyine kumòna bintu bitùdì katùyì ànu tupetangana ku mèyì to.

Nènku—nènku Mukalenge Baxter, umwe wa ku beena dyànyì bàà batàmbe kwikala pabwîpì menemene mu disangisha dyànyì, Mukalenge Baxter, tudi nendè kùkaadi bidimu; nè yèyè mmuumvwiji mulèlèlè wa Bible, kàdi kèna wìtabuuja Bukalenge bwà bidimu cinunu to. Ki mèmè kulwa, kwamba nè: “Mwanèètù Baxter, mmunyi muwèpukaku Mufùndu ewu?” Mmufwànyine kutùpika elu luseke, ndi ngàmba nè: “Mpindyewu, kwenji maalu bu kapasu to. Sòmba wèwè ànu mutuùkije.” Nwamònu's. Ke mèmè nè: “Nènku bàkasòmba nè kukòkèsha pàmwè nè Kilistò pa buloba bidimu cinunu.” Mèmè nè: “Kàdi bìshi bwà aci?”

Yèyè nè: “Ndi ngiitabuuja nè bidimu cinunu bìdì ànu byùmvwija cipòòlò kampàndà.”

Mèmè nè: “Mpindyewu, anji indilà kakesè, wèwè's udi wangata dilongesha dikwàtakaja. Bible mmwàmbè nè: ‘bidimu cinunu.’” Uh-huh. Bòbò—bòbò bàvwa ànu bàtùpika bàya eku nè eku. Kàdi bòbò, nwamònu's, twètù katùvwakù, kàdi, katwàkapanga kwikala balundà to nànsha kwikale bukalenge bwà bidimu cinunu anyi kabùyiku; netwàlukilè kumbèlu mu Dyulu, pàmwè, bwalu yèyè mmulediibwe cyàkàbìdì nè ùdi nè Nyumà Mwîmpè.

Nànkú ke mùshindù wúndi muswè bwà nwènú kudyùmvwá bwà nkonko eyi: Eyi yidi ànu ndyànyì dimanya dyà ditàmbe bwìmpè kunùdì.

Dìbà adi mèmè mumòne muntu kampàndà musòmbe kaaba aka, nè mwtàbùùje nè Yesù ùvwá ùlwa mubànde pa kàbalù katòòke, nè mèmè ngiitabuuja nè Yéyè ùvwá ùlwa mu ditutu ditòòke; mpindyewu, bu mèmè mwà kwamba nè “kàbalù katòòke” ànu bwalu mulundà wanyi ùvwá mwtàbùùje kàbalù katòòke, kàdi, bilondèshìle Mifùndu, ndi ngiitabuuja nè Yéyè ùvwá ùlwa mubànde pa ditutu, ndi mufwànyìne kwikala mwena lubombo. Ncyà bushùwà. Ndi nè cyà kuleeja patòòke mèmè mwìnè ànu mùshindù wùdìbì nè kufila kabingila kàànyì kàà nè mbwà cinyì.

Pòlò wàkamba nè: “Ikàlaayi badìlongolole ku—ku bikondo byònsò, ikàlaayi pabwìpì, mu cikondo, nè pambèlu pàà cikondo; mudìlongòlòle bwà kupèèsha muntu dyandamuna bwà ditèkemenà dìdì munda mwèbè.” Nwamònu’s. Nènku’s ke citùdì tuteeta kwenza aci.

Mpindyewu, ndi ndyùmvwá nè Mifùndu eyi, yimwè yà ku yòyì eyi, yidi ànu tuumaalu twà dyela nsèke, nè bikwàbò, nènku nénditacishè bwà kuyàndamuna dyàmbedi, ke cìndì nteeta bwà kuyìsunguluja. Nènku bìdì mwà kukèngela bwà mèmè kwikala nè cyòcì eci, kukwàta mudimu nè mukàndà wà dipetangana dyà myàkù bwà katancì kakesè bwà kupàtulakù bimwè byà ku cyòcì eci. Nè pashìishe, mwòmò emu, mèmè mucitèèle bibi anyì cintu kampàndà, nwàmvwùlwija ànu mu mùshindù mujaalàme, nudi numòna’s, nè numfùndìleku kabèji, bwà nungambilè.

Mpindyewu, kumpàlà kwà twètù kuteeta bwà kukàngula eci . . .

Mpindyewu, cìndì ngènzela cyòcì eci, balundà bàànyì, nènkwàmbilè, mmu kiipàcìlà kampàndà, nwènú bònsò nudi bamanye aci. Disangisha edi divwa mmu kiipàcìlà kampàndà. Ndi ngiitabuuja nè Nzambi ùkaadi mungaalùjekù, mu cipeepèlè cyà nèjè aci, kuntu kwaka, nè mumpingàje bwà kiipàcìlà mene aka mwaba ewu. Nènku kùdì ànu kantu kampàndà kakesè kabì mwab’ewu mu tabernacle emu kùkaadi ntàntà mule. Ndi muswe kukàjandula. Pàndì nkajandula, dìbà adi nèmmonèkù ní ndi mwà kwenza cintu kampàndà pa bwalu abu. Ncyà bushùwà. Nènku ndi muswè bwà èkèleeziyà èndè mu dyumvwangana. Nènku kùdì ànu kantu kampàndà kakesè kabì, bwalu kanwèna nutanta to. Udi ufikisha bantu ku disùngidiibwa, aci ncilelèlè, aci’s ncilenga be, kàdi kanwèna nutanta mu mùshindù wùvwà wùnùkèngelà to. Bìvwá bìkèngela bwà twètù kulela bayiishi nè bikwàbò byònsò. Mukenji wùdì nè cyà kuya mutangile ànu kumpàlà.

Nkaadi mwangàte mwanèètù, mpaasàtà, mwab’ewu, nè tukàadi bapicile mu mayooba pàmwè, Mwanèètù Neville ewu

nè mèmè's. Nènku ndi—nènku ndi muswè kumòna ní. . . Bu umwe wa ku bampaasàtà bèènù, mmu—mmudimu wànyì. Nè dilòòlò dishààle. . . Ànu pângààmònu cintu cyònsò cidi ànu mu èkèleeziyà mpindyewu eci, ke bwà cinyì ncìvwa mumanyishe bwà disangisha edi to. Ndi ànu mukòbòle cyanààna; ànu, mòna's, bantu bònsò mbaajingila difika dilenga. Bushùwà, tudi baswè bwà nùlwe. [Katùpà kàà mukàbà wà mèyi munda mutupù—Muf.] Nènku, kàdi, cidi ànu mu èkèleeziyà ewu.

Ke mèmè kudyàmbidila nè: “Bu mèmè mwà kulongesha dilòòlò dyà kumpàlà adi, cidi èkèleeziyà leelù ewu. . . nè cikondo, bilondèshile maalu à buloba, mu Bible, mwaba wutùdi basòmbèle bilondèshile myaba, díbà adi ncyà bushùwà nè èkèleeziyà neàtabulukè pa cyòci aci. Nè pashìishe kwakula pa ‘cimanyinu cyà nyama wa lwonji,’ nè kubàlekela bamòne cìdici aci; nè pashìishe ‘Cítampi cyà Nzambi.’” Aci's cidi cimpè nè cìbì mpindyewu, aci's mìdimà nè Bukènkè mpindyewu, aci anyì munda peeshì pambèlu mpindyewu, nènku ke cintu cyà mushinga mukolè mutàmbe ncyòci aci bwà kulongeshapù mpindyewu.

² Nènku ndi nkwàmbila, nwènù balunda bàànyì, ndi ngàmba bwalu ebu byumukila mu mwoyi wànyì, kumpàlà kwà Nzambi, nè didipwekesha dyònsò nè, kacya nciitukù mwànji kuumvwa dilaabiibwa dyà Nyumà Mwímpè bwà kwakula mèyi àndi mwakùle mu malòòlò àsàtù mashààle aa to. Ncyà bushùwà. Kàdi bìdi ànu bintuntumuna's. Mvwa mufwànyine kwalukila kumbèlu, ncyi nànsha mwà kulaala paanyimà pàà mèmè mumanè kufika kumbèlu to, ànu dilaabiibwa kacya dimònàngè's wè!

³ Mpindyewu, mvwa mukùpe *eyi* mwab'ewu nè meeji à nè ndi mufwànyine kupetakù cintu kampàndà mwaba kampàndà. Nwamònu anyì? Kupeta njiyà yà cisàmbà yònsò pa citupà cyà dibèji mwab'ewu. Mèmè ncyi mupetè eci mùshindù ewu to, nè Mukalenge kàyì mucimbuulwile to, nèntungunukè ànu too nè pàndi ncipeta bulelèlè. Nènku Nzambi neàcingenzèlè. Mbulelèlè. Nènku díbà adi patùdi tucijandula, ncifwànyine kwikala ànu kaacimpòkòtò kakesè, kàà kale kajiiika lwà mu mwaba kampàndà, kàdi's Akàna wàkadi nè kàmwè, yèyè pèndè. Nudi bamanyè's, bìdi bikèngela bwà twètù kuumvwa cintu aci, pashìishe netùlwe buludì nè kutungunuka nè lwendu mu Bukalenge bwà Nzambi.

⁴ Mpindyewu, Mukalenge ànùbènèshè. Nènku mpindyewu bangabanga nè twètù kukàngula Díyì. . . Nènku mpindyewu—mpindyewu, yònsò wa kunùdi udi nè kàlaasà kàà Dyàlumingu mu dindà awu, mu bushùwà bwà bwalu, udi. . . Ncyèna—ncyèna mufwànyine kunùlòmba bwà nwènù kupùmbisha kàlaasà kèènù kàà Dyàlumingu aku to, aci's—aci's ke kèènù kaaba kàà mudimu ku èkèleeziyà wenù. Ncyà bushùwà. Kàdi, mpindyewu, nwènù kanùyì nuya mu kàlaasà kàà Dyàlumingu to, nùlwe

nùmònganè neetù mu dindà. Nè pashiishe èkèleeziyà wenù yèyè kàyi nè masangisha mààlabà dilòòlò to, mu dyàlumingu, tudi tunùjingila difika dilenga. Netwikalè nè disànkà dyà kwikala neenù pa díbà kanà dyónsò. Nènku Mukalenge ànùbènèshè. Nènku nwángeelelakù beena Kilistò bônso mwoyi; ncyéna ndwa mwab'ewu bikolè to.

⁵ Mvwa ànu munkaci mwà kutàngila mu cibambalu amu, kabèji kakesè kangàakafundamu kàcidi ànu kasòmbemù bu civùlukilu kùdi èkèleeziyà ewu. Nè mvwa mwambè nè: “Mukalenge ùdi munkaci mwà kumbiikila kule,” ke twètù bônso kudila mwadi wà binsònji ewu. Ndi mvùluka dilòòlò dyà kumpàlà dīngàakayà. Nwènù bônso nudi bavùlùke dibiikila dyànyì dyà kumpàlà adi, kùdikù muntu mwaba ewu udi uvùluka anyi? Nwènù bônso's nwakangata mfrangà bwà kuntuma lwà ku St. Louis, kwàkwondopiibwa Betty Daugherty mwànà awu. Mémè kushàala . . .

⁶ Vùlukàayi nè, ngaakasomba ciinkooci cyà muntu kampàndà mwab'ewu bwà kulwàta. Ncivwakù nè nkooci nànsha umwe wa kulwàta to. Ke mémè kuya kasòmba mu nkwasà wa kàshinyi kàà kale bwà kuya ku St. Louis. Nudi bavùlùke cikondo aci anyi? Ke mémè kusomba umwe wa ku nkooci yà bānà bèètù, ùvwa mumpite bunène be, mémè kumwambula mu dibòkò; bwalu kùvwa mashika nè ncivwa nè nkooci to.

⁷ Ke pashiishe twètù kuya kuntwaku, ke mémè kuya ku St. Louis nè mémè kutwilangana nè Mwanèètù Daugherty kuntwaku. Mwanèndè mutekète wa bakàji awu, bangàngabukà bônso bàà kuntwaku, nè bampilù nè mpitaadi, bàkaavwa bamulekéle. Yèyè's ùvwa ànu bu mupàlè wa lwonji ewu. Bambi bàà mu cimenga cijimà bàkaavwa. . . myaba yónsò, baditwe mu kumusambidila. Ke mémè kubwelamù nè kumusambidila, nè bakwètù abu kumwèkabò batòlokè nè mvyà ku mutù. Nènku mwànà wa bakàji mutekète awu muntwamu, wèla mbilà mikolè nè ùdila mwadi, ùdisuba.

⁸ Nènku—nènku kàcivwa kàbidi mwà kwenza mutooyi bu muntu wetù ewu to, bìvwa byùmvwika ànu bu nyama, ùkaavwa nè diyì dimupate ku . . . kaa, munda mwà ngondo mitwè ku yisàtù anyi yinaayi. Civwa ndisaamà dyà nshìngu wa kabàlà dyà mu mongo anyi . . . to, disaamà dyà Saint-Vitus, mu—mu mwongo. Nè mudisùme mènù ku tushikù twèndè tukese atu, tüzónza mashi. Nè tuuminu twèndè tukesè atu twónsò ànu tüzónza mashi, pàvwàye ùdisùma mènù ku minu apu, nè bintu byà mùshindù awu, nè mumòngànè ànu nè kwela kwà mbilà mikolè kacya byàngatangana.

⁹ Ke mémè kusambila, kuya mu èkèleeziyà. Mémè kwindila mēbà nè mēbà. Mémè kusòmba mu kàshinyi kàà kale aku nè kwindila. Ncivwa muswè kushiya bwalu abu to ànu pàngàakuumvwà dyandamuna dyà mu Dyulu. Ke mémè

awu musòmbe mwaba awu mu kàshinyi, cikèèna-kumòna kubwayikaci kumpàlà kwànyì aku, kwambaci nè: “Ndà kambila taatù, nè taatù...” KwambaYè nè: “Ûye ùkambile mukàjì awu nè dîngà ditùkù, mu cimenga, wàkasumba mbìdikà mukesè, mutòoke. Kacya kabàtukù banjì kwelamù màyi kwònsò eku to.” Nè yêyè nè: “Mwambile bwà àtàngile mu cisàsà ciisàtù nè neàsanganèmu mùshwàlà wùdi mujìngila mu dibèji, wùdi kacya kawùyi mukwàta naawù mudimu kwònsò eku to. Mwambile awùjè nè màyi. Wìmanyikè taatù ku cyanza cyèbè cyà dyàbalùme, nè kakwèndè mulùme ku cyanza cyèbè cyà dyàbakàjì aku, nè wàmbulule nè: ‘Taatu wetu, Udi mu Dyulu...’ Nènku panùdi ànu nutwàdija nànkù, àmubwikidije kalùlù aku kwisù kwèndè. Pashiishe munkaci mwà disambila mamwèndè àlènge byanza byèndè, pashiishe makàsà èndè. Pashiishe wìmanè wàmbè nè: ‘EMU MMÛDÌ MUKALENGE WÀMBA!’”

¹⁰ Nudi bamanyè cyàkenzekà, kî mmwòmò anyi? Yêyè wakondopiibwa ànu mwaba awu. Nènku twètù kukwàtangana ku byanza nè kwenda kupweka nè mùsèèsù bwà kukanwà kaasodà, pàmwè ku didyà dyà mundamunya. Ncyà bushùwà. Cyàkanyùkusha St. Louis; disangisha dyànyì dyà kuntwaku adi, dilòòlò dyà kumpàlà bantu binunu dikùmi nè binaayi. Ncyà bushùwà. Mu St. . .

¹¹ Mbibi bikolè be mûndi muye kule nè cyôci aci; bwa kuya nè kutwàdija ànu kubàbweja mu mulongo, ànu ku umwe ku umwe, ku umwe ku umwe. Ànu kuya ku nzùbu kampàndà nè kushàalakù too nè mwàjikàku, kadi kwalukila kumbèlu, ngèèla meeji nè aci cìvwa cìfwànyine kwikala cìmpè bikolè kutàmba mu masangisha.

¹² Èyo, twinyikàayi mitù patùdi twakula nè Mwena Dìyi edi apa, mpindyewu.

¹³ Mu musàngèelu wà Mukalenge wetù Yesù Kilstò, tudi tusemena Kùdi, Taatù wetù. Nè mu Dìna Dyèndè tudi tulòmba luse lwà kùdi Nzambi, bwà Ûfwèku luse ku mpèkaatù yètù nè matomboka ètù maKwenzela. Nènku kwòkò mpèkaatù kampàndà mu kaèkèleeziyà kakesè aka dilòòlò edi, tudi tulòmba, Mukalenge, bu—bu musadidi mwimàne mwaba ewu, bu mulami wa mìkòòkò kumutù kwà mìkòòkò. . . Bu mùdi Bible mwàmbè nè: “Tàbaleelà cisumbù cyà mìkòòkò cidì Nyumà Mwimpè mukuvwijè mutàngidi waci, bwà wèwè wabàdiisha.” Nènku mpindyewu, Taatù, nyèwù mbààkwila, bwà Wèwè kubàbènesha nè kulekela mpèkaatù yàbò yònsò. Ondopaku màsaama àdi munkaci mwà bantu awu. Nènku, Taatù wa mu Dyulu, ndi ndòmba bwà luse Lwèbè lwikalèku pambidi pèètù mpindyewu.

¹⁴ Kumpàlà kwànyì nkwòkò eku, bafunde pa dibèji, bifùmina mu nzùbu búngì cyanààna nè bantu bàábúngì, malòmba

matèèka, nkonko milelèlè yà ndondo yà mu Bible yìdì yìya nè dyàmwàmwà dyà kulonga kwà tùlaasà twà ciibidilu. Nènku bìdì bitùkèngela dikwàcisha Dyèbè, Mukalenge Yesù. Nènku mfùma ànu ku dyangata eyi mpindyewu, kubwela mu cibambalu, kwenza disambila, kupàtuka, kuyitapulula mwab'ewu, nè kutèèka eyi yìdì yikèngela kwandamunyiibwa mpindyewu ayi ku luseke lùm wèpelè, nè mikwàbò yìdì nè cyà kubwela mu Mifundu ayi, ku lukwàbò luseke. Ke bwà ku dyànyì pàànyì dimanya pa díbà edi, Mukalenge.

¹⁵ Nènku ndi ndòmba bwà nè kwambwila ànu ku mpindyewu Wèwè wàngacile ànu apa mene, nè ùlaabeku cisàmbà Cyèbè maanyì kaaba aka dilòòlò edi, mishìkù yà mwakudi, maci àà mutèèleji. Nènku swàkù bwà Nyumà Mwímpè àlwe kwangata bukòokeshi bwà Dìyì mpindyewu nè àDìbwejè buludì mu mwoyi wònsò, nènku bàDyacidilèku mu nyumà wa musàngeele, nè Difidiibwèkù mùshindù wùm wèwùm wè awu. Nènku swàkù bwà, pààjikà disangisha dilòòlò edi, twàlukilèku kumbèlu, twamba nè: “Myoyi yètù kayìvwakù yilàkuka kapyà munda mwètù bwà Bwikadi Bwèndè nè mabènèsha Èndè anyi?” Mukalenge, ncìyì mumanyè cyà kwamba to, ndi ndilàmbula Kùdì nè nkonko eyi, mu Dìná dyà Yesù Kilistò, bwà dyandamuna. Amen.

¹⁶ Twasàkidilaayi, balundà bàànyì, bwà kaneemu kèènù. Ndi muswè ànu kunùleeja cìvwà yàbùngì, cìvwà ciibùngì cyà nkonko eyi.

Mwanèètù Bill, bu wèwè mwà kuswà tùngunukàku nè mu lumingu lwàlonda's.

Swàkukù ùshaale lumingu lukwàbò.

Swàkukù ùshaalè ntàntà mule ndambù.

Mwanèètù Bill, bu wèwè mwà kuswà shàalakù lumingu lùdì lùlonda elu, ntàntà mukèsè ndambù, misùùkà yètù yìdì nè nzala yà Cyàkudyà cyà mùshindù ewu.

Èkèleeziyà ewu ùdì ùlongesha nè wèwè. . . Elu lùdì ànu nè cyà kwikala lumatè munda amu. Lùdì mu mwaba wùdì kawùyì wòwò to.

Ndi nè bàna bàà balùme bàbìdì, bàà bidimu bìbìdì. . . Mbwena kwamba nè, ndi naayi micyòmpakaja, ngèèla meeji, mwòmù emu. Mpindyewu, apa, bìvwà bìmpè mèmè mutèèka elu apa, kàbìdì, alu's lùdì lùtàngila bwalu busungùluke bwà muntu pàànkààyèndè.

Mwanèètù Bill, udikù mwà – udikù mwà kuswà bwà lumingu lukwàbò lùm wè anyi? Tudi baswè lumingu lukwàbò lwà dilongesha dyà Èvànjeeliyò ewu.

Dilòmbà dyànyì ndyà wèwè kushààla lukwàbò lumingu. Ndi muswè bikolè be bwà wèwè kushààlakù katanci kale ndambù,

udi mumanyè nè tudi misangu yônsò...tudi mwà kuyiila byàbúngi.

Mpindyewu, udiku mwà kushààla ntantà mukesè lukwàbò lumingu anyi, bu wèwè mwà kuswa?

Mwanèètù Bill, bu wèwè mwà kuswa tùyiishekù kàbìdì lumingu lukwàbò lùmwè. Tudi dijinga nè eci.

Mwanèètù Bill, disambila dyànyì ndyà nè Nzambì àshintululèku meeji èbè nè àkwenzèjè bwà kushààla lumingu lukwàbò.

Lukonko lwànyì lùdì nè: Tuumàlòngò tudi tubùuka muulu atu ncinyi, nè twòtò atu tudi cintu kampàndà cyà kùdì Nzambì citùma bu cimanyinu anyi? Kàbìdì ndi nkulòmba bwà kushààlakù lukwàbò lumingu.

Bu wèwè mwà kuswà shààlakù lukwàbò lumingu.

¹⁷ (Nènku *edi* òdìwa ndilòmba bwà wèwè kuya mu èkèleeziyà, bwà kusambidila muntu kampàndà, nwamònu's, kuya ku lùpitaadi kampàndà.)

¹⁸ Mpindyewu, mukwàbò nyèyè ewu wákamba nè nêngiikalè mwà...Ndi—ndi ngàanyiisha nkonkèlù ewu. Nènku Nzambì wa Bukolè bwònsò Udi Mulumbulwishi wanyì awu, mwimàne kaaba aka mpindyewu mu mwaba munsantu ewu...kumpàlà kwà mèmè kuumuka kumbèlu, Nyumà wa Mukalenge mmungambìle, mmwàmbè nè lukonko elu nelwikalè lutèeka mwaba ewu dilòlò edi. Ncìwva mumanyè kantu nànsha kàmwè pa bwalu abu to, kàdi mvwa mumanyè nè lùvwa mwà kwikala apa nè:

Bantèmù bàà Yèhowàh kasùmbu kàà mafi anyi?

¹⁹ Nwamònu's, muntu kampàndà...Nè Nyumà Mwîmpè, mu mwaba wà...pàmvwà mwimàne mu nzùbu wa cyowedi, kumpàlà kwà kulwa kaaba aka; Nzambì, Udi Mulumbulwishi wanyì wa kàyì tuseku awu, mmungambìle nè: "Nelwikalè lùsanganyiibwa pa cyambilu apa," nè mwàmbè ncyèna mwà "kwamba kantu nànsha kàmwè pa bwalu abu to; ntùngunukè ànu nè kuya kumpàlà." Nwamònu anyi? Pa nànu ndi... Nudi bamanyè cìmvwà mwàmbè makèèlèlè dilòlò awu aci, kì mmwòmò anyi? Èyo, ke cìvwàku ncyòci aci.

²⁰ Èyo, mpindyewu netùbangilè apa pa yìmwè yà ku yòyi eyi.

²¹ Ncyèna ànu muswè kutèèla ní ncintu kaayi cyònsò eci to, nè kwamba muntu kampàndà anyi muntu-nkààyà kampàndà mùshindù awu to. Mèmè ntu ànu muswè kucìlongesha mu mùshindù wà ànu...kukùngwija cintu cyònsò nkòong kaaba kàmwè. Nènku—nènku nudi bumvwè, kì mmwòmò anyi? Bu mèmè mwà kwimana kaaba aka kwamba nè: "Mpindyewu, Mwanèètù Neville ùdì cintu kampàndà nè *cikansanga*"...Bu mèmè naaci cyà kwakula bwèndè, mvwa mwà kuya kwèndè kumbèlu nè kumubiikidila pambèlu bwà kuyiikila nendè bwà

bwalu abu. Nwamònu's, ndi mufwànyine—ndi mufwànyine kwambila Mwanèètù Neville.

²² Kàdi mpindyewu, ke yimwè yà ku nkonko eyi's. Mpindyewu, ncyèna mumanyè pà kubangila to, yìdi ànu mushikì mujimà myadija kaaba aka. Lùdi lwàmba nè:

25. Ndipetangana kaayi dyúvwà uringa kwamba didi naadi èkèleeziyà wa Mishòònyi nè èkèleeziyà wa Kàtòlikè?

26. “Cimfwànyi cyà nyama wa lwonji” cìdi cyumvwija cinyi?

²³ Mpindyewu, alu lúvwa lùmwè lwà ku nkonko yà musangu mushààle...pàmwápa lúvwa pa bantu...Mpindyewu, nènteetè nè mwànyi mwònsò, ku dikwàcisha dyà Nzambi, bwà kuyàndamuna ku dyànyi pàanyi dimanya. Mpindyewu bu Yèyè mwà kumpà dimanya, bwalu Nzambi mmumanyè nè ndi—ndi mfùma ànu ku diyàmbula, pa cyambilu apa.

Mpindyewu, ndipetangana kaayi dyúvwà muswè kwamba didi naadi èkèleeziyà wa Mishòònyi nè èkèleeziyà wa Kàtòlikè?

²⁴ Mpindyewu, nèngàdamunè alu dyàmbedi, bu Nzambi mwà kunkwàcisha. Mvwa mwàmbè ne èkèleeziyà wa Kàtòlikè úvwa...Tudi tusangana nè cimanyinu cyà nyama wa lwonji, dilòòlò dyà kumpàlà kwà didi dishààle edì, cívwa nè cyà kupàtukila mu Loomò. Mmwómò anyi? Kacyèna mwà kupàtukila mu ditunga dikwàbò nànsha dimwè to pa kuumusha ànu mu Loomò. Ke mwaba ùdici cishikàmìne awu, ke mwaba ùdici citèèkiibwe awu. Ke mèmè kwamba nè ncyèna cilumbù nè beena Kàtòlikè to, ncyèna cilumbù nè muntu nànsha umwe to. Twètù bònsò tudi bantu bàà cifwàkà tuteeta bwà kufika mu Dyulu.

²⁵ Paapà ke muntu umwe udi ulongesha, mwèpiskòpò mutàmbidile wa ku Canterbury mmukwàbò pèndè, nè mukwàbò, nè mukwàbò, nè mukwàbò; kàdi mèmè ndi ànu umwe wa ku balongeshi abu, kwajiki. Bàdi mwà kulongesha nè kwamba, pàmwápa nè, mèmè mvwa mukoleshi wa maalú nè mvwa mu dipanga, nè bikwàbò. Nènkú ndi nè bukenji. . .bu mèmè mwà kuciyaadikila ku Mifundu. Anyi bu bóbò mwà kuciyaadikila ku Mifundu bwà nè ndi mukoleshi wa maalú, díbà adi ndi mukoleshi wa maalú. Kàdi mèmè mwà kujaadikila aci ku Mifundu nè bàdi mu dipanga mu ngiimànyinu wabò awu, díbà adi ndipanga; Mifundu mmibinge. Nènkú kanwèna ànu nwangata kaaba kàmwè mpindyewu to, bikèngela cilondanganè nè Bible too nè ku ndekeelu, mwaba wònsò.

²⁶ Mpindyewu, mèmè kwamba nè: “Èkèleeziyà wa Kàtòlikè nguvwa èkèleeziyà maamù,” nè aci ncyà bushùwà menemene. Èkèleeziyà wa Kàtòlikè ke èkèleeziyà maamù, pàdìbi bitàngila malongolodi à èkèleeziyà. Èkèleeziyà wa Kàtòlikè nguvwa èkèleeziyà wa kumpàlà ukaadiku mwenza, lwà ku...mu bwalu-bulonda bwà butàmbe bwimpè, nudi nusangana bu

ku cidimu cyà 606 yà cipungu cyètù eci, mwaba kampàndà mwômò amu pàvwà baataatù bàà ku cibangidilu, nkwaka mwibîdî anyî mwisâtù awu, wa bàpostòlò. Bààkafwà bônso nè kutwàdija kutangalaka mu tusumbù tukesè. Nènku beena Loomò, bu mùvwàbo bakùdimùne mucimà, Bukalenge bwalàbàle bwà cyena Loomò bwàkakòòkesha ditunga adi, ke pashìishe èkèleeziyà nè mbùlâmàtadi kudisangabò nè kubangabò ntèndeleeu uvwa ubiikidiibwa nè “ntèndeleeu wa buloba bujimà.” Nè mwâkù *Kàtòlikè* wùdi wùmvwija nè “wa buloba bujimà.” Bòbò kuvwija èkèleeziyà awu bulongolodi, cìvwà ciikàle musangu wà kumpàlà ùvwà ntèndeleeu awu, ntèndeleeu wa bwena Kilistò awu, mudìvwijèku bulongolodi mu maalu-malonda ònsò à pa buloba.

²⁷ Ntèndeleeu wa beena Yudà kacya kàvwakù bulongolodi to. Cìvwà mbantu badishikàmìne. Bàvwà nè maèkèleeziyà, kàdi kabàvwà nè bulongolodi to. Bwà nè, Nzambi ùvwà mukwàte mudimu nè ditunga kampàndà, kî mbulongolodi to. Cìvwà nditungà.

²⁸ Nènku mpindyewu. Nè, pashìishe, èkèleeziyà wa *Kàtòlikè* nguvwa bulongolodi bwà kumpàlà. Pashìishe twètù kucyàngata mu Bible bwà kujandula cìvwà bulongolodi abu. Nè bilondèshile Diyì dyà Nzambi, cìvwà nè cyà kukòntononyiibwa kùdi muntu wa nkàayendè, muntu umwèpelè. Nè bivwa bikèngela bwà muntu awu kwikalayè mu èkèleeziyà kampàndà uvwa mushikàme pa tukùnà mwandamutekète mu Loomò, bilondèshile Bible. Kakwènaku. . . Nè yèyè ùvwà nè cyà kwikala nè bukòòkeshi bwà kulombola ditunga nè ditunga dyònsò pa buloba, bukòòkeshi bwà kulombola ntèndeleeu. Kakwèna mukwàbò pa buloba apa nànsha.

²⁹ Nènku—nènku Communisme, tudi tujandula nè, kàvwà—kàvwà mufwilakanyi nè Kilistò uvwa Yesù mwakùle awu nànsha. Communisme kî—kî nditungà, mùdi Russie to. Communisme nnyumà kampàndà. Àmèrikè mmudiike yònsò kùdiye. Ùdi mu maèkèleeziyà, ùdi mu bantu, ùdi mu mudimu, ùdi mu myaba yònsò. Communisme, nnyumà wendè, ùdi mu bilongelu, mu mbànzà, myaba yònsò.

³⁰ Nè pashìishe—pashìishe pààkavwijàbo èkèleeziyà ewu bulongolodi cintu cìvwà cibèngangana nè. . . Nènku mpindyewu tudi bangàte Bikondo Mwandamutekète byà Èkèleeziyà, nè cipròfetà, ànu menemene mùshindù wàkatùtwàdilaci Nzambi mu Bible mwaba ewu. Nè tudi tujandula ku maalu-malonda nè Bible, nè cikondo cyònsò cyàkabwela ànu bilondèshile Bible, bilondèshile maalu-malonda; cyònsò nè cyònsò kubwelaci ànu pa dibà, mu bikondo byà mîdimà. Ke pashìishe èkèleeziyà wa *Kàtòlikè* kwenjiibwayè mu Cikondo cyà Mîdimà.

³¹ Pashìishe dilongolola kulwadì, dîdi diikàle Martin Luther. Nè Martin Luther wàkadi nè bukènkè, bukènkè bwà nè

“Mwakàne neikalè nè mwoyi ku diitabuuja; dibingishiibwa ku diitabuuja,” mu—mu dilongolola. Nsaserdòsè wa beena Allemagne wàkavila nè wàkamba nè dyangata dyà nkòmuunyò pàakadyènzàye. . . Nènku bàvwa nè cyà kwamba nè “eci *cidi* mubidi wà Kilistò,” ke kumwimanshayè panshi kwambayè nè: “Kí mmubidi wà Kilistò *to*; ncyostiyà!” Ke pa nàнку yéyè kubenga èkèleeziyà wa Kàtòlikè awu, mu kwenza kwà nàнку, kàdi kupàtuka mu dilongolola dyà ku cibangidilu. Martin Luther wàkenza nàнку, nè aci civwà nkwaka mulenga wa dikemà.

³² Mpindyewu, cilèma, mwaba wàkenzela Luther cilèmà cyèndè, Luther wàkalongolola kasumbù kakwàbò ànu mwàkenza èkèleeziyà wa Kàtòlikè amu, wàkavwija bantu bulongolodi.

³³ Pashiishe, dyàkàmwè, bukènkè bupyabùpyà kulwabù. Nènku pàakalwa bukènkè bupyabùpyà, Nzambi wàkapàtuka nè cisàmbà Cyèndè. Bantu bàvwa badivwije bulongolodi mu èkèleeziyà wa ba-Luthériens abu, byàkakèngela bwà kushàalabò nè èkèleeziyà wabò bwà kwikalabò nè. . . Bìdi ànu mwomùmwe nè mùvwà beena Kàtòlikè nè cyà kwikala amu, kàdi bààbùngi bàà ku beena Kàtòlikè bààkapàtuka nè kulwabò ba-Luthériens. Èè, pashiishe pàakalwà Wesley nè mukenji wà dijidiibwa, dîbà adi bààbùngi bàà ku ba-Luthériens kabàvwa mwà kuumuka mu èkèleeziyà wabò to; kàdi bààbùngi bàà kùdìbo bààkacyèza, nè kwenzabò èkèleeziyà wa Wesley.

³⁴ Pashiishe paanyimà pàà dibingishiibwa nè dijidiibwa, ke kulwakù Mpenta. Nè pashiishe Mpenta, bààbùngi bààkapàtuka mu ba-Méthodistes, nè bikwàbò, nè bààkalwa Mpenta bwalu civwa mbukènkè butàmbe bunène. Mpindyewu Mpenta wàdivwiji bulongolodi ànu menemene mùdi yònsò wa kùdìbo amu!

³⁵ Mpindyewu, Bible ùdi wàmba nè. . . Aa mēyì ngàà mashilè, kàdi mēmè nēngàbadilè mu Bible. Nè udi utēēleja ngàngàbukà webè, anyi bikwàbò, wàmba cikampàndà, kàdi mēmè ndi mwanènu wa balùme ndongeshila mu Mifundu. Bible wàkabiikila èkèleeziyà wa Kàtòlikè nè “ndumbà, mukàjì wa masandi, m-u-k-à-j-i-w-a-m-a-s-a-n-d-i.” Nè Yéyè wàkabiikila èkèleeziyà yà Mishònyì yàkamulonda ayi, baamaamù. . . anyi nè yivwa “bàna bàà ndumbà bàà maamù ewu.” Kàdi ndipetangana kaayi divwàku, ndyà nè èkèleeziyà wa Kàtòlikè wàkavwija cintu cyònsò aci bulongolodi nè kwenzeja bantu bònsò bwà kwitabuuja bu nè ke bukènkè bwàkadibo naabù dîbà adi, anyi cyàkadibo naaci dîbà adi. Ba-Luthériens bààkenza cintu cimwècimwè aci. Nè Bible mmwambè nè yéyè ùvwa mukàjì munène wa mùshindù awu.

³⁶ Mpindyewu mukàjì wa mùshindù awu ncinyì? Mmukàjì udi nè nsòmbelu wa wènda masandi. Nè èkèleeziyà yidi munkaci mwà kwenda masandi à mu nyumà pamwè nè—nè bantu.

Nwamònu anyi? Bàdi—bàdi... Bible nyêyè ewu udi ulongesha Eci, nè bàdi bàkwatakaja mushiki mujimà wà twitabàayi nè bikwàbò bidì kabìyi bwalu nè Bible abi. Nènku, mu, mbidimu bitwè ku makùmi àbidì nè *byà mu njila* bìndì mwimàne mwaba ewu nè mukonke mwambi kanà yònsò, pa dîbà kanà dyònsò, bwà kulwa kwangata... kî mmukàndà wènu awu, twitabàayi wènu awu to, kàdi kulwa kwangata Bible, mu Bukênkè bwà Bible, nè kuCijaadika nè nntùpàkànyì. Nwamònu anyi? Ncyà bushùwà.

³⁷ Nè pa bìdì bitàngila dibèngangana dyà mèyi, bàdi bàmba nè: “Dibèngangana dyà mèyi!” Ntu mwanýishe bwà kufila nànsha difutu dyànyì dyà ngondo yìbidì mijimà bu muntu mwà kundeeja dibèngangana dyà mèyi òmwè mu Bible emu. Kadyènamù to. Nudi nwela meeji nè òdimù, kàdi kadyènamù to. Piikalà Bible Yèyè mwinè wàmba maalu àbèngangana, kî mmwìmpèkù to nànsha kakesè, kanwèna mwà kumwitabuuja to. Dîyi dyònsò ndisonsola nè kakwènakù dibèngangana dyà mèyi mu Bible to.

³⁸ Mpindyewu èkèleeziyà wa Mishòònyì, mu bulongolodi bwèndè, ùdi (bilondèshìle Dîyi dyà Nzambì) mwikàle muswikàkàne nè cintu cìmwècìmwè aci nè èkèleeziyà wa Kàtòlikè.

³⁹ Mpindyewu, ncyèna cilumbù nè beena Kàtòlikè to. Bàmwè bàà ku balundà bàanyi bàà batámbe bwìmpè, mbasómbe kaaba aka mene mpindyewu, mbakolèle mu beena Kàtòlikè. Mwaba ewu, dilòòlò dishààle dyàdyà, pàmvwà muiyishe diyìsha dipape dyà ku Nyumà Mwìmpè, pa beena Mishòònyì nè beena Kàtòlikè, beena Kàtòlikè kulwabò buludì ku cyoshelu eku nè kundabula ku cyaanza. Bòbò's mbantu ànu bèètù aba ànu bu mutùdi emu.

⁴⁰ Kwèna mwà kuyiikilangana nè bansaserdòsè bàà Kàtòlikè to, bwalu kabèèna biitabuuja nè Bible ewu yònsò ùdi Dîyi to. Bàdi bàmba nè: “Ng'èkèleeziyà.” Twètù tudi twamba nè: “M'Bible!”

⁴¹ Beena Kàtòlikè bàdi bàmba nè: “Twètù beena Kàtòlikè tutu tuya mu èkèleeziyà nè tukuukwila. Nwènu beena Mishòònyì nudi nushààla kumbèlu bwà kubala Bible.”

⁴² Mèmè nè: “Èyo, nutu nuya mu èkèleeziyà bwà kukuukwila, kàdi nudi nukuukwila cinyì's?” Ke cintu cidì cìlondà ncyòci aci, nwamònu's.

⁴³ Mpindyewu, kàdi Nzambì mmwambè nè Yèyè ùwva mu Dîyi Dyèndè. Eci ke Dîyi dyà Nzambì nè mèmè ndi nDiitabuuja. Mèmè ndi mukuukwidi wa Bible. Ke bwà cinyì ncyèna mpetangana nè cyena-Mishòònyì to nè—nè mùshindù wà—wà ànu bulongolodi bwà èkèleeziyà cyanàànà, bwalu bàdi bàlongesha bintu bidì kabìyi Dîyi dyà Nzambì to. Pa nànu ncyèna nè mùndì mwà kwenza bwà kubenga kupetangana ku mèyi to. Ncyèna mbàbènga to; to, mukalenge, bòbò's mbànà bèètù. Nè ncyèna mbàbènga to, kàdi ndi mbèngangana naabò ku mèyi bwalu bidì bikèngela bwà mèmè kwangata cidì Nzambì

wamba nè kulekela bwà bikwàbò byònsò bìikale mashimi. Nwamònu anyi?

⁴⁴ Nènkù mpindyewu ke dipetangana ndyòdi adi dìdì... Nènkù mpindyewu Bible mmwàmbè nè mukàjì ewu, èkèleeziyà wa Kàtòlikè, uvwa nè cyà kubìikidiibwa, mu Bible, Bwàkabuulwibwà nshapìtá wa 17 nè: “Mukàjì wa masandi,” nè yèyè ùvwa: “MAMWÈNDÈ WA BANDUMBÀ.” Nènkù tudì tumòna nè Bible mmwambè nè *mukàjì* ùvwa ùleeja “èkèleeziyà.” Nànkù dìbà adi bu yèyè nè bânà bàà bakàjì bàdì bandumbà abu, kabàvwa mwà kwikala bânà bàà balùme to; bìvwa bikèngela kwikalaci bânà bàà bakàjì, pa nànkù bìvwa bikèngela kwikalaci maèkèleeziyà. Nè cyena-Mishònyì ncilelela mu cyena-Kàtòlikè.

⁴⁵ Nènkù mpindyewu, nyama udi ulonda awu... Anyì, cintu cìdì cìlondà cìdì eci cyàmba:

Ncinyi cìdì “cimfwànyì cyà nyama wa lwonji” cyùmvwija?

⁴⁶ Cìdì—ndukonko lulamàkàne nè alu, nè muntu udi mulwèle ùdì nè lukonko lwìmpè. Cìdì cyènza mpindyewu ncinyi, bu... Bible ùdì ùlongesha bitòòke tòò nè èkèleeziyà wa Kàtòlikè ùdì nyama wa—wa lwonji. Bible mmwàmbè nè *nyama* ùdì ùmvwija “bukolè.” Mmwòmò anyi? *Nyama*, Bible ùdì wamba nè *nyama* ùvwa ùmvwija “bukolè.” Nènkù *nyama wa lwonji* ùvwa “Cimenga cyà Vatican,” “balombodi bàà myànzù bàà Kàtòlikè.” Èyo. Nènkù, mpindyewu, cìvwa mbukolè bwà èkèleeziyà bìvwa nyama wa lwonji awu.

⁴⁷ Pashìishe èkèleeziyà wa Mishònyì kupàtukayè mu èkèleeziyà wa Kàtòlikè, nè kudìvwijayè bulongolodi, bukolè bukesè. Ke cimfwànyì ncyòci aci.

⁴⁸ Bu cintu kampàndà... Bu cintu kampàndà cyenjìbwe mu cimfwànyì cyànyì, bìvwa bikèngela kwikalaci cìfwànàngàne naanyì. Bu cintu kampàndà cyènza mu cimfwànyì cyà èkèleeziyà ewu, bìvwa bikèngela kwikalaci cìfwànàngàne nè èkèleeziyà.

⁴⁹ Cintu kampàndà cyàkenjiibwa, nyama kampàndà... cyenjìbwe mu cimfwànyì cyà nyama wa lwonji ewu, cìvwa ciikàle bwena Luther, bwena Méthodiste, bwena Baptiste, bwena Mpenta, bwena Cijila, *tusumbù* tònsò etu twàkadyenza bulongolodi kampàndà nè kwenza cimfwànyì ànu cìfwànàngàne nè nyama wa lwonji. Ke bwalu abu’s!

⁵⁰ Mpindyewu: “Udi wamba dìbà adi, Mwanèètù Branham, nè beena Kàtòlikè bònsò, ba-Méthodistes bònsò, nè ba-Baptistes bònsò bàyaaya...?” Kì ncìmvwà mwàmbè to.

⁵¹ Kùdì binunu nè binunu nè makùmi à binunu byà beena Kilistò baledìbwe cyàkàbìdì mu èkèleeziyà ayi. Kàdi, mu bulongolodi bwàbò amu, bàdì munkaci mwà kuteeta bwà kubàsàka ku twitabàayi kampàndà, kàdi kabààkwitaba bwà kumutwà nyama ku mikòlò to. Èkèleeziyà awu—awu, pàdiye

ànu ùdivwija bulongolodi, ùdi ùshààla mwînshì mwà twitàbàayi kampànda.

⁵² Nènku mèmè ncyèna nè twitàbàayi to ànu Bible. *Eci* ke Twitàbàayi wa Nzambì, nè Nyumà Mwímpè ùdi Mumvwiji wa Cyôci aci, nè Yèyè ùdi ùCitwala ku Bukênkè nè ku bukwbò. Èvànjeeliyò ùndi nyiisha leelù ewu ewu, bu mèmè mwà kwikala nè mwoyi too nè ku dimòna dyà lukwbò lukàmà lwà bidimu, bu twètù mwà kwikala nàнку, nekwikalè Bukênkè bupìte búngì. Ànu ku musangu nè ku musangu, Cìtu misangu yònsò cìlwa.

⁵³ Kale wàwa wèwè uvwa nè ciibidilu cyà kwendela mu ditempu dyà ngombe, tatwèndè wa kakwèbè mulùme, pàvwàye ùya bwà kamòna kakwèbè mukàji apu. Papa ùvwa uya kamòna maamù mu Model-T kampànda. Kàdi mpindyewu tudi twamba kuyiila mu kadèkè kàà jet. Nwamònu's, tudi munkaci mwà kwenda kuya; maalu à mamanya, munkaci mwà kwenda kuya; dilonga dyà tùlaasà dìdi munkaci mwà kwenda kuya; Èvànjeeliyò, munkaci mwà kwenda kuya mutàngile kumpalà. Nè Bible mmwàmbè nè nebitantè, mmwàmbè nè: "Nebànyemakanè bàtwa eku nè kwàka, nè dimanya nedivùle." Pa nàнку aci's ke dinungu. Ke bwà cinyi kùdi . . .

⁵⁴ Èkèleeziyà ya cyena-màngumba ya Mishònyì ke cimfwànyì cyà nyama wa lwonji, bwalu cikaadi civwijiibwe dìngumba ànu menemene mùdi cyena Kàtòlikè amu. Nènku Nzambì kacya kàtukù mulongòlòle Èkèleeziyà Wendè bwà kwikalayè bulongolodi mu cikondo nànsha cimwè to, kàdi ùtu misangu yònsò ànu ùbùpiisha bibì wòshà nè munu mwìkù! Mpindyewu nudi nucyùmva anyi? [Disangisha dìdi dyàmba nè: "Amen."—Muf.] Kì mbantu to; èkèleeziyà!

⁵⁵ Pàdìbo bàteeta kubweja bantu mu—mu bukênkè bwà . . . Mwaba ewu, ambàayibì tũng bu bantu mwà kukwaluja kale wàwa bwà kubanga kunyemena mu ditempu dyà ngombe? Kwèna mufwànyine kucitwala to; tudi nè mwoyi mu cikondo citàmbe bwímpè. Ke mùshindù wùdici kale wàwa. Muntu yèyè muteete kungambila nè: "Kaa, cintu cimwèpelè cìdi cìkèngela bwà wèwè kwenza *ncikampànda*, *cikansanga*." Mèmè ndi nè mwoyi mu cikondo cikwbò! Ndi . . . Ki lutàtù lùdi naalù bambi ndwòlò alu, bàdi misangu yònsò ànu bàtàngila paanyimà.

⁵⁶ Mwab'ewu, mwena maalu à mamanya wa mu France wàkamba, kùkaadi bidimu bishàadile ku nkàmà yìsàtù nè: "Bu muntu mwà kunyeema lubilu lwà njààjàmà, lwà kilòmèètà makùmi ànaayi nè mwandamukùlù ku dìbà dimwèpelè, dikòkiibwa dyà kùdi buloba's ndifwànyine kuumumusha pa buloba. Kilòmèètà makùmi ànaayi nè mwandamukùlù ku dìbà dimwèpelè!" Èè, nudi nwela meeji nè maalu à mamanya mmawànyine kwalukila ku cyôci aci leelù ewu anyi? Nànsha kakesè! To, mukalenge. Bàdi bàmunyemesha mu lubilu lwà kilòmèètà cinunu nkàmà yìnaayi nè makùmi ànaayi anyi

cinunu nè nkàmà yisambòmbò ku dībà dimwèpelè. Èyowà, anyi misangu mikwàbò mu dīzàjì, nè dībà adi nkilòmèètà binunu bibidi nkàmà yitaanu nè makùmi àsambòmbò ku dībà. Nè bacikàlè batùngùnùkè nè kwenda kuya nendè kumpàlà's!

57 Maalu à mamanya mmayè matàngile nè muntu kumpàlà, àtamba kuya mamutàngije kumpàlà, bintu bitàmbe bunène nè meeji èndè kutàmba cìvwà. . . Nènkù's ke cintu cimwèpelè cidiye naaci ncyôci aci, mmucì wà dimanya. Kule bikolè kutàmba mùdi bambi bayè nendè nè Nyumà Wendè, mwinè awu ngudi kàyì mikàlu. Kàdi bwalu mbwòbù ebu. Maalu à mamanya kaèna àtùma mèsù paanyimà ku cìvwà maalu à mamanya mambè kùkaadi ndambù wa bidimu to; maalu à mamanya àdi munkaci mwà kwangata cidibo naaci mpindyewu aci nè bàya batàngile kumpàlà bwà cikwàbò cintu.

58 Kàdi konkààku wèwè muyiishi; “Èè, netùmonè cyàkambà Moody bwà bwalu Abu, netùmonè cyàkamba Wesley bwà bwalu Abu.” Cyàkambàbo bwà Cyôci aci nànsha ciikàlè cinyi. Mèmè ndi mumanyè cidi Nzambi mwàmbè pa Cyôci aci *mpindyewu*. Eci ke Cyôci, nè ncidi ànu nkèba citàmbe bunène! Ke cyôci aci. Ke bwà cinyi. . .

59 Bible mmwàmbè nè: “Nyumà yisàtù yà bukooyà yàkapàtuka mukana mwà nyama wa lwonji.” Nudi bamanyè mùdi bwalu anyi? “Nyumà yà bukooya,” mwàkambàye, “mifwànàngàne nè ndimbà.” Nukààdikù bamòne mùdi ludimbà lùtàngila anyi? Ludimbà lùtu misangu yònsò ànu lùtàngila paanyimà, kacya lwólù kàlùtukù lùtàngila kumpàlà to; lùtàngila paanyimà, misangu yònsò ànu paanyimà, lùtàngila paanyimà.

60 Kàdi nyama yinaayi yàkadi nè mitù yinaayi mishiilàngàne ayi, mu Yehezèkèlè, yìvwa mitàngile kumpàlà nè kayìvwa mwà kwalukila paanyimà to. Bàvwa bènda baya kumpàlà dībà dyònsò. Kwònsò kùvwàbo bàya aku, bàvwa bènda bàya ànu kumpàlà. Nudi numòna dishiilàngana anyi?

61 Mpindyewu, aci's ke dipetangana didi naadi cyena-Mishòònyì nè cyena-Kàtòlikè aci.

62 Pa nànkù nudi misangu yònsò ànu nwela beena Kàtòlikè cilumbù pambidi, kàdi “lwesu lwà mishila kalwèna mwà kwamba mbidika wa diipikila café mùdiye ‘mufiike to.’” Ncyà bushùwà.

63 Ndi ngàmba nè: “Udi mwena Kilistò anyi?”

64 “Nènkufikishè ku dyumvwa nè ndi wa mu èkèleeziyà wa ba-Baptistes.” Èyowà's. Aci kaciyèna naaCì bwalu nànsha bùmwe kutàmba cyà kwamba nè udi wa pambèlu apa ku. . .ferme mwaba kampàndà.

65 “Mòna's, mèmè's ndi wa mu èkèleeziyà wa Kàtòlikè.” Aci kaciyèna ànu cikuvwija mwena Kilistò to. Kwikala wa mu

èkèleeziyà wa ba-Baptistes anyi wa ba-Méthodistes kaciyèna cikuvwija mwena Kilistò to.

66 Kùdi mùshindù ànu wùmwepelè wà kwikala mwena Kilistò. Mwákù *mwena Kilistò* wùdi wùmvwija nè “mufwànàngàne nè Kilistò.” Nènku kwèna mwà kuciyèna to, kwèna mwà kudyènzèlaci mu wèwè mwinè to, kakwèna mùshindù nànsha mukèsè wùdi mwà kuciyèna to. Bìkèngela ùdìpwè wèwè mwinè mwoyi, ùfwe mu wèwè mwinè, kàdi ùlekelè Kilistò àbwele nè ikalè nè nsòmbelu wa Mwoyi wà Kilistò munda mwèbè.

67 “Ànu muntu yèyè...” Cyàkambà Yesù ncyòci eci nè: “Muntu yèyè kàyì mulediibwe kùdi Nyumà nè kùdi màyi to, kàakubwelakù nànsha bìshi to mu Bukalenge.” Nànsha yèyè mwena Kàtòlikè, Méthodiste, Baptiste, anyi ní ncinyi cyònsò, nebikèngele bwà wèwè kubatijiibwa mu màyi bwà dilekelediibwa dyà mpèkaatù yènu nè kupeta dibàtiiza dyà Nyumà Mwímpè, cyanààna udi mujimine. Ke Diyì dyà Yesù Sungasunga ndyòdi adi. Nànku mpindyewu pawikalà Méthodiste, nè mupetè dibàtiiza dyà Nyumà Mwímpè, mubàtijiibwe mu màyi, Yesù wàkamba nè neùbwele mu Dyulu. Wèwè mwikàle mwena Kàtòlikè nè mwenzè cintu cìmwècìmwè aci, neùbwele mu Dyulu.

68 Kàdi wèwè ànu kacya washààla mukwàta ku twitabàayi wa èkèleeziyà wa Kàtòlikè awu, anyi èkèleeziyà wa ba-Méthodistes, anyi wa ba-Baptistes, wèwè ucidi ànu mujimine. Nènku’s ke bwà cinyi tudì nè ngiikàdilù pa buloba, utùdi nendè leelù ewu, bwalu bantu bàdi mememene ànu... Bàdi bàmba nè: “Aci’s ncibèngàngàne nè diitabuuja dyànyì.”

69 “Udi witabuuja dyondopa dyà kùdi Nzambi anyi?”

70 “Aci’s ncibèngàngàne nè diitabuuja dyànyì.” Aci’s ncibèngàngàne nè èkèleeziyà webè; twitabàayi wa èkèleeziyà webè mmukwàtàkàje cyòci aci, nwamònu’s, udi nè cyà kwèna cidi èkèleeziyà wàmba. Nè pashiishe ubingila mwena Kàtòlikè; s’ncintu cìmwècìmwè cyènzènzàbo. Nènku’s ke nyama wa lwonji nyèyè awu nè cìmfwànyì cyà nyama wa lwonji! Nè Bible ùdi wàmba nè: “Ewu yònsò wadidìnga kucyàngata kèna mwà kubwela mu Bukalenge bwà mu Dyulu, kàdi neikalè mwà kwediibwa pambèlu pàdi mbwa nè beena mupongo, nè bikwàbò, nè neikale mwà kukèngeshiibwa nè kapyà nè soufre, mu bwikadi bwà Banjèlò bàà cijila nè Mwàna wa mùkòòkò, bwà kashidi nè kashidi.” Pàtukàmu, wèwè mulunda wanyì! Ditàèke mu bulongàme nè Nzambi! Èyowà’s, mukalenge.

71 Nènku mpindyewu ngànji ngàngatè elu. Èè, netùyumùshè mu njila. Mpindyewu, muntu kampànda mmunkònkè leelù ewu; misangu yibìdi anyi yisàtù mbalùnkonke.

27. Mwanèètù Branham, mu dyakula pa “cìmanyinu cyà nyama wa lwonji,” kwèna wela meeji nè nebàsale nombà kampànda

pa mutù pèèbè apu, anyi bàsàla cintu kampàndà pa cyanza cyèbè aci anyi? To, mukalenge! Kwindidikù aci nànsha.

⁷² Neciikalè dyenzejangana dyà ku bukolè's! Bulelèlà's wè! "Muntu nànsha umwe kèna mwà kusumba anyi kusumbisha pàdiye kàyì wa mu nsangilu wa maèkèleeziyà to." Ncyà bulelèlà. Mpindyewu, necilwe bu didisanga, disangisha dyà cintu aci, bàcitwala mu ntèdeleelu musanga. Kwàtaayi nùfunda, kacyèna kule menemene to! Nenùcimònè, cyòci's cidi ànu lwà mu disangu emu.

⁷³ Cidi cyèza nè kanwèna bamanyè bintu ebi, mbwalu nudi kumbèlu díbà dyònsò. Ndongààiyibi lwà mu matùnga mùdi cyena Kàtòlikè nè bukolèkeshi aa, musangu kampàndà, kàdi nùmonè cidi cyènzekà. Mwanèètù, bàdi bàbàmbila byònsò byà dyenza nè byà dibenga kwenza.

⁷⁴ Kàdi apa Bible ùdi wàmba nè États-Unis, tuvwa bacyàngùle mu ciprofetà, wàkabànda bu *mwàna wa mukòòkò* nè: "budishikaminyi bwà ntèdeleelu," nè dyàkàmwè bààkasanga bintu abi pàmwè, nè yèyè wàkaakula bu dragon nè wàkakwàta mudimu nè bukolè bùmwebùmwebè bwàkadi naabù dragon kumpàlà kwèndè abu. Ke États-Unis d'Amérique awu's! Ncyà bushùwà.

⁷⁵ Mwambi kampàndà wàkangambila ànu àbìdì àdì panshi aa, mulundà wanyì kampàndà, wàmba nè: "Mwanèètù Branham, Nzambi kàadyàkulekelakù États-Unis ùpòna to, bwà bishimikidi byà bankambwa bèndè, bibakila pa ntèdeleelu."

⁷⁶ Mémè nè: "Yèyè wàkalekela beena Yudà; s'ncyà bushùwà nè bàakabàkwàta è kuya naabò, pàabò's bàvwa nè ngimànyinù mwímpè kutàmba wetù bikolè." Ncyà bushùwà. Nzambi kèna ùcyùka lukòngò kampàndà lùkaadi lupite to; anyi udi wenda ulonda mulongo awu anyi udi pambèlu pàà Bukalenge, kwàjiki. Bulelèlà! Aci's ncikolè be, kàdi aci's ncimpè bwèbè wèwè. Ncyà bushùwà. M'Mufundu. Nènku tudi nè, tudi. . .

⁷⁷ Lutàtù mu bwalu abu lùdi nè, leelù ewu. . . Bàmwè bàà kunùdi nwènù beena kale mbamanyè eci. Tudi nè butangadiki bwà cyena Hollywood bwàbùngi be. Ncyà bushùwà. Bupite bùngi be nè cimvundù cyà mutooyi kawùyì kwambangana naawù nè maalu à lukutukutu, dibàlakana nè byònsò byà mùshindù awu abi, nè bèèla bipungipungi, nè bikwàbò; nè: "Nganyì wíkala mwà kujuuka bwà kwitaba Kilistò bu Musùngidi wèndè sungasunga? Nzambi àkubènèshè, mwanèètù wa balùme, uyààya mu Dyulu mpindyewu mene." Aci's mmashimi! Aci's mmashimi!

⁷⁸ "Ànu muntu yèyè mulediibwe cyàkàbìdì!" Nènku yèyè mulediibwe cyàkàbìdì, Dibènesha dimwèdimwè dyàkalwà kùdiye adi nedilwe kùdiye kaaba aka. Nè tudi bakenkète aci, misangu nè misangu, nè ku Mifundu mu lumingu lushààle elu. Nè kujandula nè mu bantu bàà ku Esètè, pàakamatà Nyumà

Mwîmpè pa beena Yudà, civwà bantu bàà ku mubàndu, bàà ku Esètè, Nyumà Mwîmpè wàkamata nè bimanyinu binène nè mamwèneshiibwa. Bible mmwâmbè nè kùvwa mwà kwamba kwikala ci—cikondo civwà kaciyi nànsha mwà kwambiibwa mene to, bu nè mmídimà anyi nditùkù. Civwa bu ditùkù dyà mavuba, ànu nànkù too nè ku citùpà cyà ndekeelu cyà dilòòlò. Nènku pashiishe díbà dívwa mwà kupátuka mu tusuna tukesè ku shòò, dilòòlò. “Nekwikalè Bukênkè ku íbaamulòòlò.” Mmwómò anyi? Èè, abu’s mbantu bàà ku Wesètè, bàà Bisàmbà byà bendè, munkaci mwà kwakidila Nyumà Mwîmpè umwèumwè wàkaakidilabò kùdì beena Yudà kale wàwa awu, nè bimanyinu bîmwèbîmwè abi nè dimwèneshiibwa. Ke cyòci aci.

⁷⁹ Nènku, mu bushùwà bwà bwalu, bantu, bàà pa buloba nebàkwinyikè nè “mukoleshi wa maalu, mumacishe kabwe kàà mu mutù.” Bible, Yesù mmwâmbè nè nebìikale mwà kucyènta. Wèwè’s udi cisàmbà cyà pabwàci, nè udi wa pabwèndè bwalu nCishiilàngàne bikolè be.

⁸⁰ Ndi ncimòna ku mutumba wànyì mèmè mwìnè kwànyì kumbèlù, bantu bàdìku abu. Bòbò, nànsha bàà bàànyì bakesè; tudi tuteeta bwà kubàlama bakezùke nè kwikalabò nè nsòmbelu wa kaneemu nè mwàbò mwònsò, kàdi’s udi mwà kumòna beena mutumba bèbè bènzeja dishiilàngana mu bàà. Nwamònu anyi? Benzeja dishiilàngana.

⁸¹ Nènku ndi mumanyè, ndi nè mùshindù wà kumanya maalu (nè nudi bamanyè nànkù, nukàadi bacimòne mu disangisha), mumanyè nè bampaasàtà bàà mu cimenga bàdi bàmba nè: “Èè, mpindyewu, Billy’s mmwànà wa balùme mwîmpè, katwèna nendè bwalu to. Kàdi, nudi numòna’s, aci’s cidi ànu kasumbù kakesè kashiilàngàne kàà bantu nè citùdì twètù eci.” Nzambi twasàkidila! Ncyà bushùwà. Nzambi twasàkidila! Ke Cimanyinu ncyòci aci. S’ke Cimanyinu citùdì twamba ncyòci aci.

⁸² Tàngilàayi, makèlèlèlè dilòòlò awu, pàakadyànjila kwamba Nyumà Mwîmpè, bidimu nkàmà citèemà kumpàlà kwà beena Yudà kupetabò Nyumà Mwîmpè, nè kubàmbila civwàYe mwà kwikala. “Kalòndò kàà màyi à mufùndu, mufùndi uvwa nè màyi à mufùndu awu kupicilayè munkaci mwà Yelusàlèmà è kutèeka cimanyinu pa mpàlà pààbò.” Ncyà bushùwà anyi? Bààkaakula Bwèndè kumpàlà kwà èkèleeziyà kupiishiibwayè kùdì Nzambi. Ke Tiitùsù kukwàtayè bimanu byà Yelusàlèmà, mu cidimu cyà 96 cyà cipungu cyètù eci, nè kwoshayè cimenga. Nènku kakwàkashàala díbwe nànsha dímwè pa dikwàbò to, bilondèshile ciprófetà. Nè, leelù ewu, cintu cimwèpelè cidibo naaci cishààle cyà ku ntempèlù awu ncimanu cyà kale ciikàle mwaba awu kwakambakajàbo mishikì yà mabwe, nè ciine aci cikaadi cishààle cifinunuja mwaba wùdì beena Yudà bàdila myadi nè bàtwa mikèmu ku Cimanu cyà Myadi, cintu cimwèpelè

cìdi cishààle cyà mu ntempèlù aci. Nè Mosquée wà Omar mmwimàne pa kaaba kàmwekàmwe aku.

⁸³ Ke Yesù kwamba nè: “Bu mwàkaakulàbo kùdi mupròfeta Danyèlè; panùdi numòna cinyangu cìdi cìfila kabùtù ciimàne mu mwaba wà Cijila,” dîbà adi Yèyè mmucyèle kashoonyi, mu tubòkò, “(ewu udi ubala ùmwè.)” Nwamònu anyi? Ncyà bushùwà. Ki cìvwà bwalu ncyôci aci’s. Nènku kulondaYè búngì bwà matùkù. . . misangu yìdìbi mwà kwikala too nè pàdi bàà Bisàmbà byà bendè mwà kwikala. . . cipungu kukòshiihwaci; kwendelabò pa bimanu, pashiishe Nzambi neàlukilè kùdi beena Yudà. Kàdi’s tуди ànu mu cikondo aci! Ke beena Yudà aba munkaci mwà kwalukila, binunu nè binunu, mu ndambù wa bidimu bishààle ebi. Nènku’s nudi bamanye mùshindù wùtùvwa bacìyiile dilòdòlò dishààle, mùshindù wùvwà Mifùndu mu bupwàngàne bònsò. . . byenze ànu bu kubala kwà cibèjibeji kampàndà, nè citàmbe kutòokeshiibwa bikolè bwalu nudi baCìpetèle luumvu lwàbúngì dîbà adi’s.

⁸⁴ Kàdi, nànsha nàнку, Cimanyinu cìvwà cibàtwà pà mutù aci kacìvwà nè nsàlu to. Cìvwà nàнку anyi? Cìvwà ncinyi? Dibàtiiza dyà Nyumà Mwìmpè. Kàdi Cimanyinu cìikalàku bwà ditùkù dyà ndekeelu edi ncinyi? Bible mmwàmbè nè: “Cìtampì cyà Nzambi cìvwà ndibàtiiza dyà Nyumà Mwìmpè, bwà bantu mu ditùkù dyà ndekeelu.” Mpindyewu kakwènakù. . . Efèsò 4.30: “Ke bwà cinyi kanùbungamiji Nyumà Mwìmpè wa Nzambi to unùdi batwìbwe nendè citampì too nè ku ditùkù dyà bupikudi bwènù.” Bible ùdi wàkula. Nè Efèsò 1.13 ùdi wàmba cintu cìmwècìmwè aci, myaba mikwàbò yàbúngì, nè “Nyumà Mwìmpè ke Cìtampì cyà Nzambi.”

⁸⁵ Cìtampì ncinyi? Cìtampì kaciyèna mwà kutwìbwa pa cintu pàdici kaciyi cikùmbànàngàne to. Ba-Luthériens kabààkatwìbwa cìtampì to, ditùkù dyà cipungu cyà ngàsà kadìvwa dikùmbànàngàne to; bàakayiisha dibingishiibwa. Ba-Méthodistes kabààkatwìbwa cìtampì to. Ndi nkafika ku lukonko kampàndà kaaba aka; netùkafikèku pashiishe ndambù—ndambù. Kì mbatwìbwe cìtampì to, bwalu kabìvwa bikùmbànàngàne nànsha. Kàdi dibàtiiza dyà Nyumà Mwìmpè didi dikùmbanangana dyà byenzi byà Nzambi!

⁸⁶ Wàkamba nè “Kùdi bàsàtù bàdi bàfila bujaadiki mu Dyulu: Taatù, Mwànà, nè Nyumà Mwìmpè, nè bàsàtù aba bàdi Umwe.” Kwèna mwà kwikala nè Taatù kùyi nè Mwànà to, nè Mwànà kùyi nè Nyumà Mwìmpè to, bàdi Umwe.

⁸⁷ Yèyè nè: “Kùdi bisàtù bìdi bìfila bujaadiki pa buloba: mâyi, Mashi, Nyumà, nènku kayèna umwe to kàdi bìdi byùmvwangana mu ùmwè,” s’ke byòbò abi, “mu ditwìbwa òmwèpèlè dyà citampì dikùmbànàngàne.” Dibingishiibwa mu Luther, mâyi; dijidiibwa ku Mashi.

⁸⁸ Dibingishiibwa òwà n’Loomò 5.1: “Ki bwà cinyi biikàle babingishiibwe ku diitabuuja tudi nè ditalala nè . . . Nzambi ku Mukalenge wetù Yesù Kilstò.” Dibingishiibwa ku diitabuuja!

⁸⁹ Dijidiibwa ku Mashi, Ebèlù 13.12 nè 13: “Yesù wàkakènga pambèlu paa ciibi bwà Wàmòna mwà kujidila cisambà ku Mashi Endè Sungasunga.”

⁹⁰ Luukà 24.49: “Mònaayi, Ndi ntùma mulayi wà Taatù Wanyi pambidi pèènu, kàdi shààlaayi mu cimenga cyà Yelusàlèmà too nè panwàvwàdikiibwà nè Bukolè bwà mu Dyulu.” Byenzedi 1.8: “Paanyimà pàà cyòci eci Nyumà Mwímpè mumanè kulwa pambidi pèènu, dìbà adi nenwikalè bantèmù Bàanyi mu Yelusàlèmà, Yudàaya, Sàmaalèya, nè too nè ku ntengu yà buloba.” Dibatiiiza dyà Nyumà Mwímpè òwà nè cyà kushàala too nè pàalukilà Yesù cyakàbidi! “Katanci kakesè aka bàà pa buloba kabàakuMmòna kabidi to, kàdi nwènu nenùMmòne bwalu Nèngìikalè neenu, nè munda mwènu mene, too nè ku ndekeelu wa buloba; nwenza bi—bintu bìndi Mèmè ngèza ebi, nenùbyenzè pèènu.” Ku Nyumà Wendè ùkwàcila mudimu mu Ekèleeziyà! Yèyè wàkamba nè: “Nebànwelùlwilè.” Yèyè nè: “Bàakambiikila Mèmè, Mfùmù wa nzùbu nè: *‘Beelèzèbùlà*, “mfùmù wa beena lubùkù,” kwambayè nè: “mmùshindù kaayi mutàmbidile wabengabo kubiikila aba bàà mu nzùbu Mwèndè mpindyewu’s?” Yèyè nè: “Nudi babèneshiibwe pàdi muntu ùnwàmba bintu byà mishindù yònsò, sànkàayi nè ikàlaayi nè disànka dyà diyiila nè panshi, bwalu difutu dyènu ndinène mu Dyulu; bwalu ke mwàkakèngeshabo bikolè bapròfètà bàakadi kumpalà kwènu.”

⁹¹ Aci’s m’Mufundu, nwamònu’s. Ki Cyòci aci. Pa nàнку, nudi numòna’s, bikèngela ànu nwènu kuMupeta, mulundà wanyi. Mpindyewu bikèngela wènzè disungula dyèbè; udi nè nsòmbelu wa budishikaminyi bwà disungula.

⁹² Kàdi’s ke dipetangana ndyòdi adi nè èkèleeziyà wa Mishònyì nè èkèleeziyà wa Kàtòlikè. Bàdi bònsò pàmwè, bilondèshile Bible. . . bàdi bakwàte ànu ku èkèleeziyà nkàayaakù; kí n’Yesù to, mpindyewu, ku èkèleeziyà. Bantu mu èkèleeziyà bàdi mukwàte ku Yesù Kilstò nè bàsambila bwà Nzambi kukangula njila nè kubàvwija . . . kubàpèèsha Bukènkè, bwà nè muntu awu mmusungidiibwe, nànsha yèyè mwikàle wa mu èkèleeziyà kaayi. Ncyà bushùwà. Kàdi yèyè kacya ànu wàkwàta ku dingumba dyèndè, yèyè mmumanè kwangata cimanyinu cyà dipàmbuka, didi munkaci mwà kwangata kaaba kàà dibatiiiza dyà Nyumà Mwímpè. Bibengangane! Nè Kàtòlikè nè Mishònyì, byònsò bibidi mbifwànàngane, Bible ngudi mwàmbe nè: “Yèyè ùwà mukàji wa masandi; bàvwà bandumbà, bàna bèndè bàà bakàji abu.” Aci neitòòke mpindyewu anyi? Eyo.

28. Pa nàнку Mwímpè . . . Nyumà Mwímpè ùcidi ànu

mufidiibwe ku ditentekelangana dyà byanza anyi? Bayiidi baàkenza cyôci eci, Peetelò, Pòlò, nè bakwàbò, kàdi bicidi ànu mwà kwenzeka anyi? Pòlò wàkaMupeta mu mùshindù ewu's.

⁹³ Èyowà's, mwanèètù wa balùme munanga, mwanèètù wa bakàjì, ewu yònsò udi mufunde ka—kabèji aku awu. Kakùyì mpatà to Nyumà Mwímpè ùdi nè cyà kwakidiibwa ku ditentekelangana dyà byanza.

⁹⁴ Mpindyewu, bantu bààbùngì bàtu bàmbiikila nè...bu mùntù mutwibwe citampi cyà nè ndi mwena Mpenta, bàmba mùmvwà mwena Mpenta. Kacya ncitukù wa mu bulongolodi kampàndà bwà cyena-Mpenta to. Kakùyì mpatà to ncyèna muswikiibwe ku malongolodi ónsò aa to, nè ku dikwacisha dyà Nzambi ndi muswè kushààla mùshindù awu, bwalu ndi mwà kwimana ànu munkaci nè kwamba nè: “Twètù's tudi beena muntu! Lwáyi kùnweku, twelàayi nshòòbò.”

⁹⁵ Pangààkatwàdijilakù kale wàwa, ku ngàsà wa Nzambi... Nè nwènù bàdi apa aba, nè túleeleki twányi nè bakwàbò bàdi basómbe apa aba mbamanyè nè, Ndi mwà kupetangana nè bantu miliyò dikùmi, anyi bapite apu, mu buloba leelù ewu. Mbulongolodi kaayi búvwà bufwànyine kubanga's wè! Nwamònu anyi? Ncyà bushùwà. Kàdi mémè ncyèna muswè bulongolodi to, kabwèna bupetangana nè Bible nànsha. Ndi munkaci mwà kuteeta nè mwányi mwónsò bwà kufikisha bantu bàdi mu bulongolodi abu ku disùngidiibwa. Ke cintu ncyôci aci. Nènku bwenzeji bùdi Mukalenge mumpèeshe pàmwè nè bantu abu, ncyà bushùwà nè nènkwate naabù mudimu bwà butùmbi Bwèndè pamutù pàà kubùtèèka pa bulongolodi kampàndà. Nèmbùtèèkè pa Yesù Kilstò mwaba wùdibu bùkùmbanyina. Bulongolodi nànsha bùmwe kabwèna mwà kukusùngilakù to; bikèngela Mashi à Yesù Kilstò.

Kàdi mpindyewu, mu ditentekelangana dyà byanza, mpindyewu, nèngiikalè mwà kupanganangana nè...

⁹⁶ Mpindyewu, nwènù beena Mpenta bàanyi bananga, mpindyewu kanùmbengi to. Kàdi mpindyewu panùdi nukafika bwà kwamba nè: “Netùye bwà kwindila Nyumà Mwímpè,” mwàkù kaayi wùdi wàmbiibwa mu Mpenta's wè!

⁹⁷ Kàdi nèngambè eci nùнку ku cidi...kabiyi bwà kunùtapa ku mwoyi to. Ditwibwà dinène dyà mpàndà dintù naadi mu budimi bwà bwambi's mbeena Mpenta aba, bwalu bàdi biitabuuja mukenji wà dyondopa dyà kùdi Nzambi nè bukolé bwà Nzambi. Bakwàbò bònso abu bàtu bàCidyùla.

⁹⁸ Kàdi ànu bantu-nkààyà bàà mu èkèleeziyà, bàdi badyànjila kulongolwela Mwoyi wà Cyendèlèlè abu, bôbò nebàlwe. Kwàjiki. Kàdi aba bàdi kabàyi nàнку to, kabèèna mwà kulwa to; nè Nzambi mmwambè nàнку, mwambè nè: “Bàvwa badyànjila kulongolwela dipiila.” Yèyè kèna ùjinga bwà ní nganyi àfwe

to, kàdi, bu mùdìYe Nzambi, Yèyè kumòna nè mbafwànyine kuCìpiisha. Pa nànkú ke—ke cyònsò aci's, Yèyè wàkadyànjila kucimòna. Nènku's ke cìdi didyànjila—kumanya dyà Nzambi ncyòci aci, bwà kumòna bintu abi. Kàdi's Yèyè wàkadyànjila kwamba ànu mwaba mene wùvwà Èkèleeziyà mufwànyine kwikala mwimànyine too nè mu ditùkù edi mene. Nè Nzambi wàkacimanya kacya ànu ku cibangidilu aku. Kumpàlà kwà difùkà dyà dyulu nè buloba, Yèyè ùvwa mumanyè nè èkèleeziyà neikalè ànu mùshindù wùdiye leelù ewu. Yèyè ùvwa mumanyè kumpàlà kwà difùkà dyà dyulu nè buloba nè nèngiikalè mwimàne mu cyambilu eci dilòòlò edi. Yèyè's ùdi Nzambi; Yèyè's mmumanyè ndekeelu kacya ànu ku cibangidilu.

⁹⁹ Mpindyewu, mpindyewu, beena Mpenta mbalongèshe. . . Mpindyewu, pàmwàpa byàbùngì nebingaalùkidilè pa Cyòci eci, kàdi ndi nè cyà kwikala nè meeji matòòke piikalàbi nè bìdi bìkèngela bwà mèmè kufika ku Dìyi. Kakùtukù cintu pààci nè “masangisha à dindila to.” Nwènù's nuvwa mu dipanga. Kwindila kí mbwena kwamba nè “kusambila to.” *Kwindila* mbwena kwamba nè “indilà.” Paanyimà pàà dibàndà, paanyimà pàà Yesù Kilistò. . . dipoopediibwa dyà pa nkùrusè, dikezula dyà ntempèlù. Nènku paanyimà pàà Ditùkù dyà Difuta dyà cibawu, dibiikà dyà ku lufù. . . Ditùkù dyà Difuta dyà cibawu, pààkashipiibwàYe, nè pashiishe kwenzekakù matùkù makùmi ànaayi too nè ku dibanda adi, nè pashiishe ke Mpenta. Mwàkù *mpenta* wùdi wùmvwija nè “makùmi àtaanu,” cìvwa cyùmvwija matùkù makùmi àtaanu paanyimà pàà mulàmbù wà Difuta dyà cibawu.

¹⁰⁰ Nè pashiishe paanyimà pàà Difuta dyà cibawu dimanè kulàmbudiibwa, bìvwa bìkèngela bwà cintu cyònsò kupàtukilaci mu mùshindù mupwàngàne, wà ku dileetà ku dileetà, bilondèshile maalu à buloba, cintu cyònsò ànu mùvwà Nzambi mwàmbè amu. Nènku Mpenta, cìvwa ncikondo cyà cyanga, pàvwàbo bàtwàla mamuma à ntwàdijilu à dinowa nènku bàvwa bàtwa cyanga.

¹⁰¹ Mpindyewu, mamuma à ntwàdijilu à—à Èkèleeziyà, Èkèleeziyà wa Nyumà Mwímpè, Èkèleeziyà uvwa nè cyà kushààla bidimu binunu bibìdi ebi too nè pààlwà Yesù apu, mamuma à ntwàdijilu àkalwa ku Mpenta. Cìvwa mmatùkù dikùmi kumpàlà kwà cikondo cyà Mpenta; cìvwa mmatùkù makùmi ànaayi paanyimà pàà dikezula, paanyimà pàà dishebeya dyà mulàmbù awu, too nè ku dibàndà dyà Yesù Kilistò. Yèyè nè: “Ndàayi ku Yelusàlèma nùkindile too nè panwàvwàdikiibwà nè Bukolè bwà ku Dyulu.” Byenzedi 1. . .

¹⁰² Byenzedi 2: “Nènku pààkalwà Ditùkù dyà Mpenta mu kaabujimà, bàvwa bàsanganyiibwa nè dīyi dimwè, mu mwaba ùmwè. Ke dyàkàmwè kufùminakù mu Dyulu cyonà cyenzè bu cipeepèlè cicolè cyà cìvuma, cyàkuuja nzùbu mujimà mùvwàbo basòmbèle amu. Nè bònsò bàvwa buujilwe tètè nè Nyumà

Mwîmpè, nè kubangabò kwakula mu myakulu mikwàbò, mùvwà Nyumà mubàpèeshe mwà kwakula amu.”

¹⁰³ Nè pashîishe batèndeledi, bàvwà pambèlu, èkèleeziyà minène yà ba-Orthodoxes ayi, kujuukabò è kumòna bantu abu bènda bàtetuka nè bènza maalu bu bantu bakwàcike maalà. Ke kujuukabò nè kubàsekabò nè kubèelulwilabò, bàmba nè: “Tàngilàayi musumbà wà beena Ngalèlè ewu’s! Bónsò’s mbakwàcike maalà!” Nudi numòna dyumvwa dibì anyi?

¹⁰⁴ Nènku kùdì mulundà wanyì mwena Kàtòlikè, virgò mubènèshìlbwe Màriyà awu ùvwa naabò pàmwè. Nènku piikalàbi nè Nzambì kàvwa mwà kumulekela ùlwa mu Dyulu kàyi ùpeta Nyumà Mwîmpè nè mwikàle mùshindù awu to, udi wela meeji nè neùkùfikè mu mùshindù kampàndà mushààdile anyi, mwanèètù wa bakàji? To. Pa nàнку tütùulukàayi pa kàbalù kèètù kàà kuulu aku, tütùulukàayi.

¹⁰⁵ Kanùtèyikù ntèmà ku cìdì bàà pa buloba bàmba to. Tàngilàayi ànu cìdì Nzambì wàmba! Eci’s n’Diyi dyà Nzambì. Bidi bikèngela bwà twètù kuciibaka bilondèshile dizòla *edi*, bwalu Yèyè wàkambila Peetèlò nè: “Pa lubwebwe elu Nèngiibakilèpu Èkèleeziyà Wanyì nè biibi byà ifernò kabyàkuMutàmba bukolè nànsha.” Bintu bikwàbò byònsò nebyènzeke. bivwa bileeja nè biibi byà ifernò nebiikalè mwà kuMulwisha, kàdi kabyàkucimuna nànsha. Kàdi bantu bèela meeji nè bàdi mwà kuMwimanyika? S’mbikolè kupita kwimanyika dībà. Ncyà bushùwà. Kwèna mwà kuMwimanyikaku to. Nzambì mmuMutùmine diyì bwà kutungunukaYè.

¹⁰⁶ Mwab’ewu pangàakakùdimunà mucìma dyàmbedi, nànsha mene maamù wanyì *mukwate nè byà luse* udi paanyimà pààpa wàwa kudyàmbidilayè nè mvwa mupâlè. Màmwenàànyì kwambayè nè: “Bivwa bikèngela kumutùma ku lùpitaadi lwà babùlùke.” Bayiishi bàà mu cimenga kwambabò nè: “Kapyà kèndè nekàjimè ànu àbìdì aa.” Ki mèmè ewu munkaci mwà kulàkuka kapyà kùkaadi ntàntà mule. Ndilàkuka dyà nyumà, dyènda ditàmba kulengela dībà dyònsò. Bwà cinyi? Kadyèna mwà kubùtuka to, Cìdì n’Nzambì! Pamutu pàà kubùtuka, n’Dítangalaka pa buloba bujimà mpindyewu.

¹⁰⁷ Ànu cintu cìmwècìmwè cyàkambàYe pàmvwà mbàtiizà ku Musùlù wà Ohio eku, bààbúngì bàà kunùdì bàvwa biimàne mwaba awu, kùkaadi bidimu makùmi àbìdì nè bisàtù, ànu ku Musùlù wà Ohio eku. Bukènkè abu, Mwanjèlò, kupweka too nè ku mwaba wutùvwà tusanganyiibwa awu, wàmba nè: “Ànu mùvwà Yone Mubàtiji mutùmiibwe bu mudyànjididi wa Dilwa dyà kumpàlà dyà Yesù Kilistò amu, Mukenji wèbè newùtwale Dilwa dyà Yesù Kilistò diibìdì.” Nè ki cìdìwu mwenzè. Cìdì. . . Yèyè kí mmwanjì kulwa to, kàdi tàngilàayi cìdìwu mwenzè, mmutangàlake buloba bujimà, myaba yònsò. Nwamònu anyi?

Nènku leelù ewu patùdi twakulangana apa, anji elàayibi ànu meeji, nè di—didyenzeja didi dyenzeke, s'kùdi miliyò ànu yà cyà bushùwà eyi.

¹⁰⁸ Nànsha mene cibèjibeji cyà Kàtòlikè cyà *Mwenyi wa Dyàlumingu* aci ncibwákùle, bwà búngi bwà miliyò yìdì mibwele eku nè eku, ànu bwà didyenzeja.

¹⁰⁹ Bakwàbò bàdi bùmvwà, bàmba nè: “Aci’s m’Bulelèlà! Ndi mudilongolole bwà kusùmbisha byònsò mpindyewu mene, bintu byà pa buloba ebi, nè kuya kayiisha Èvànjeeliyò mulelèlà ewu’s.”

¹¹⁰ Nènku ke bwà cinyi bàdi bàtùbiiikila nè “Èvànjeeliyò mu kaabujimà,” bàdi bèelulwila Èvànjeeliyò mu kaabujimà. Kàdi, mwanèètù, ncitu muswè ànu citùpà cyà ní ncinyi to, ndi . . . bikèngela ciikalè cintu cyònsò mu kaabujimà, bwànyi mèmè. Piikalà citùpà Cyàci ciikàle cìmpè, bikwàbò byà Cì abi’s mbìmpè. Èvànjeeliyò mu kaabujimà’s!

¹¹¹ Mpindyewu, mònaayi nè, Nyumà Mwìmpè wàkaalukila mwaba awu. Beena Mpenta bààkindila nè: “Ke dyàkàmwè kuntwanku kulwakù cyonà cifùmina mu Dyulu cyenzè bu cipeepèlè cikalè cyà cívuma, kuuja nzùbu uvwàbò basòmbèlemu awu.”

¹¹² Musangu nànsha ùmwè paanyimà pàà aci kabyàkàkèngela bwà bóbò kwindila to. Pàcìvwà ànu Peetèlò wàkula Mèyi aa nè bàà Bisàmbà byà bendè, Nyumà Mwìmpè wàkapweka pambidi pààbò, kumpàlà mene kwà kubàtijiibwàbò. Ncyà bushùwà anyi? “Pàcìvwà . . .” Byenzi 10.49 . . .

Kàdi pàcìvwà ànu Peetèlò wàkula mèyi aa apu, Nyumà Mwìmpè wàkapòna pa . . . aba bàvwà bumvwè òyi abu.

Nè aba bàà ku batengula . . . bààbùngi bwònsò bàvwà balwè nè Peetèlò abu kukèmbò, bwalu . . . pa bàà Bisàmbà byà bendè . . . pààkiicikijibwa dipà dyà Nyumà Mwìmpè.

Bwalu bààkabùmvwa bààkula mu myakulu, nè bàtùmbisha Nzambì. Pashìshe Peetèlò kwambayè nè:

Muntu ùdikù mvà kukàndika máyi, pa kumòna nè aba bàvwà nè cyà . . . mbààkìdìle Nyumà Mwìmpè mutwàkapetà ku cibangidilu amu anyi?

Nènku yèyè kujàngulukakù nè kubat- . . . kutùma òyi bwà kubàtijiibwàbò mu òinà dyà Yesù Kìlistò! . . .

¹¹³ Ncyà bushùwà; kakuvwa dindila to, kakuvwa byà dijànguluka to. Mùshindù wà bàpostòlò, Nzambì kàvwà nè mukenji mutèeka to; pàdi ànu mwoyi nè nzala, Yèyè neàkupèeshe cyùdi mumvwile nzala aci. Wèwè muswè Nyumà Mwìmpè, Ùdi mwà kwà pambidi pèèbè mpindyewu mene.

¹¹⁴ Peetèlò, pààkapwekàye bwà kayiisha, Peetèlò nguvwa nè nsapì yà Bukalenge. Ndi nè lukonko lungàfikèku pa cyòci aci mu

tusunsa tukesè emu. Yéyè nguvwa nè nsapi yà Bukalenge. Yéyè wàkaMukangula ku nzùbu kwà Kòneeliyò. WàkaMukangula, kùdi beena Sàmaalèyà kwàka, yéyè kuMukàngula lwà apa nùnkù ewu; kàdi nwávùlukaayi nè Filipò ùvwa muyè kuntwaku nè mubàyiishe nè mubàbàtùize mu Dinà dyà Yesù Kilistò, ke Peetèlò kupwekayè nè kubàtentekela byanza. Nènku, mpindyewu, yéyè wàkenza cintu kampàndà, bwà mwena màjìmbu uvwa kuntwaku awu. . . Bààkadi nè Simonà mwena màjìmbu, kwambayè nè: “Nènkupèèshè ndambù wa mfrangà, bwà wèwè kumpèèsha Dipà adì, bwà nè ewu yònsò úndi ntentekela byanza àpetè Nyumà Mwímpè.” Ncyà bushùwà anyi? Cintu kampàndà cyàkenzeka’s! (Kí ngumwè wa ku bèepiskòpò bàà kumutù aba nè nshingù wa nkoolù mutàngija paanyimà, ùlwa mwaba awu ùbàtentekela byanza, wàmba nè: “Ndi nnùpèèsha dibènesha dyà bàpostòlò” to.) Cintu kampàndà cyàkenzeka pààkabàtentekela Peetèlò byanza; nè pàdibo kàbidi bacyènza.

¹¹⁵ Nkàadi mubàmòne bàkùluka ànu bu njiji mùshindù ewu, pàdi Nyumà Mwímpè ùbàlenga, ku dibàtentekela dyà byanza. Èyowà, aci’s ndi—ndilongesha dyà bàpostòlò dyà ditentekelangana dyà byanza. Nzambì àkubènèshè. Pawikalà nè mmwènenu mushiilàngàne ndambù nè cyòci aci, ùmfùndileku ànu kabèji màalabà dilòòlò. Eyo.

29. Pùikalàbi nè byàbisàtù bibidi byà bantu bàà pa buloba mbuumvwe . . . kí mbànji kuumvwaku Èvànjeeliyò to, Diyì dyà Èvànjeeliyò, mmùshindù kaayi wùvwa . . .

Mfwilaayikù luse. Ncifùnda nè màyi à mufùndu, nènku ndi munkaci mwà kukòpakana mwab’ewu nè cisùlùlù ncimacilepù. Tùmònèbi.

Pùikalàbi nè byàbisàtù bibidi byà bantu bàà pa buloba kí mbanji kuumvwa Èvànjeeliyò to, mmunyi mùdi Mukalenge wetù mwà kulwa mpindyewu, bu mùdibi nè bôbò kí mbúm vwe Èvànjeeliyò, byàbisàtù byàbò bibidi bijimà?

Èè, aci’s ncyà bushùwà menemene. Nènkwbambilè cìndi mèmè ngèèla meeji.

¹¹⁶ Mwaba ewu ànu matùkù mashààle aa, pàvwà Docteur Reidhead, Mfùmù wa Mission Soudanaise, cyà citàmbe kuujiibwa . . . cyà cìpostòlò citàmbe bunène . . . To, mfwilaayikù luse. Mission mishindàme mitàmbe bunène mu buloba, Mission Soudanaise. Docteur Reidhead, nè mapòlomè àbùngì mu mùshindù wà kàyiku nànsha mumanyè nè mmapòlomè bùngì kaayi àvwà pambidi pèndè to, kulwayè kwànyì kumbèlu kwàka, kùkaadi cìdimu cijimà nè ngondo yisambòmbò cimanè kupita ndambù. È kwimanayè mu nzùbù mwànyì, yéyè nè Hyman Appleman ewu, mwambi wa ba-Baptistes ewu udi mupetè Nyumà Mwímpè mpindyewu nè mwikàle munkaci mwà kuyiisha mu Mexique mwàmwa. Ke kulwayè kwànyì. Yéyè

nè: “Mwanèètù Branham,” mwàkambàye, “utu upetangana nè beena Mpenta anyi?”

Ke mèmè nè: “Èyowà’s, mukalenge.”

Ke yèyè nè: “Mèmè ndi Docteur Reidhead.”

Mèmè nè: “Ndi nè disànkà dyà kukumanya. Udikù mwà kubwela anyi?”

Yèyè nè: “Èyowà’s, mukalenge.”

117 Kusòmbelayè panshi, kwamba nè: “Ndi muswè nkukonkèku cintu kampàndà.” Yèyè nè: “Ndi ngumvwa nè wèwè ewu uvwa mujidiibwe mu èkèleeziyà wa ba-Baptistes.”

118 Mèmè nè: “Ncyà bushùwà.” Mèmè nè: “Ndi mupàtùkemù,” mèmè nè, “bwalu ncivwa mufwànyine kutwàla aci to. Mèmè—mèmè ndi ngiitabuuja bwà kuyiisha cidì Bible wàmba, kî ncidi èkèleeziyà wa ba-Baptistes wàmba to. Nè mèmè ncyèna cilumbù nè èkèleeziyà wa ba-Baptistes to, bàdi ànu bimpè mùdi èkèleeziyà mukwàbò kanà yònsò ewu amu.” Ke mèmè nè: “Ndi mupàtùkemù bwà ngaamòna mwà kushààla mudìshikàmìne.”

Yèyè nè: “Èè, mu bushùwà bwà bwalu, s’udi mumanyè nè twètù tudi ba-Baptistes.”

Ke mèmè nè: “Èyowà’s, mukalenge.”

119 Ke yèyè nè: “Ndi muswè nkukonkèku cintu kampàndà. Kàdi bishi bwà dibàtiiza dyà Nyumà Mwîmpè edi?” Yèyè nè: “Ndi mubwelemù nè mubàmòne bàbùnguluja nkwasà nè bàtwa mikùmà panshi nè bèèla mbilà nè bènza maalu à lukutukutu.”

120 Mèmè nè: “S’nkaadiku mumònemòne byònsò abi, mèmè pàanyi.” Kàdi mèmè nè: “Mwanèètù, paanyimà pàà byònsò abi, kùdi kantu kalelèlè nè kashuwashùwàlè kàà dibàtiiza dyà Nyumà Mwîmpè.”

121 Ke yèyè nè “Mwanèètù Branham, ndikù mwà kuMwakidila anyi?” Yèyè nè: “Ndi nè buneemè bùngì cyanààna!” Yèyè nè: “Mèmè ndi Docteur, ndi *cikampàndà*, ndi nè Dipòlomè dyànyì dyà Ph.D., ndi nè Dipòlomè dyànyì dyà Licencié, ndi mupetè mùshindù wònsò nè dipòlomè nè màpòlomè nè buneemè à mu matùnga ònsò, nè bintu byà mùshindù awu,” yèyè nè, “kàdi Yesù Kilistò ùdi penyì?”

122 Mèmè nè: “Èè, mwanèètù, Yèyè’s ùdi kaaba aka mene mu cibambalu emu.”

123 Yèyè nè: “Mèmè kwimana nè kuyiikila nè Mùzùlùmanyi wà lulamatu wa menemene, mwikàle ànu mulongèshìibwe mu Àmèrikè, ke mèmè kwamba nè: ‘Bènga mupròfetà webè wa kale mufwè awu bwà wàkidilè Mukalenge Yesù mubiishìibwe ku lufù.’ Yèyè nè: ‘Mukalenge wa musàngèelu, ncinyì cidì Mukalenge Yesù mubiishìibwe ku lufù ewu mwà kungenzela kutàmba cidì Mùhamàdi wanyì mufwànyine kwenza?’ Yèyè nè: ‘Bònsò bàbìdi bàakafùnda Bibles, tudi tucìitabuuja.’ Yèyè

nè: 'Bònsò bàbìdì bààkafwà.' Ke yèyè nè: 'Nè bùbìdì bwàbò bònsò mbalayè mwoyi paanyimà pàà lufù, kutùdì, nè tudi tucìitabuuja.'"

124 Yèyè nè: "Kaa, kàdì, udi umòna's," yèyè nè, "twètù beena Kilistò's tudi nè disànkà."

125 "Yèyè nè: 'Ke mutùdì pèètù's.' Yèyè nè: 'Mémè ndi mwà kupàtula bintu byà mu meeji búngì cyanààna ànu bu nwènu.'"
Nènku aci's ncyà bushùwà. "Yèyè wàkamba nè: 'Èè, tàngilàayi, Mùhamàdì wetù. . . Wèwè's uvwa mwambè mùvwà Mukalenge wenù Yesù mubiishiibwe ku bafwè.'"

126 Ke Docteur Reidhead kwambayè nè: "Mòna's, Yèyè's wàkabiishiibwa!"

127 "Yèyè nè: 'Cijaadikaaku!' Yèyè nè: 'Cijaadikè's!' Yèyè nè: 'S'nudi bapetè bidimu binunu bìbìdì bwà kucijaadika, kàdì's ànu bàà pa buloba batwè ku cyàbisàtù cìmwè ke cikaadi cyúmvwè bwà bwalu abu.' Yèyè nè: 'Mùhamàdì wetù àdìdìngèbì àbìikè ànu ku bafwè nènku buloba bujimà nebùcìmanyè munda mwà matùkù àbìdì cyanààna.'"
Yèyè's mmubingè. "Yèyè kwamba nè: 'Mùhamàdì wetù kacya kàtukù mutùlayè cintu nànsha cìmwè to ànu mwoyi paanyimà pàà lufù.' Yèyè kwamba nè: 'Mukalenge wenù Yesù mmunùlayè, nè nwènu balongeshi, nè bintu mene byàkenzàYe abi nuvwà pèènu mwà kubyènza.' Ke yèyè nè: 'Tùmònèbì nwènu balongeshi nubileeja mpindyewu, nè,' yèyè nè: 'netwitabuuje nè Yèyè mmubiike ku bafwè.'"

128 Yèyè nè: "Mwanèètù Branham, mémè kàdì kujiika dikàsà dyànyì mu lupwishi mùshindù *ewu* nè kushintulula cyena-bwalu aci." Nè màpòlomè ònsò awu! Bwà cinyi? Nzambì wèpì mu màpòlomè awu's? Kabàtu bàmanyina Nzambì ku Ph.D., nè ku D.D., nè ku L.D., nè bikwàbò to.

129 Nzambì ùtu ùmanyikila ku diitabuuja dipwekèlè, ku dibàtiiza dyà Nyumà Mwìmpè. Ke mùshindù wùmwèpelè ngwòwò awu. Nzambì munda mwèbè, too nè pàdìYe ùkuvwija "mwànà wa Nzambì," ùshintulula ngiikàdìlù webè. Nè cintu ànu cyòcì cìmwècìmwè aci, Nzambì Mufùki Wàkenza bintu byònsò nè kwakula bwà buloba bwikalèku ku Díyì Dyèndè, Nyumà umwèumwè udi munda mwèbè awu, udi witabuuja byònsò bìdì Nzambì wàmba. Nènku kakwèna cintu nànsha cìmwè cidì kaciyi mwà kwenzeka to; udi uCìitabuuja.

130 Kwèna ushààla mwimànyìne lwà paanyimà ku twitabàayi mukèsè umwèpelè nè kwamba nè: "Ncyèna, ncyèna mwà kwitaba Aci to. Ncyèna mwà kwitabuuja nè Nzambì neènzè cyòcì eci to. Ncyèna mwà kwitabuuja to." Udi welela Nzambì mikàlu ku bupidyà bwèbè's! Ke cyòcì aci's.

131 Ke Docteur Reidhead kwimanayè mwaba awu, kwambayè nè: "Mwanèètù Branham, muntu mmufwànyìne kwakidilakù, cyà bushùwà, Nyumà Mwìmpè anyi?"

132 Mémè nè: “Èyowà’s, mukalenge, Docteur Reed- . . . , udi mwà kwenza nànkù.”

133 Yèyè kwamba nè: “Piikalàbi nè Nzambi mmumanyè mwoyi wànyì; nè mémè ndi nkwitabuuja, mumanyè nànkù; nè ku disonsodiibwa mpindyewu mene, ndi muswè bwà wèwè. . . Udi witabuuja nè ndi ngàmba bulelèlà anyì?”

Mémè nè: “Ndi mumanyè nè udi wamba bulelèlà!”

Yèyè nè: “Ndi nè cyà kuMwakidila munyì?”

Mémè nè: “Twà binù.”

134 Ke kutwàye binù mwaba awu ku luseke lwà mèèsà à kàfè. Mvwa ànu mfùma kudyàmbula kuntwaku. Muntu awu mmusòmbe paanyimà pààpa udi ufùma ku diàlongolola kuntwaku ànu mu katancì emu. Musòmbe mwaba awu, mushipè lumwènù lwà kumutù kwàwù aku bu mùvwàye mutwè binù panshì apu. Yèyè nè: “Nzambi, ikàlàku luse nè musùukà wànyì mubiipe ewu’s.” Ke mémè kumutentekela byanza, nè dibàtiiza dyà Nyumà Mwimpè kulwadi pambidi pèndè mwaba awu mene. Ncyà bushùwà.

135 Nè yèyè mmulàkushe èkèleeziyà wa ba-Baptistes awu nè kapyà myaba yònsò mpindyewu, bwà bònsò bàdi mu nyungulukilu amu abu. S’ki cyòci aci. Èyowà’s, mukalenge.

136 Èvànjeeliyò kèna mwà . . . Yesù kèna mwà kulwa pàcidi . . .

137 Tèelejàayi’s! Tudi bendèshe tukàndà twà dibala eku nè eku pa buloba bujimà. Kwèna mwà kuya mu disangu kanà dyònsò dikesè kuyi usangana tukàndà twà dibala etu twabanya to, muntu kampàndà ùpicila mwaba awu nè tèòlòjì. Uyààya dyàmwàmwà dyà mbù leelù ewu wenda udibiikila mùdi “mpàndànjlà,” nènkù bàtàngile mùdibo bàkuseka. Bwela mu Inde wàmbe nè: “Mémè ndi mpàndànjlà.”

138 “Èè, cyùdi muswè kutulongesha ncinyi?” Bòbò mbamanyè byàbùngì pa bìdi bitàngilà Bible kutàmba . . . Bàmwè bàà ku bàna bààbò balela kuntwaku mbacimanyè kupita nè mùdi bàmwè bàà ku balongeshi bààbò munwemu mu Àmèrikè bacimanyè. Twamb’eku twamb’eku, m’Mukàndà wà ku Esètè. Nènkù, vùlukàayi nè, bòbò bàvwa nè Èvànjeeliyò mu nkàmà nè nkàmà yà bidimu kumpalà mene kwà Àmèrikè kwikalakù. Toomààsè Munsantu, èkèleeziyà munène mùvwàye ùyiisha amu, ùcidi ànu mwimàne leelù ewu mu Inde. Kabèena dijinga nè dilongesha dyèbè nànsha dimwè to, mbadimanyè dyònsò. Bòbò nè: “Ciwàtulongeshà ncinyi?”

“Èè, twétù’s tudi bampàndànjlà bàà mu Àmèrikè.”

139 “Ciwàtulongesha ke cinyi, mùshindù wà kunwà maalà à wiskì anyì? Aci’s ke cinùdi bònsò nwenza kwènù aku mu èkèleeziyà yènù’s! Kunwà mfwankà? Neùtulongeshe mwà kushipa dibakà nè bakàji bèètù, nè bikwàbò?” Yèyè nè: “Wèwè mwenze nànkù, katwèna baswè aci to.” Ke yèyè nè: “Neùlwe

munwemu emu nè tèòlòjì kampàndà mupyamùpyà anyi cintu kampàndà cikwàbò, neuteetè bwà kutùlongesha ndambù wa Dìyì, tudì bamanyè byàbùngì pa bwalu abu kukutàmba wèwè.” Nènku aci ncyà bushùwà. Yèyè nè: “Kàdi wèwè ulwa bwà kuleeja patòòke cidi Dìyì dyàmba aci, netùCyākìdìlè.” Amen! Ki bwalu mbwòbù abu’s. Ke cintu cidìbo naaci nè nzala ncyòci aci.

¹⁴⁰ Fùndaayi Dìyì dyànyì, Dìfùndaayi mu mabèjì ènù à Bible wenù amu, bwalu Cidi EMU MMÜDÌ MUKALENGE WÀMBA, “Vùlukàayi nè, patwàtwà makàsà mu Inde, nenumvwè nè bantu binunu makùmi kuvudija ku binunu mbasùngìdiibwe.” Nyumà Mwìmpè ngudi muCyàmbè. Ndi muCifunde mwab’ewu mu Bible wanyì emu. Ncifundiiibwe mu binunu makùmi byà Bibles kaaba aka mene, bu mùvwà dibìika dyà ku lufù dyà mwànà mukesè wa balùme awu, ku cikèènà-kumòna cyākambàYe aci. “Bàdimù binunu nkàmà yisàtù.” Kàdi nùmonè ní kí ncilelèlè’s! Ke mùshindù wikalà Èvànjeeliyò nè cyà kuyiishiibwa ànu leelù nè màlaabà. Yèyè neàtàngalakè ànu mùshindù awu, ku mwaba nè ku mwaba.

¹⁴¹ Mu Àfrikè mwàmwa, mùvwà binunu makùmi àsàtù abi mu dibìikila dyà ku cyoshelu ànu òmwèpelè cyanàànà baakidile Nzambì, mèmè kwamba nè: “Elàayi byanza byènù muulu nùpetè Nyumà Mwìmpè.” Mèmè nè: “Kanwindidi bwà mpàndànjàlà kampàndà wa cyena Àmèrikè kulwayè mwab’ ewu bwà kunùlongesha mwà kuyiila myakulu mu maèkèleeziyà to.” Nè baamaamù bàsukwila bilàmbà pa mabaya, bwà kutùma mpàndànjàlà kuntwaku nè kunyùnguluka eku nè eku mu kàshinyì kampàndà kanène kalenga, basòmbèle mu buloba bwà maanyì abu; bushùwà, kwabanya ndambù wa tukàndà twà dibala nè kwalukila. Kí mbaswè aci to; ncicijaadike.

¹⁴² Mèmè kwamba ànu munwemu emu mu Lùpitàadi lwà beena Yudà amu, kwàpici ndambù wa malòòlò mu disangisha nè bambi nè ba-docteurs, pa cyena-bwalu cyà dyondopa dyà kùdi Nzambì; mèmè kwamba nè: “Nudi bambiikile mùndi munsantu mubùnguluki wa mu malaba, nè nwnènù wākamba nè mvwa mupete cilòòtálòòtà pàmvwà munwàmbìle. . .Mwanjèlò wa Mukalenge.” Ke mèmè nè: “Nè èkèleeziyà wetù sungasunga mmutùme binunu nè mmutùulè miliyò yà ndola, bwà kutùma bampàndànjàlà mu Àfrikè; nènku pàngààfikì kuntwaku aku, bàvwa bambùle tupingù tukèsè twà diima, bàteeta bwà kupetela dikwàcisha ku lupingù lwà diima alu, kàdi kudibìikila mùdìbo ‘beena Kilistò.’” Ke mèmè nè: “Kàdi ciwākabiikilà nè ‘ndikolesha dyà maalu’ aci cyàkapetela Kilistò misùukà yàbùngì mu tusunsa tùtaanu’ kutàmba byàkenzà miliyò yètù yà ndola nè binunu byà bampàndànjàlà mu bidimu lukàmà nè makùmi àtaanu bishààle ebi.” Bààkakànga mukana, ke cìvwàci aci’s! Ke cyòci aci cyadija. Mèmè kunwàmbila, bòbò bantu abu, mèmè kwamba nè: “Kanùdìdingì—kanùdìdingì kuteeta bwà kulonga tulaasà to, angàtaayi ànu Èvànjeeliyò nè nutùngunukè nùye

kuntwaku mu—mu bitùpà byà malaba byà beena kalaba abi mùdi muntu mutòòke kàyì nànsha mwà kuya to, bwà màsaamà.”

¹⁴³ Ndi nè majaadiki, ànu àà mu cibèjibeji cyà mu Durban mwàmwa, cyàmba nè: “Nànsha muntu mukùlakàji umwèpelè awu kàvwakù mwà kumanya nè cyaana cyà dyàbalùme nè cyà dyàbakàji ncyépi to, wàkapeta dibàtiiza dyà Nyumà Mwimpè, nè ùvwa ùbàtiiza bantu biipacila ku cinunu cijimà ku lumingu.” Awu’s ke mùshindù wùdi Èvànjeeliyò wènda ùya, ànu mu katanci kakesè, bidi biMukèngela ànu ngondo mitwè ku yisambòmbò bwà kutwangana buloba bujimà. Eyo.

30. Udikù mwà kumvwija bwà bwalu bwà—bwà Science Chrétienne anyi?

¹⁴⁴ Eyo. Ndi . . . Mòna’s . . . Ncyàkwakula bwà ntèndeleeleu webè to, mwanèètù wa balùme anyi wa bakàji, ewu yònsò wudi mwèlè lukonko awu. Science Chrétienne cidi ànu ndilonga dyà nsòmbelu. (Nè dyondopa dyà kùdi Nzambi mbukolè bwà Nzambi!) Science Chrétienne ùdi nè meeji kumutù kwà bintu; Science Chrétienne ùdi ùvila Mashì à Yesù Kilistò. Science Chrétienne . . . Kaa, ndi nè mikàndà yà Màndàmù Eddy kuntu kwàka, nè muyibalè yònsò. Nwamònu anyi? Ncyà bushùwà, Science Chrétienne ùdi ùvila Bunzambi bwà Yesù Kilistò, nè ùMutèeka “mupròfeta.” Yesù Kilistò kàvwa muntu to; Ùvwa Nzambi! Ùvwa Nzambi! Nènku bàdi bàdyàmbidila nè mmeeki pa bintu.

¹⁴⁵ Tukùlakàje twòtù tunkwàte ku dibòkò dyànyì anyi mu cifù cyànyì, anyi mu . . . anyi bisaamà mu mutù wànyì, ndi nè luumvu búngì bukùmbàne bwà kumanya nè wùdi wùsaama, nènku kì nnè ndi ngèèla meeji nè wùdi wùsaama to. Kàdi ndi mumanyè nè bukolè bwà Nzambi bùdi mwà kucyùmusha, kì mbwànyì . . . mèmè ngèèla meeji pa bwalu abu. Nwamònu anyi? Pa nànkù, Science Chrétienne, ndi mwà kwamba eci pàmwè nè cikwàbò cìvwa cinkonka aci, nkàmwè kàà ku tusùmbù twà ditùkù dyà cyaana-leelù, nè cilèmà cyà ndòndò, cyà mifitù. Ncyà bushùwà. Ncyèna nkutàpa ku mwoyi to, mulundà wanyì, yònsò udi mucifunde awu, kàdi ndi nè cyà kwikala nè meeji matòòke. Bwalu wèwè udi mucifunde ewu, nè mèmè, pàmwè neebè, netwìmanè dngà ditùkù mu Bwikadi bwà Yesù Kilistò bwà kulumbulula, nènku nebikèngelè bwà mèmè kulumbulula bwà cìndi ngàmba aci. Mpindyewu, ncìvwa mwà kwandamuna ncìyi mumanyè to. Eyo.

31. Mpindyewu: **Patùdi . . . Patùdi basòmbèle kule nè mwaba ewu bwà kulwa mu . . . Tudi basòmbèle kule nè mwaba ewu bwà kulwa mu tabernacle emu. Mpenyi paùdiku utùfunkwina bwà twètù kuya, bwà kudisangisha pàmwè, bu mùdibi nè èkèleeziyà yidi yilonda èkèleeziyà maamù, anyi, wa bwena Kàtòlikè?**

146 Mwanèètù wa balùme munanga anyi mwanèètù wa bakàji, ewu yònsò udi mulùfunde awu, ncyèna mwà kukwambila nè ng'èkèleeziyà kaayi wa wèwè kuya to. Kàdi cìndi mufwànyine kwenza, ncyòci eci, mwanèètù wa balùme, mwanèètù wa bakàji, ndi... Pawikalà kùyi nè dibàtiiza dyà Nyumà Mwìmpè to, nwamònu's, èè, anji petà wèwè dibàtiiza dyà Nyumà Mwìmpè nè pashiishe ùye mu disangisha kampàndà mùdi bakwàbò bantu biikàle nè dibàtiiza dyà Nyumà Mwìmpè. Udi nè... nudisangisha nè bantu bàà mùshindù awu's!

147 Nkaadikù mumòne muntu kampàndà, mwab'ewu ànu matùkù mashàale aa, uvwa mulediibwe kùkaadi bidimu dikùmi ùvwa... anyi, kí mmulediibwe to, mfwilaayikù luse, kùvwa bidimu kacya kùvwàye kàyi ùmòna to. Ùvwa wa mu èkèleeziyà kampàndà munène, nè ùvwa musòmbèle ku Kennett, mu Missouri. Nè wàkadi nè... yèyè wàkadi—wàkadi mutedi wa bisàbaatà kukaadi bidimu, kàdi ùvwa mpofo. Ke muntu awu kulwayè pa cibùmbà cyà ku cyambilu, nè Nyumà Mwìmpè kumwambilayè nè yèyè ùvwa nganyì nè cìvwà cìmutàcisha, kumwambila bule bwà cikondo cìvwàye mpofo, nè kumwambila bwà cyenzedi cikesè, cyà bukooya cyàkenzàye. Kwambayè nè: “Bu Nzambi mwà kundekela nè mwoyi bwà kufika kuntwaku, nèncilongòlòlè.” Nènku, pàakambàye nànkù, mèsù èndè kukàngukawù; nè Bible umwèumwè mene ewu, kuMubalayè ku nshapità nè ku nshapità.

148 Kwalukilayè ku èkèleeziyà wèndè mwikàle ùfila butùmbi. Ke mpaasàtà kumwambilayè nè: “Bìvwa mwà kwikala byenzèke nànsha bishi. Mòna's, wèwè's uvwa ànu musalùke cyanààna, kakùvwa cintu nànsha cìmwè pa bwalu abu to. Kakwèna cintu nànsha cìmwè ku cintàkanyì aci to, ncyà dyabùlù!”

149 Ndi ngèèla ní nganyì ní nganyì kadyombo bwà kundeejakù Mufùndu wùmwèpelè mùdi dyabùlù mwà kwondopa. Bu wèwè mwà kundeeja mwaba wùdi dyabùlù mwà kwondopa, nènjaadikè nè dyabùlù ke tatwèbè; ncyà bushùwà, bu wèwè mwà kwenza nànkù. Kacyèna mu Mèyi à Nzambi to. Kacyèna mwà kujaadikiibwa to. Nènku udi mufwànyine... udi mwà kujinga kuciteeta, citeetaaku's. Kàdi aci bàakatwilangana naaci kùdi bèèpiskòpò nè bikwàbò byònsò, mwanèètù, pa nànkù kwambi nànkù to.

150 Tàngilàayi! Nènku muntu umweumwe awu, mu mwoyi wèndè, kubangayè kucitabuuja. Nènku paanyimà pàà ngondo yisàtù ùvwa ùsanganyibwa mu masangisha àanyi, ànu mpofo mùvwàye dyàmbedi amu. Ke bwalu abu's.

151 Pa nànkù shààlaayi pambèlu pàà tusùmbù atu! Disangishaayi nè muntu kampàndà udi witabuuja, nùdisangishè. Bible mmwàmbè nè: “Kanùdiswiki mu cikòkedi cìmwè nè beena bupidyà to.” “Ikàlaayi batàpùluke,” mmùdi Nzambi wàmba. Pàtukàayi's! Bible mmwàmbè nè: “Pàtukàayi

munkaci mwàbò, nè ikàlaayi. . . kanùlengi bintu byàbò bibiipe abi to, nènku Mémè nènnwákídilè. Mémè ndi Mukalenge Udi mwimàne munkaci mwà èkèleeziyà awu.” Ncyà bushùwà. Pátukaàyi! Kanùdisangiku nè byà nàнку awu to!

¹⁵² Kàdi lekèlaayi. . . bwelàayi munkaci mwà èkèleeziyà kampàndà, èkèleeziyà kampàndà mwimpè. Ba-Méthodistes, ba-Baptistes, ba-Presbytériens, ba-Campbellites, nànsha yéye mwikàle nganyi, kacyèna cyènta. . . Mùdi beena kwitabuuja balelèlè bàà menemene bàsanganyibwamù amu, kabèèna bàcyùka cidì twitabàayi wa èkèleeziyà wàmba to, bàdi bàya kuntwaku bwà katwilangana nè bàna bààbò bàà balùmè nè bàà bakàji bwà kukuukwila Nzambi, pàmwè. Èyo.

32. Dilòlò dishàale uvwa mwakùle bwà “musùmbà munène wùvwà muntu nànsha umwe kàyi mwà kubala to, bàà mu cifuku cyònsò, ditùnga dyònsò,” bàdi – bàdi batèèdiibwe mu nshapità wa 7 wa Bwàkabuulwibwà. Mvwakù mukuumvwè, mu mùshindù mujaalàme, bwà kwamba nè “Bàdi Mukàji-musèla wa Kilistò anyi”? Èyowà, udi mungùmvwè. Bàdi Mukàji-musèla.

¹⁵³ Mpindyewu bu nwènu mwà kumòna, ànu menemene mu Bwàkabuulwibwà 7, yéye wàkamòna binunu lukàmà nè makùmi ànaayi nè binaayi abi. Mpindyewu, ncyèna nkupiiisha bwà cyòci eci to, mwanèètù wa balùme, kàdi lukàmà. . . Pa ciibidilu Ntèmù wà Yèhowàh ngudi witabuuja nè binunu lukàmà nè makùmi ànaayi nè binaayi nebiikalè Mukàji-musèla. Kàdi aci’s ndipanga! Yone ùvwa mumanyè yònsò wa kùdibo, nè mubàbiikile mu dìnà. Bàvwa muntu nè muntu beena Yudà. Yéye nè: “Binunu dikùmi nè bibidì byà Gaadà, binunu dikùmi nè bibidì byà Zaabulònà, binunu dikùmi nè bibidì byà Benyaminà, binunu dikùmi nè bibidì byà Yudà.” Mmwòmò anyi? Kàdi’s kùdi bisàmbà dikùmi nè bibidì byà Izalèlèlè, nè dikùmi nè bibidì misangu dikùmi nè yìbidì. . . bìdi byènta binunu lukàmà nè makùmi ànaayi nè binaayi. Ncyà bushùwà anyi? Yéye kwamba nè: “Bònsò, bàna bàà Izalèlèlè.” Yone wàkabàjingulula.

¹⁵⁴ Pashiishe kutàngilayè mu *nùнку*, nè kwambayè nè: “Mòna’s, ke musùmbà munène wa bantu ewu mwimàne wùdì muntu nànsha umwe kàyiku mufwànyine kubala to, bàà bifuku byònsò, myakulu yònsò, nè matùnga ónsò; bàvwa biimàne nè mizàbì mitòòke, mu byanza byàbò. . . nè malala, nè munkaci mwà kuàkupa, nè dyela dyà mbilà, nè bimba hòzanna nè. . . bwà Mfùmù.” Yéye nè: “Mbanganyi abu?”

¹⁵⁵ Yéye nè: “Abu mbàdi bapàtùkile mu dikènga dinènè nè basukùle mizàbì yàbò mu Mashi à Mwànà wa mùkòòkò. Bàdi kumpàlà kwà Nzambi, nè nebàkwacilè Mwànà wa mùkòòkò mudimu mu Ntempèlù Wendè pàmwè Nendè. Muunya nè butùku, bòbò kabààkuMushiyakù to.” Ke Mukàji-musèla nyéye

awu, nwamònu's, Mukàjì awu, Mukàjì-musèla wa bàà Bisàmbà byà bendè.

¹⁵⁶ Vùlukààyi nè, Mukàjì-musèla ngwa bàà Bisàmbà byà bendè. Yèyè wàkamba nè: “Neàlwe bwà kupàtula cisàmbà munkaci mwà bàà Bisàmbà byà bendè bwà bwalu Bwèndè” (bwà bwalu kaayi?) “Bwalu bwà Dìnà.”

¹⁵⁷ Mpindyewu, kùdi nsongààkàjì yàbùngì pa buloba apa. Kàdi mèmè ndi mwangàte mukàjì umwèpelè, nè yèyè awu ùvwa m'Meda Broy, nè yèyè ke Mandamu William Branham mpindyewu. Ùdi nè. . . Kacyèna kàbìdi Broy to; ùkaadi Branham mpindyewu. Nwamònu anyi?

¹⁵⁸ Nènku ke mùdìbi nàнку, udi wangata Yesù Kilistò nè ulwa Mukàjì-musèla, bidimba byà Mukàjì-musèla.

33. Myákù yà mu Latin yìdì pa Cimenga cyà Vatican apu yìdì yùmvwija cinyi's? Tudi baswè kumanya mùdiyi yisangishiibwa bwà kwenza nkàmà yisambòmbò nè makùmi àsambòmbò nè yisambòmbò, nè cidìyi yùmvwija.

¹⁵⁹ Èè, kayèna pa. . . yà mu Latin—myákù yà mu Latin kayèna pa Cimenga cyà Vatican nànsha; yìdì kumutù kwà nkwaswa wa butùmbi wa paapà, mwaba wùdiye musòmbèle pa nkwaswa wendè wa butùmbi apu. Mbafùnde lwà kumutù aku nè: “VICARIVS FILII DEI.” Nwènu baswè kumanya, mu dindàdindà, nèndwe naaci cifùnda, cintu cyònsò, nè mucitèèke pa cipese cyà dibèji. Nènku nwènu baciswe, mòna's, nènntwàdìlèci mu dindà. Mwaba wunùdi mwà kwamba ku dileeta ku dileeta mu màleeta à cyena Loomò, VICARIVS FILII DEI, mwákù awu wùdi wùmvwija nè “Pa mwaba wà Mwànà wa Nzambi”; yèyè ngudi mupinganyi wa Mwànà wa Nzambi.

¹⁶⁰ Èkèleeziyà wa Kàtòlikè ùdi wìtabuuja nè “Peetèlò nguvwa paapà wa kumpàlà; yèyè nguvwa mupinganyi wà Yesù Kilistò.” Ciinè aci ciikàle dipanga's! Eyo. Pashiishe bàdi bamba nè “Paapà yònsò udi umulonda mmupinganyi; nè paapà wa mpindyewu ewu, udikù mpindyewu ewu, mmupinganyi wa Yesù Kilistò.” Nènku's ke cyòci cidì cifùnda lwà mwaba awu aci nè: “*Mumupinganyi wà Yesù Kilistò*, ‘VICARIVS FILII DEI,’” cifùndapu. Angàtaayi ànu màleeta à cyena Loomò awu nè nùáfùndè (X ùdi dikùmi, V ùdi itaanu, nè bikwàbò mùshindù awu), paùdi uya ku dileeta nè ku dileeta nè “VICARIVS FILII DEI,” nènku elà mushoonyi, kàdi's udi upeta nkàmà yisambòmbò nè makùmi àsambòmbò nè yisambòmbò. Cifùnde cyònsò kàdi ùjandule's.

¹⁶¹ Mpindyewu, ndi nè *Malelèlè À Dìitabuuja Dyètù*, mùdìbi bìbìikidiibwa, mu èkèleeziyà wa Kàtòlikè, bwalu bàà kwètù bàvwa beena Kàtòlikè bàà mu Irlande. Pa nàнку ndi mumanyè cìndi ngàmba aci. Nwamònu anyi?

¹⁶² Nènku kakùyi mpatà to m'bulelèlè, ncyà bushùwà nè, kùdi. . . Nè Bible mmwàmbè nè “Yèyè neikale musòmbè mu

èkèleeziyà kampàndà, anyi mwa—mwaba kampàndà, anyi èkèleeziyà udi musòmbe pa tukùnà mwandamutekète mu Loomò, nè bukolè bwèndè nebùye pa buloba bujimà. Nè yèyè ùdi ùbìkidiibwa nè mufwilakanyi nè Kilistò.”

¹⁶³ Nènku ku èkèleeziyà awu kupàtukakù èkèleeziyà mikesè yàkalediibwa paanyimà pàà aci, nè kwamba nè: “Yèyè ùvwa mukàjì wa masandi, nè bàvwa bandumbà bàvwa bamulondè abu.” Ncyà bushùwà. S’ki bwalu mbwòbù abu. Bwalu bàkadyènza bulongolodi mu cintu cìmwècìmwè aci, nè bàvwa nè twitabàayi yàbò nè malongesha àbò awu. Ànu mishààdile ndambù, kayiyi nè bukolè mùvwà yèyè awu to, cibi yivwa ànu nè bukolè. Nè *nyama* ùdi ùmvwija nè “bukolè.” Ki bwalu mbwòbù abu’s. Pa nàнку bàdi nè, beena Kàtòlikè bàdi nè bukolè butàmbe bunène. Ba-Méthodistes, nè pashiishe ba-Presbytériens, nè pashiishe ba-Luthériens, nè pashiishe ba-Baptistes, nè pashiishe bakwàbò, ànu nàнку. Twòtò atu tùvwa ntuumakolè tukesè, tulongolola nè: “Èkèleeziyà wanyì! Èkèleeziyà wanyì! Èkèleeziyà wanyì!”

¹⁶⁴ Kàdi mwena kwitabuuja mulelèlè kèna wàmba cintu nànsha cìmwè pa bwalu abu to. Ànu ne: “Kilistò Wanyì! Kilistò wanyì! Kilistò Wanyì!” Ke dishiilangana ndyòdi adi. Mmunyi munùdi bamanyè? Nyumà Mwímpè ùtu ùfila bujaadiki nè bimanyinu nè maalu à kukèma.

¹⁶⁵ Lwà lukesè menemene ndwòlò elu, lwenze bu kwaluka kàbidi’s. Ncyèna muswè kulùbala to, kàdi muntu kampàndà’s mmulùtèèke mwab’ewu:

34. Wèwè’s uvwa mukonke cidi cyènza nè tabernacle kèna útanta. Kabingilà nkàà nè, nkashindàmèene pa nè bàmwè bàà ku balami bàdi bàvila dipà dyà myakulu nè dyondopa. Tudi bònsò bamanyè nè aci ncilelèlè.

¹⁶⁶ Ngambilaayi nè n’nganyì awu, pàncidì apa mu—mu kàmpanyè aka, nènku awu neùmushiibwè nè lùkàsà lwònsò.

35. Bu wèwè mwà kuswà umvwijàku ní bìdi bikèngela bwà mwena Kilistò kwenzayè dyoweshangana dyà màyi ku makàsà, nè dibàtiiza mu Dìna dyà Yesù Kilistò (Dìna) pamutù pàà dìnà dyà “Taatu, Mwànà, nè Nyumà Mwímpè.” Bu wèwè mwà kuswà.

¹⁶⁷ Èyo. Mvwa naayi bu yisàtù yà ku yòyi ayi mwab’ewu yidi yikonka cintu cìmwècìmwè aci.

¹⁶⁸ Byà dyoweshangana dyà màyi ku makàsà, èè, s’mbipiciibwe nè mèmè mubangilè pa lolù alu’s. Èyo, mpindyewu nudi mwà kupangakana, bìdi ànu bímpè. Ngànji mbalèku ndambù, katanci kakesè cyanààna. Anyi panwikalà baswè kucibala, angàtaayi Yone Munsantu, nshapità wa 13, katanci kakesè cyanààna. Ndi muswè kunùkonkakù cintu kampàndà mwaba ewu. Nènku tèelejàayi cidi Yesù Kilistò mwambè, Yèyè mwinè, nè pashiishe

nênye neenù mu Dipungila bwà kunùleeja nè bàcìdì ànu bàcyènza. Kubangila ku mvensà mwí2.

Mpindyewu didyà dyà dilòdòlò edi dimana kujjika, dyabulù ukaavwa...mutèeke mu mwoyi wa Yudaàsà Mpongoloki, mwâna wa Simonà, bwà kumutungila;

Yesù mumanyè...Taatu ùvwa mufile bintu byònsò mu byanza byèndè,...ùvwa mufumine ku Nzambi, nè ùya ku Nzambi; (Wàkapàtuka mu Nyumà, kubwela mu mubidi, kàdi kwalukila mu Nyumà. Nwamònu anyi?)

Nè Yèyè kujjuuka ku didyà dyà dilòdòlò adi, nè kuumusha bivwàlù byèndè;...kwangata ditwàyà,... kudijingilayè.

Paanyimà pàà aci kupòngolwelayè màyi mu dilòngà kampàndà, kubanga kwowesha makàsà à bayiidi, nènkù bwà kubàkùpula màyi nè ditwàyà òvwaye mudijingile adi.

Pashùshe kulwayè kùdì Simonà Peetèlò: ke Peetèlò kumwambilayè nè: Mukalenge, wèwè ungowesha mèmè màyi ku makàsà anyi?

Yesù...wàkamwambila nè: Cìndì—cìndì ngèza mpindyewu eci kwèna mucìmanyè to...kàdi nèumanyè pashùshe.

Peetèlò kumwambilayè nè: Wèwè kwàkungoweshakù màyi ku àanyi makàsà to. Yesù wàkandamuna nè kumwambila nè: Mèmè ncìyi mukwowèshe màyi to, kwèna naanyi mu bwòbùmwe to. (Kaa, nudikù mwà kudifwànyikijila aci anyi! Eyo.)

Simonà...wàkamwambila nè,...kì nng'ànu makàsà nkàayawù to, kàdi...byanza byànyi nèe mutu.

Ke Yesù kumwambila nè: Ewu udi mwowe màyi...kèna...ùdi dijinga...kwowesha makàsà èndè, nudi bakezùke mu kantu nè kantu,...kàdi kì mbònsò to.

Bwalu yèyè ùvwa mumanyè nè nganyi uvwa nè cyà kumutungila; ki bwà cinyi wàkamba nè: Kanwèna bònsò bakezùke to.

Nènkù paanyimà pàà yèyè mumanè kubwòwèsha màyi ku makàsà, nè mumanè—mumanè kwangata bivwàlù byèndè, nè mumanè kusòmba panshi cyàkàbìdì, wàkambàmbila nè: Nudi bamanye cìndì munwenzèle eci anyi?

Nudi numbùkila Mfùmù nè Mukalenge's, nènkù nudi nwamba bìmpè; bwalu ke cìndì.

Dibà adi pangùikalà mèmè, Mukalenge nè Mfùmù wenù, munwowèshe màyi ku makàsà;...bìdì bikèngela

bwà nwênù kwoweshangana màyi ku makàsà muntu nè mukwèndè.

Bwalu ndi munùpèeshe cileejilu, cyà nè nudi ne cyà kwenzelangana muntu nè mukwèndè bu mündi munwenzèle.

. . . nudi bàà disànkà bu nwênù mwà kumanya bintu ebi nè kubyenza.

¹⁶⁹ Lwà mu Timòtè Mwibìdì, Pòlò mmwâmbè, pàvwàye munkaci mwà kufùndila èkèleeziyà nè: “Kanulekedi mukàji nè mmukàmbà mu èkèleeziyà pàdiye kàyì mwoweshe bansantu màyi ku makàsà nànsha.” Ncyà bushùwà. Dyoweshangana dyà màyi ku makàsà òwva dyenzeka mu matùkù ònsò à Bible. Nè ku dikwàcisha dyà Nzambì, mémè mulamè meeji àanyi mu òwò, nè Nzambì munkwàcishe, nengikalè ndyènzeja too nè pangààfwà. Ncyà bushùwà. Cidi menemene ànu mudimu mutùtùma naawù kùdi Yesù Kilistò!

Mpindyewu, ke lukwàbò lukonko lwà lùpanda mutù elu’s.

36. Bwà cinyi muntu mmufwànyine kubàtijiibwa mu Dìna dyà Yesù Kilistò pamutù pàà “Taatù, Mwànà, nè Nyumà Mwîmpè”?

Ndi naayi yìbìdì anyi yìsàtù. Lùmwe ndwòlò elu’s:

37. Mwanèètù Bill, dibàtiiza dyà mafi dyùvwà wakula makèlèlè dilòòlò ncinyi, piikalàdi ndyà mu màyi anyi dyà Nyumà? Dyòdi dyà mu màyi, nè wèwè wamba nè mmu Dìna dyà Yesù Kilistò, bwà cinyi Maatàayi 28.19, bàdi bamba nè: “Taatù, Mwànà, nè Nyumà Mwîmpè”? Swàkukù ùmvwijè.

¹⁷⁰ Mpindyewu, eyi’s ke yà yìpanda mutù mu mùshindù kampàndà’s, kàdi ndi ngèèla meeji nè ndi nè lukwàbò kaaba aka mu mwaba kampàndà, cintu ànu cimwècimwè aci. Kaa, bìdi mu myaba bu yìsàtù nànkù. Nènteetè bwà kufikakù. Tùmonèbi. Nudikù mwà—nudikù mwà kuntwàla bwà tusunsa tukesè anyi? Eyo. Mpindyewu, tùbangàayi ànu mpindyewu bwà kwandamuna ku nkonko eyi. Pàmwàpa tudi mwà kutwà ndambù waayi byanza, nè kuyangata pàmwàpa (yàshàala ayi) màalabà; nànsha mene, mu kàlaasà kàà Dyàlumingu, anyi mu cikondo kampàndà. Kàdi bantu aba pàmwàpa . . . bàdi bàkonka nùnkù, nè màalabà kùdi dibàtiiza. Mpindyewu, mùshindù wònsò wùdi wèwè mubàtijiibwe awu, kabyèna nè bwalu kùndi mémè to. Kàdi ndi muswè bwà—bwà kunwàmbila Dilongesha dyà bàpostòlò dyà mu Bible. Nwamònu anyi?

¹⁷¹ Mpindyewu, tudi bajandùle, makèlèlè dilòòlò awu nè, pàakavwijiibwa èkèleeziyà wa Kàtòlikè bulongolodi, bwà nè bwàkapàtuka nè nkòomunyò wa mashimi, bamba nè: “Paùdi wangata Ukàristiyà munsantu, udi ùmvwija nkòomunyò wa

cijila awu, udi wakidila Nyumà Mwímpè.” Aci kî Nyumà Mwímpè nànsha; aci's ncyostiyà.

172 Èkèleeziyà wa Mishòònyì ùdi ùlabulangana ku byanza, ùfùnda mènà àbò mu mukànda, ke cidibo bàbìikila nè “nkuMwakidila.”

173 Mpindyewu, kàdi mùshindù mulelèlè wà kuMwakidila wùvwa ndibàtiiza dyà Nyumà.

174 Nènku, mpindyewu, èkèleeziyà wa Kàtòlikè wàkapàtula kàtèshisùmù. Luther ùvwa naakù, èkèleeziyà wa ba-Méthodistes ùdi naakù, ba-Épiscopaliens bàdi naakù, bààbúngì bàà ku bakwàbò abu bàdi naakù, kàtèshisùmù aku's. Bilèlè byàbúngì byà èkèleeziyà wa Kàtòlikè bicidi ànu kacya byàlembelela èkèleeziyà wa Mishòònyì; bìdì bimufwimbilamù buludì, bilondèshilàngàne nè Bible.

175 Kàdi kacya kakùtukù kwànji kwikala muntu, mene, mu mabèji ònsò à Bible emu, mubàtìijìibwekù mu dìnà dyà “Taàtù, Mwànà, Nyumà Mwímpè to.” Kacya kakùvwakù muntu nànsha umwe mubàtìijìibwe mu dìnà dyà “Taàtù, Mwànà, Nyumà Mwímpè” to too nè ku èkèleeziyà wa Kàtòlikè wa ku cibangidilu. Kacyèna mu Bible to, mwaba nànsha wùmwè! Muntu nànsha umwe mwà kupeta kantu bu nànkumù, nènku àngambilè nè àndeejè mwaba wàkabàtìijìibwàku muntu umwèpelè bàtèèla dìnà dyà “Taàtù, Mwànà, Nyumà Mwímpè” bu nwènù mwà kuswà ndeejàayikù, bwalu ndi mukenkèteMù mwònsò mpàlà nè nyimà mpàlà nè nyimà, kùkaadi bidimu bìipacila ku makùmì àbìdì nè byà mu njila mpindyewu. Nènku ndipanga! Ntwìtabàayi wa Kàtòlikè kàdi kî ndíyì ditùma dyà Bible nànsha.

176 Mpindyewu netùjandulè nè mbwà cinyì, tuyàaya ku lukonko lwèbè alu, mwanèètù munanga. Yone Munsantu. . . Ndi njinga kwamba Maatàayi 28.19. Èyo, twàlukilàayi paanyimà. Buulùlaayi mu Bible wenù, pàmwè naanyì, bwà nwamòna mwà kubala naanyì pàmwè. Ke mwaba wùdici cyakula ewu. Mwaba wùmwèpelè mu Bible wà. . .

177 Yesù kàakambakù nè: “Mukana mwà bantèmu bàbìdì anyì bàsàtù díyì dyònsò dijaadikiibwè anyì”?

178 Ndi mwà kuya neenù mu Bible mwaba wùdìYe mwàmbe nè: “Yudaàsà Mpongoloki wàkaya kadyòwa,” nè: “Wèwè ndaaku wenzè byà mwomùmwè.”

179 Ndi mwà kuya neenù mwaba wùdì Yesù mwambè nè: “Pàdi Mwànà wa muntu,” civwàYe Yèyè mwinè awu, “udi mpindyewu mu Dyulu awu, neàlwe cyàkàbìdì,” nè mwimàne pa buloba apa mene. Ke yèyè nè: “Mwànà wa muntu udi mpindyewu mu Dyulu,” nè mwimàne pa buloba apa mene.

180 Bikèngela ùmanyè Nzambì bwà kumanya Dìyì Dyèndè. Kwèna mwà. . . Kabyèna bikèmesha to mùdì wamba nè: “Dìdì dibèngangana Dyòdì diinè.” Bìdì munkacì mwà kufila

cibwejàkàji; bwalu Nzambi mmwâmbè nè Yèyè wàkaCifùnda mùshindù awu bwà kuCisokoka ku bamanyi bàà mabàla aba nè bikwàbò. Nènku bantu bàlwe kudìpwekèa ku cyoshelu, nènku Nzambi neànùbuulwilèCi.

181 Mpindyewu Mufùndù ngôwò ewu, Maatàayi 28.19, mwaba wùmwepelè mu Bible wùkaadiku mutèèlè myânzù eyi.

*Ndàayaaku, nùkalongeshè bàà mu matùngà ônsò,
kubàbàtiiza mu dîna dyà Taatù, nè dyà Mwânà, nè dyà
Nyumà Mwîmpè:*

182 Mpindyewu, mùshindù wùdi mubàtijiibwe, wùdi nè: “mu dîna dyà Taatù, mu dîna dyà Mwânà, nè mu dîna dyà Nyumà Mwîmpè.” Aci kaciyèna nànsha mene mu Mifùndu to! Kàdi cidi apa nè: “Kulongesha matùngà ônsò, kubàbàtiiza mu Dîna!” Mpindyewu tângilàayi ànu mu Bible wenù amu nùmonè ní ùdi wàmba nè “mu *mènà*” anyi “mu Dîna.”

183 Mpindyewu wèwè udi wamba...Mpindyewu, àbidì àdi panshì aa mu disangisha kampàndà, muntu kampàndà kwambayè nè: “Kùdi dibèngangana dyà mèyi mu Bible!” Wàmba nè: “Ndi njinga ùcingumvwijàku. Bwà cinyi Yesù wàkambila bantu bwà kubàtiizabò mu dîna dyà Taatù, Mwânà, Nyumà Mwîmpè, kàdi Peetèlò kukùdimuka è kubàbàtiiza mu Dîna dyà ‘Yesù Kilistò,’ mu Byenzedi 2.38?” Yèyè nè: “Aci cyôci kaciyi cibèngangana ku mèyi to, mèmè ncyèna mmòna dibèngangana dyà mèyi to!”

Mèmè nè: “Ànu bwalu kwèna mukèbe Nzambi bìmpè to.”

184 Yèyè nè: “Mwanèètù Branham, bìdi nè cidìbi bìshintulula bu mèmè mwà kubatiiza mùshindù ewu anyi mùshindù *wàwa* anyi?” Bidi bulelèlè bìshintulula cintu, nènku mèmè nèncijaadikile ku Bible.

185 Ambàayibi tǔng bu nè—ambàayibi tǔng bu nè Mòsà... Nzambi wàkambila Mòsà, pàvwàye ùseemena ku cipuka aku, kwamba nè: “Mòsà, kòpolà bisàbaatà byèbè, wèwè’s udi mu buloba bwà Cijila.”

186 Yèyè nè: “Mpindyewu, Mukalenge, mèmè’s ndi muntu wa kaneemu. Bisàbaatà byànyi’s mbikolè ndambù bwà kukòpoka, pa nànu nèngùumushè ànu cifulu.” Yèyè kàvwakù mwâmbè nè “cifulu to,” Yèyè wàkamba nè “bisàbaatà!” Nè cidi Bible wàmba m’Bulelèlè. Mpindyewu bu... .

187 Mwab’ewu, kwènjì matùkù dikùmi, eci’s cìvwa dibàndishiibwa. Nènku pàakambwibwa Yesù, Wàkatùmina bayiidi Bèndè dīyi bwà kuya pa buloba bujimà nè kulongesha matùnga ônsò, nubàbàtiiza mu dîna dyà Taatù, Mwânà, nè Nyumà Mwîmpè. Nènku matùkù dikùmi paanyimà... Bààkabànda ku Yelusàlèma nè bààkindila mu cibambalu cyà kuulu too nè pàakalwà Nyumà Mwîmpè. Nè pashiishe

pàakabangàbo kuyiisha nè kutùngunuka...Bàakamba nè: “Tudi mwà kwenza cinyi bwà twètù kusungidiibwa?”

188 Peetèlò kwambayè nè: “Nyingàlàlaayi, muntu nè muntu wa kunùdi, nè nùbatijiibwè mu Dìna dyà Yesù Kilistò.”

189 Pashiishe kuyayè kwà Kòneeliyò, kwambayè nè: “Nyingàlàlaayi, nè nùbatijiibwè mu Dìna dyà Yesù Kilistò.”

190 Kuyayè kuntwaku nè kusangana bantu bàkaavwà babàtijiibwe, kwambayè nè: “Bikèngela nùbatijiibwè cyàkàbìdi mu Dìna dyà Yesù Kilistò!”

191 È kupwekayè mu Sàmaalèyà nè kwambayè nè: “Bàbàbàtìizè mu Dìna dyà Yesù Kilistò.”

192 Nènku musangu nànsha wùmwe kakùvwa myânzù ayi mitèèdiibwe pa muntu kampàndà to. Kacya! “Mpindyewu, kùdi dibèngangana dyà mèyi dībà adi,” mùdi wamba. To, kabyèna nàнку to. Lòmbaayi ànu Nyumà Mwìmpè mpindyewu, nè nùMutàngilè mùdiYe unùbuulwilaCì. Kàngulàayi mwoyi wènu.

193 Mpindyewu, kanwìkadi bapàngàdike bwà kukanga mwoyi to. Nwènu benze nàнку, Nzambì kèna mwà kwakula neenù nànsha. Kàdi nwènu kanùyì bapàngàdike bwà kukanga mwoyi to, ambàayi nè: “Ndi mwindile Bulelèlà bwà menemene, Mwanèètù Branham.”

194 Pìikalàbi nè Yesù wàkambila bayiidi nè: “ndàayi nùkenze *cikampàndà*,” nènku kuyabò kwenza cintu kampàndà *mwab'ewu* cyà cishiilàngàne, kàdi Nzambì kucibènesha, nè mu Bible mujimà. Mpindyewu, bàakenza ciwà Yesù mubàmbile bwà kabènji anyi? Pìikalàbò benze nàнку, mbashikùkile, kàdi Nzambì kààkutwakù cishikù mushinga nànsha. Yèyè mwà kwenza nàнку, nùnkù's Ûvwa kwikala mutwè Evà mushinga nè mwimànyike cintu cijima aci ku cibangidilu aku. Pàdi Nzambì wàmba cintu kampàndà, bikèngela bwà Yèyè àshaalè mukwàte ku Dìyi Dyèndè; Yèyè mmudishikàmìne. Pa nàнку anyi Peetèlò wàkenza cilèma... .

195 “Kaa,” mùdibo bàmba, “aci's ncyàkambà bàpostòlò.” Muntu kampàndà kwambayè nè: “Aci's ncyàkamba bàpostòlò. Mèmè nèngènzè cidì Yesù mwàmbè.”

196 Èè, pìikalàbi nè bàpostòlò bàakenza ciwà Yesù kàyi mubambila bwà kwenza to, dībà adi ncinyi? Nènku pìikalà bàpostòlò bàvwà bàfunde Bible ewu... .Pòlò wàkafunda byònsò ebi, nè Pòlò ke uvwa ewu wakabènzeja bwà kubàtijiilwilabò cyàkàbìdi. Nènku pìikalà Pòlò yèyè ke wàkafunda citùpà cyà citàmbe bunènè cyà Dipungila Dipyadìpyà edi, dībà adi m'Bible wa mùshindù kaayi wùdi nendè mufunda ùdi uteeta bwà kubala?

197 Tùcìvwijàayi ànu Eci. Konkàayi cidì cyùmvwika bwà nùmonè cidì Dìyi dyàmba. Mpindyewu, eci mbwà dilonga, bwà nwènu kumanya Dìyi dyà Nzambì.

198 Mpindyewu, Peetèlò yêyè mubàtìize mu Dìnà dyà Yesù Kilstò paanyimà pàà Yesù mumanè kumwambila bwà kubàtìiza mu dìnà dyà “Taatù, Mwànà, Nyumà Mwímpè,” yêyè wàkenza bibèngàngàne nè cyàkambà Yesù. Aci ncilelèlèlè anyi? Mpindyewu, bikèngela kwikale cintu kampàndà muntwamu. Mpindyewu twànjàayi ànu kujandula, nè kulòmba Nyumà Mwímpè bwà kutùleeja. Mpindyewu, cyàkumpalà, mpindyewu twàngatàayi—twàngatàayi Mufundu wà kumpalà, Maatàayi 28.19.

Ndàayaaku, . . . nùkalongèshè bàà mu matùngà ònsò, nùbàbàtìiza mu dìnà dyà Taatù, . . . Mwànà, . . . Nyumà Mwímpè:

199 Elà mèsu mu Bible webè ùmonèbi aci ní cidi cyàmba nè “mu mènà dyà Taatù, nè dyà Mwànà, nè Nyumà Mwímpè.” Mmwómò anyi? To, mukalenge. Mbâmbè nè: “mu *dìnà dyà Taatù*, mu *dìnà dyà Mwànà*, mu *dìnà dyà Nyumà Mwímpè* anyi?” Mbambe nè: “Mu Dìnà!” Ncyà bushùwà anyi? Èè, “dìnà” divwa ku bùmwe. Ncyà bushùwà anyi? Èè, ndìnà kaayi didiYe muswè bwà bóbò kubàtìiza, dìnà dyà Taatù anyi, anyi dìnà dyà Mwànà, anyi dìnà dyà Nyumà Mwímpè? Yêyè wàkamba nè: “Mu Dìnà!” Èè, bwà kwamba menemene, kakwèna nànsha cimwè cyà ku byòbi abi cidi dìnà to.

200 Mbúngi kaayi bwà baataatù bàdi kaaba aka? Tùmonèbi cyanza cyènu—cyènu’s. Èyo. Nganyi wa kunùdi udikù dyèndè dìnà nè “Taatù”? *Taatù* kí ndìnà to; *taatù* “mmwânzù.” Mbâna búngi kaayi bàdi kaaba aka? Bushùwà, muntu mulùme yònsò ewu, mulùme yònsò, mbâna. Èè, nganyi wa kunùdi udi dyèndè dìnà nè “Mwànà”? Kí ndìnà to; mmwânzù. Mmwómò anyi? Kí ndìnà to; mmwânzù. Èè, nganyi wa kunùdi udi dyèndè dìnà nè “Muntu”? Mbantu búngi kaayi bàdi kaaba aka? Nwènu bònsò. Èè, nganyi wa kunùdi udikù mwinyikiibwe dìnà nè “Muntu”? Cintu bu nànu kacitukù to; ke cyùdi ncyòci aci. Nyumà Mwímpè kí ndìnà to; kí cidiYe ncyòci aci. Mèmè ndi muntu. Pa nànu anyi Taatù, Mwànà, anyi Nyumà Mwímpè kí “dìnà to”; bìdi ànu *mmwânzù* yisátu cyanààna yà Dìnà dimwèpelè.

201 Mpindyewu tèelejàayi nè ntèmà menemene. Ncinyi. . . Tàngilàayi kùnweku! Nèngàngatè eci ànu bu cileejilu bwà bânà bakesè. Wèwè mwâmbè, èè, byenzè bu nè uvwa ubala mukàndà wà—wà bwalu-bulonda kampàndà, nè wàmba nè: “John nè Mary bààkasòmba kashidi nè disànka pashiishe.” Nènku udi udikonka dībà adi nè: “John nè Mary mbanganyi’s?” Èè, mùshindù wùmwèpelè wuwikalàku mwà kumanya nè John nè Mary abu mbanganyi, nkwalukila paanyimà nè kubala ntwàdijilu wà bwalu abu nè kuya too nè ku ndekeelu kwàbù. Ncyà bushùwà anyi?

202 Èè, pìikalàbi nè Yesù mmwâmbè apa nè: “Nùbàtìijibwè mu Dìnà dyà Taatù, Mwànà nè Nyumà Mwímpè,” nè Taatù kí ndìnà

to, nè Mwânà kî ndîna to nè Nyumà Mwîmpè kî ndîna to, ncinyî's, Muntu ewu Nganyî? Tudi baswè kumanya nè Yèyè ùdi Nganyî. Mpindyewu, cintu cyà citàmbe bwîmpè cyà dyaenza. . . Ke nshapità wa ndekeelu wa Maataàyi nyèyè awu, mvnsà wa ndekeelu nyèyè awu. Twàlukilàayi mu nshapità wa 1 wa Maataàyi, nè mvnsà yà kumpàlà ayi, nè túbangilèpu, kujandula nè Taatù ewu Nganyî, Mwânà, nè Nyumà Mwîmpè ùdi Nganyî. Mpindyewu, ndi ànu muswè kwenza nùnkù bwà bàna mwaba ewu, nànkù nebàcyumvwè pààbò.

²⁰³ Cintu cyà kumpàlà, eci necikulongòlòlè pa “bùsàtù” bwèbè abu, Taatù, Mwânà, Nyumà Mwîmpè. Mpindyewu, cyàkumpàlà, mwaba nànsha wùmwe mu Bible kamùvwakù *bùsàtù* butèèdiibwe mene to. Cijandulaayi nùcindeejè. Cintu bu nànkù kacitukù to. Ndipanga dyà Kàtòlikè, nè nwènù beena Mishònyî nuciinamina. Mònaayi's. Mpindyewu, *eci* ncinyî? Ndi mwâmbè nè *ewu* ke Nganyî? Taatù. *Ewu* n'Nganyî? Mwânà. Nè *ewu* Nganyî? [Disangisha didi dyàmbe nè: “Nyumà Mwîmpè.”—Muf.] Mpindyewu, Taatù n'Taatù wa Nganyî? Mwânà. Ncyà bushùwà anyî? Mpindyewu, *ewu* n'Taatù wa Yesù. Mpindyewu, kanùbàsambakàjiku to. *Ewu* ewu ke Taatù, *ewu* m'Mwânà, nè *ewu* ke Nyumà Mwîmpè. Ncyà bushùwà anyî? Mpindyewu, bantu bàkaadi bàcyàmbe nè: “Bantu bàsàtù bashiilàngàne, Nzambi yisàtù, bantu bashiilàngàne bàsàtù.” Kabyèna bikèmesha to mùdi beena Yudà kabàyi mwà kuCyùmvwà's! Èyo.

²⁰⁴ Maataàyi nshapità 1, ùdi ùbanga nè ndelàngànyî yà mudibù wa Yesù Kilistò nè: “Abraham wàkalela Izàkà, Izàkà wàkalela Yakòbò,” ànu nànkù, byènda bipweka nànkù, too nè mùlwalwàbi ku mvnsà wa 18.

Mpindyewu dilediibwa dyà Yesù Kilistò. . .

²⁰⁵ S'ke yèyè ewu, mvnsà wa 18.

Mpindyewu dilediibwa dyà Yesù Kilistò. . .
(ndondàayi mémè nè Bible wenù). . . *dilediibwa dyà* Muntu ewu *Yesù Kilistò òwà mu mùshindù ewu: Pàvwà. . . mamwèndè Màriyà mubangila kùdì Yòzefù. . . wàkasanganyibwa nè difù dyà kùdì. . .*
(Nzambi, Taatù awu anyî?)

Mvwa muCibalè mu cyòci anyî? Cìdi cyàmbe cinyî? [Disangisha didi dyàmbe nè: “Nyumà Mwîmpè!”—Muf.] Wàkasanganyibwa nè Difù dyà Nganyî? [“Nyumà Mwîmpè.”] Mémè's mvwa ndyambidila nè muntu wambì nè Muntu *ewu* ùvwa Tatw'Èndè? Bible mmwâmbè nè Muntu *ewu* ke ùvwa Tatw'Èndè.

. . . wàkasanganyibwa nè difù dyà Nyumà Mwîmpè.

²⁰⁶ Mpindyewu mmwânà wa mùshindù kaayi unùdi nendè? Kàdi's Yesù wàkamba bitòoke tòò nè Nzambi nguvwa Tatw'Èndè. Ncyà bushùwà anyî? Nzambi ngudi Tatw'Èndè!

Èè, Nyumà Mwîmpè ùdi naaci bwalu kaayi díbà adi? Pìikalàbi nè Bible mmwambè nè Nyumà Mwîmpè nguvwa Tatw'Èndè, nè Yesù wamba nè Nzambi nguvwa Tatw'Èndè; nè wèwè wamba nè Nzambi nguvwa Tatw'Èndè, nè mpindyewu Bible wamba yéyè, apa nùnkù's. Kwòkò bantu bàsàtù, anyi bàbìdì bashiilàngàne, Nzambi kàvwa naaci bwalu nànsha bùmwè to. Nyumà Mwîmpè ke Tatw'Èndè.

207 Mpindyewu twänjàayi kubalakù ndambù.

... Yòzefù bàyendè, bu mùvwàye muntu wa maalu maakàne, kàvwa muswè bwà kumunyangila luumù kumpàlà kwà bantu to, kàdi wàkeela meeji bwà kumwipata mu musokoko.

Kàdi, mònaayi, pàcìvwàye wèlangana meeji pa bintu ebi apu, . . . mwanjèlò wa Mukalenge kumumwènekela mu cilòòtà, wamba nè: Yòzefù, wèwè mwànà wa Davidì, kùcìnyì. . . kwangata pàmwè neebè Màriyà mukàjèèbè to: bwalu udi mwimicìubwe munda mwèndè awu ngwà kùdì Nyumà Mwîmpè. (kaciyi Nzambi Taatù to; Nzambi Nyumà Mwîmpè!)

208 Nudi numòna mwaba wùdì meeji ènù à nzambi yisàtù mafwànyine kuya kafika anyi? Mmafwànyine kuvwija Yesù mwànà wa mu masandi. Cyà bushùwà's. Aci's ndipanga! Kakwèna Mufundu nànsha wùmwe bwà aci to. Mpindyewu, nebiengelè bwà nwènú kwitaba nè Nzambi Taatù nè Nzambi Nyumà Mwîmpè, m'Mupèrsonà umwèumwè awu, anyi Yesù ùvwa nè baataatù bàbìdì. Ncyà bushùwà anyi? Mu bushùwà bwà bwalu, ncyà bushùwà. Bible mmwàmbè nè: "Nyumà Mwîmpè nguvwa Tatw'Èndè," nè Bible mmwàmbè nè: "Nzambi nguvwa Tatw'Èndè." Mpindyewu, Tatw'Èndè ke nganyì? Nyumà Mwîmpè nè Nzambi bàdì Nyumà umwèumwè awu; Cidi Cintu cìmwècìmwè aci.

... byònsò ebi byàkenzeka, bwà kuujjibwa cidì. . . cyàkambùbwa kùdì mupròfetà, kùdì Mukalenge, wamba nè:

... virgò neimite difù . . . nè kulela mwànà, nè bóbò . . . (Yéyè ewu)

... nè nebàmwinyikè dìnà nè YESÙ: bwalu yéyè neàsungile cisàmbà cyèndè ku mpèkaatù yàci.

Nè byònsò ebi byàkenzeka, bwà kuujjibwabi, . . .

... nè dìnà dyèndè nedibiikidiibwè nè Èmanùwèlè, udi ku dyumvwija nè, Nzambi neetù.

209 Mpindyewu, Taatù, Mwànà, nè Nyumà Mwîmpè n'Nganyì? Peetèlò wàkatùpakana anyi? Yéyè wàkenza civwà Yesù mumwambile aci. Aci's mmyànzù yisàtù ayi.

210 Mémè ndi mwambi, nè ndi taatù, nè ndi “Révérend,” mùdìbo bàcìbìikila, mmwânzù, kàdi nànsha òmwè dyà ku abi kí ndínà to. Dínà dyànyì ng’William Branham.

211 Yèyè ùvwa Taatù, Yèyè ùvwa Mwànà, Yèyè ùvwa Nyumà Mwímpè. Wèwè udi uteeta kwenza Nzambi yisàtù, mulundà wanyì; mmashimi; ndipanga.

212 Kùdi bipungu bisàtù bìdì meeji à nzambi yisàtù masopàkànàngàne naabi. Nzambi, Taatù, ùvwa Nyumà uvwa mulèmbèlèle kumutù kwà bàna bàà Izàlèlèla mu Dikunji dyà Kapyà. Ncyà bushùwà anyì? Nzambi ùvwa mwaba awu. Dìbà adi Nzambi wàkavwijiiibwa mubidi nè wàkasòmbela munkaci mwètù (mmwòmò anyì?) mu Mwàn’Èndè. Mpindyewu Yèyè ùdi munkaci mwà kudipwekesha milongo too nè pàdiYe mubwelè mu mwoyi wà muntu, ku Nyumà Mwímpè.

213 Nzambi mmwenze bu kaludikilu kàà makàsà àsàtù, anyì, kaludikilu kàà makàsà àsàtù, èyowà’s. Byàlà dikùmi nè bìbìdì byà kumpàlà abi bìvwa n’Nzambi, Taatù awu; byàlà bìbìdì dikùmi nè bìbìdì abi, Nzambi, Mwànà, Nzambi umwèumwè awu; byàlà dikùmi nè bìbìdì biisàtù abi bìvwa n’Nzambi, Nyumà Mwímpè, Nzambi umwèumwè awu. Yesù wàkamba . . .

214 Wèwè udi wamba nè: “Èè, twètù’s tudi nè Nyumà Mwímpè munda mwètù.” Ncyà bushùwà.

215 Kàdi Yesù wàkamba nè: “Mu katanci kakesè emu, bàà pa buloba kabààkuMmòna kàbìdì to. Kàdi nwènù nenùMmònè, bwalu Mémè. . .” “Mémè” mmupinganyi muleeji muntu. “Nèngìikalè neenù, munda mwènù mene, too nè ku ndekeelu kwà buloba.” Nyumà Mwímpè ùdi penyì dìbà adi? “Ncyàkunùshìya kanùyì busàmbi to; Nèngààlukilè cyàkàbìdì nè nèngìikalè neenù.” Bìdì nànkù.

216 Udi umòna’s, wèwè’s udi ucyùm vwa bibì, mulundà wanyì. N’Nzambi umwèpelè mu bipungu bisàtù. Cipungu cyà Buutaatù, Buumwànà, nè Nyumà Mwímpè, Cìdì n’Nzambi umwèumwè awu. Nènku pààkambàYe nè: “Ndàayi nùkabàtìizè mu Dínà dyà Taatù, Mwànà, nè Nyumà Mwímpè,” Ùvwa n’Yesù Kilistò. Nènku ke bwà cinyi wàkabàtìiza mu Dínà dyà Yesù.

217 Mpindyewu tàngilàayi’s, twàngatàayi mabàtìiza àdi kaaba aka. Musangu wà nzànanzà wàkatèediibwàku dibàtìiza mu Dipungila Dipyadìpyà, ùvwa n’Yone Mubàtìiji. Aci mmwòmò anyì? Nèntèèke eci lwà kuulu eku. Nudi numòna’s, bìkèngela ùmvwè Bunzambi bwèbè bìmpè kumpàlà kwà wèwè kumòna mwà kulongolola dibàtìiza. S’ke Yone Mubàtìiji nyèyè awu, dibàtìiza dyà kumpàlà.

218 Musangu mwibìdì wàkaakudiibwà bwà dibàtìiza, wùvwa mmu Byenzedi 2.38, mwàkabàtìijiibwàbo mu Dínà dyà Yesù Kilistò, ku èkèleeziyà mupyamùpyà. Mwaba mwibìdì wùvwa mmu nzùbu wa Kòneeliyò, anyì kí. . . Mfwilaayikù luse, nku beana Sàmaalèyà, Byenzedi 7.48 nè 49. Nènku Byenzedi 10.49

ke mwaba wàkabàbàtiizàye mu nzùbu wa Kòneeliyò amu. Nè musangu wàkalondà wàkaakudiibwà bwà dibàtiiza, nè bàbìkila mènà anyi myânzù, wùvwa mmu Byenzeni 19.5.

²¹⁹ Mpindyewu, pàakabàtijiibwàbo mu Ditùkù dyà Mpenta, bàakabàtijiibwa, mu Byenzeni 2.38, mu Dìna dyà Yesù Kilistò. Mmwômò anyi? Cifùndaayi, cikenketaayi.

²²⁰ Pashiishe, Filipò kupwekayè, paanyimà pàa matùkù àbìdi, nè kubanga kuyiisha beena Sàmaalèyà; nè kubàyiisha, nè kwondopa babèedi, nè kwenza disangisha dinène kuntwaku, nè kubàbàtiiza mu Dìna dyà Mukalenge Yesù Kilistò. Peetèlò wàkapweka è kubàtentekela byanza; bàakapeta Nyumà Mwîmpè.

²²¹ Peetèlò kubàndayè kuulu kwà nzùbu aku ndambù wa matùkù paanyimà, mwikàle nè nzala, kumònayè cikèenà-kumòna. Nzambì kumutuma ku nzùbu kwà Kòneeliyò. Nènku: “Pàcìvwà ànu Peetèlò wàkula Mèyi aa, Nyumà Mwîmpè wàkapweka pambidi pààbò,” ke kubangabò kwakula mu myakulu nè kwenza maalu à bwena àkenzàbo ku ntwàdijilu awu. Peetèlò kwambayè nè: “Kì mbànji kubàtijiibwa to.” Pa nànkù kubàtùminayè dîyi, muntu nè muntu, bwà kubàtijiibwàbo mu Dìna dyà Yesù Kilistò.

²²² Muntu yònsò mu Bible wàkabàtijiibwa mu Dìna dyà Yesù Kilistò. Pòlò...Ndi muswè kwamba nè, bayiidi bàa Yone kabàakabàtijiibwa mu Dìna dyà Yesù Kilistò to, bàakabàtijiibwa bwà kanyinganyinga. Tùbuululàayi mu Kolìntò wa Kumpàlà...Ndi muswè kwamba nè, tùbuululàayi mu Byenzeni, nshapità wa 19, katanci kakesè cyanàànà. Nè tubalè eci nùnkù ànu katanci cyanàànà bwà nwàmònakù, balundà baanyì nè, kabyèna—kabyèna...Kabèèna...Mifundu kayèèna Yibèngangana ku mèyi to. Tàngilàayi kùnweku:

Nènku byàkenzeka nè, pàvwà Apòlò ùsanganyiiibwa ku Kolìntò apu, Pòlò...kupicila ku nseke mitumbukè yà...Efèsò: kusanganayè bayiidi kampàndà,

Yèyè kubàmbila nè: Nukàadi bapetè Nyumà Mwîmpè kacya nwiitabuujà anyi?...bòbò kwamba nè... Katwèna bamanyèku ní kùtukù Nyumà Mwîmpè kampàndà to.

...yèyè nè...dìbà adi nwènù nwàkabàtijiibwa munyi? Kaa, kwambabò, s'tudi babàtijiibwe. Yèyè nè: Bishi? Bòbò nè: Kùdi Yone.

Yèyè nè: Yone wàkabàtiiza ànu bwà kanyinganyinga cyanàànà, wamba...bwà nè nudi nè cyà kwitabuujà ewu Uvwa ulwa awu...mbwena kwamba nè, mu Mukalenge Yesù Kilistò.

Nènku pàakumvwàbo cyòci eci, bàakabàtijiibwa cyàkàbìdi mu dìnà dyà Yesù Kilistò.

. . . Pòlò . . . kubàtentekela byanza, nè Nyumà Mwìmpè kulwa pambidi pàábò; nè bààkaakula mu myakulu, nè bààkamba bipròfetà.

223 Pòlò Munsantu munène awu . . .

224 Tèèlejààyi! Ambàbi tǔng bu nè wêwè uvwa mubàtijiibwe kùdì Yone Mubàtiji, muntu umwèumwè wàkabàtiiza Yesù Kìlistò awu? Muntu wa cijila, pààkambà Yesù nè: “Kacya kakùtukù muntu mulela kùdì mukàjì, munène mùdì Yone Mubàtiji amu to.” Yèyè ngudi mfùmù wa bapròfetà bònsò. Wàkalombola Yesù mu màyi nè kuMubàtiiza buludi mu Yadènè. Mwanèètù, bu ngìkala mèmè mubàtijiibwe kùdiye, s’mvwa mufwànyine kudyùmvwa bìmpè bwà bwalu abu. Kì mmwòmò anyì?

225 Kàdi Pòlò kukùdimuka kwamba nè: “Aci kacyàkukùmbanakù mpindyewu nànsha!” Yèyè nè: “Bikèngela nùbàtijiiludiibwè, cyàkàbìdì.”

226 “Kaa, s’tudi biinyijiibwe mu màyi, nànsha nànku, Pòlò! Tuvwa biinyijiibwe mu màyi kùdì Yone, ànu lwà mu Musùlù wà Yadènè menemene amu.”

227 Yèyè nè: “Aci kacyàkukùmbanakù mpindyewu nànsha. Bikèngela nùbatijiibwè cyàkàbìdì.”

“Mùshindù kaayi?”

228 Yèyè nè: “Yone wàkabàtiiza bwà kanyinganyinga. Eci mbwà dilekelediibwa dyà mpèkaatù, nè dǐngà dǐnà nànsha dǐmwè mwǐnshì mwà Dyulu kí ndifila munkaci mwà bantu to, ànu Dǐnà dyà Yesù Kìlistò.” Nènku byàkakèngela bwà kubàtijiiludiiwbabò, cyàkàbìdì, mu Dǐnà dyà Yesù Kìlistò.

229 Kàdi kakwèna kaaba nànsha kàmwè mu Bible, anyì mu maalu malonda ònsò munda mwà bidimu nkàmà yisambòmbò byà kumpàlà paanyimà pàà lufù lwà mùpostòlò wa ndekeelu, kàkaadibò kacya babàtiize mu mungà mùshindù pa kuumusha mu Dǐnà dyà Yesù Kìlistò to.

230 Nènku ndàayi nùkakonkèku nsaserdòsè kanà yònsò wa cyena Kàtòlikè unùdì baswè kukonka awu, nùbàkonkè nè nganyi udi mushintùlùle cyòci aci, kàdi numòne cidìbo bànwàmbila aci. Angàtaayi kàtèshisùmù nè nùkàbalè; bàdi bàmba nè: “Bushùwà, bàmwè bàà ku beena Mishònyì nebasungidiibwè bwalu bòbò mbatwè ku dibàtiiza dyètù.” Mbacishintùlùle. Bàdi bàmba mùdìbo nè bukolè nè bukòkeshi bwà kucyènza, nè nwènù nudi nuciitabuuja’s! Ke cidìbo bàmba, ke cidìbo bàlàka mukana bàmba’s, ke cidì èkèleeziyà wa Mishònyì winamina ncyòci aci. Kàdi, bilondèshilàngàne nè Mifundu, kakuyi mpatà to kakwèna nànsha kapese kàà Mufundu nànsha kàmwè pa bwalu abu to.

Bivwa bikèngela bwà kubàtijiibwabò cyàkàbìdì, mu Dǐnà dyà Yesù Kìlistò!

231 Mpindyewu tèèlejàayi, lùkàsàlùkàsà mpindyewu, bwà twamónakù mwà kufika...Ncyèna muswè kunùlama ntàntà mupitèpìte bule pa nkonko eyi to. Tàngilàayi, mu ditùkù dyàkatùùluka Yesù ku Mukùnà wà Dikùdimuka dyà mpàla nè bayiidi Bèndè, Wàkamba nè: “Bantu bàdi bàmba nè Mémè ndi nganyi, nè cidìbo bàmba ncinyi?”

232 “Bàmwè bàdi bàmba nè Wèwè udi ‘Yone Mubàtiji,’ bàmwè bàdi bàmba nè Udi ‘Eliya,’ bàmwè bàdi bàmba nè Udi ‘mupròfètà.’”

Yèyè nè: “Kàdi nwènú nudi nwamba nè Ndi nganyi?”

233 Ke Peetèlò kwambayè nè: “Wèwè udi Kilistò, Mwànà wa Nzambì udi nè mwoyi!”

234 Yèyè nè: “Udi mubènèshìibwe, Simonà—Simonà Bààyona,” Yèyè nè: “bwalu kì mmunyiinyi nè mashi bìdi bikubuulwile eci to. Kwèna nànsha mulonge eci mu èkèleeziyà kampàndà nànsha, kwèna nànsha mulongele eci mu sèminère kampàndà to. Kàdi Taatù Wanyì mmukubuulwileci, nè pa lubwebwe elu Nèngiibakilèpu Èkèleeziyà Wanyì nè biibi byà ifernò kabyàkuMutàmba bukolè to.”

235 Mpindyewu, èkèleeziyà wa Kàtòlikè ùdi wàmba nè: “Cìvwa m’Peetèlò. Bàvwa nè lubwebwe mwaba awu, nè lùcidi ànu lùsanganyiibwa mwínshì mwà Cimenga cyà Vatican.” Nè aci’s cìvwa mmu Yelusàlèma, anyì mu Pàlèstinà. Kàdi bàakamba nè aci cìvwa lubwebwe.

236 Èkèleeziyà wa Mishòonyi ùdi wàmba nè: “Pàvwà mpa Peetèlò pàakiibakilàbo Èkèleeziyà.” Byòbi nànkù, s’wàkatwà cìmpìngà paanyimà pàa ndambù wa matùkù. Kacìvwa aci to.

237 Èkèleeziyà wàkiibakiibwa pa dibuulula dyà kùdì Nzambì dyà Nzambì. “Kì mmunyiinyi nè mashi bìdi bikubuulwile eci to, Peetèlò, kàdi Taatù Wanyì udi mu Dyulu ngudi mukubuulwileci. Kàdi pa lubwebwe elu, dibuulula dyà nyumà dyà Dìyì dyà Nzambì, Nèngiibakilèpu Èkèleeziyà Wanyì, nè biibi byà ifernò kabyàkuMutàmbakù bukolè nànsha.”

238 Mwaba awu ke wúndì mémè ngàmba nè, Luther, ba-Méthodistes, nè cyònsò cyúdi aci, cyònsò aci, nwènú beena Mpenta, nè cyònsò cinúdi aci, kaciyèna nè cidici cishintulula nànsha kakesè to; pàdì Èkèleeziyà wa Nzambì ùtùngunuka nè kuya, mu bukolè bwà disonsodiibwa, yèyè neàtungunukè ànu nè kwenda kuya mutàngile kumpàlà. Nè dingumba nànsha dimwè kadyàkuMwimanyika to, cintu nànsha cimwè pa buloba kaciyàkuMwimanyikakù to. “Pa lubwebwe elu Nèngiibakilèpu Èkèleeziyà Wanyì, nè biibi byà ifernò kabyèna mwà kuMutàmba bukolè to.” Bulelèlà bwà Nyumà, bubuulula’s!

239 Mpindyewu tàngilàayi mpindyewu cidì cilonda, Yèyè ùdi wàmba nè: “Nè wèwè udi Simonà, nè Mémè nènkupeèshè,” bwalu yèyè ùvwa nè Bulelèlà bwà nyumà, bubuulula. Ke bwà

cinyi ùwva mumanyè dishiilangana òwvwa pankaci pàà Taatù, Mwàna, nè Nyumà Mwímpè, nè Dìna dya Mukalenge Yesù Kilistò. Ùwva nè dibuulula dya nyumà. Ke cinùdì munkaci mwà kuumvwa dilòlò edi, mwaba wùdì Nyumà Mwímpè munkaci mwà kutùkàngwilaci.

²⁴⁰ Yèyè nè: “Wèwè udi Simonà, kàdi Nènkupèèshè nsapì yà Bukalenge bwà mu Dyulu. Nè cyònsò cinùdì nwènù nuswika pa buloba ebu aci, Mèmè nènciswikè mu Dyulu. Cyònsò cinùdì nwènù nusùlula pa buloba ebu aci, Mèmè nèncisùlùlè mu Dyulu.” NcyàkambàYe anyi? Maatàayi Munsantu, nshapità wa 16: “Cyònsò cinùdì nwènù nuswika pa buloba aci, Mèmè nènciswikè mu Dyulu. Cyònsò cinùdì nwènù nusùlula pa buloba aci, Mèmè nèncisùlùlè mu Dyulu. Nènku Nènkupèèshè nsapì yà” (cinyi?) “Bukalenge bwà mu Dyulu.” Bukalenge bwà mu Dyulu ncinyi? Nyumà Mwímpè! Bible mmwambè nè: “Bukalenge bwà mu Dyulu bùdi munda mwènù. . .” Ndi muswè kwamba nè, “Bukalenge bwà Nzambi,” numfwilaayikù luse. “Bukalenge bùdi munda mwèbè.”

²⁴¹ Mpindyewu Yèyè wàkamba nè: “Bàmwè bàdi biimàne kaaba aka kabàakumòna lufù to too nè pààmònàbo Bukalenge bwà Nzambi bùlwa mu bukolè.” Ànu ndambù wa matùkù cyaanàna paanyimà, Mpenta ewu pwàà. Nwamònu anyi? “Bàmwè mbiimàne kaaba aka” ànu mu luko- . . .cintu cimwècimwè cìvwàYe wàmba aci. “Bàmwè bàà kunùdì mbiimàne kaaba aka,” Yèyè ùwva mushintùlùke mpàla, yèyè nè: “kabàakumòna lufù to too nè panùdì numòna Bukalenge bwà Nzambi bùlwa mu bukolè.”

²⁴² Bible mmwambè nè: “Bukalenge bùdi munda mwènù.” Pàakabìikà Yesù ku bafwè, vùlukaayi nè, Yèyè ùwva nè nsapì yà lufù nè yà ifernò mipàya ku luseke Lwèndè, kí nnsapì yà Bukalenge to, ayi yàkafidiibwà kùdì Èkèleeziyà. Mpindyewu, Peetèlò nguvwa nè nsapì ayi. Nudi nwitabuujà nè Yesù ùwva mwà kushàala mukwàte ku Dìyi Dyèndè anyi? Yèyè kàyi mwenze nànkù to, mwanèètù, Kàvwa Nzambi to! Kwàjiki. Mpindyewu, Yèyè wàkamba nè: “Peetèlò, Nènkupèèshè nsapì yà Bukalenge,” mu ngaakwilù mukwàbò, “ku Nyumà Mwímpè. Cyònsò cinùdì nwènù nuswika pa buloba aci, Mèmè nènciswikè mu Dyulu.”

²⁴³ Mpindyewu tàngilàayi nùmonè cilèma cyàkenzàbo, bàpàtuka bàfwa luse ku mpèkaatù, nè bikwàbò byà mùshindù awu. Cilèma kaayipu’s wè! Tùmonèbi. Bàakamwambika nsapì ayi. Mpindyewu, Wàkatàngija mpàla wèndè buludì ànu ku Mpent- . . .anyì buludì ànu ku Yèlusalèma.

²⁴⁴ Wàkapoopediibwa pa nkùrusè, kufwà, kubìika ku lufù mu ditùkù diisàtù, ùwva pa buloba matùkù makùmi ànaayi munkaci mwà bantu, kubànda mu Dyulu. Mubàmbile bwà kwindila too nè pààmònàbo Bukalenge bwà Nzambi bùlwa pambidi pààbò, pa dìbà edi Taatù neàlujulule Bukalenge mu

mmwènekelu wa nyumà kùdìbo. Bààkabànda ku cimenga cyà Yelusàlèma nè bààkindilamù munda mwà matùkù dikùmi à muunyà nè à bufùku, nè, dyàkàmwè, dibàtiiza dyà Nyumà Mwímpè, Bukalenge bwà Nzambì, bùlwe nè bukolè pambidi pààbò. Ncyà bushùwà anyi?

²⁴⁵ Mpindyewu tàngilàayi! Peetèlò, kàyì mulonge kàlaasà to, kàvwakù nànsha mumanyè kufùnda dìnà dyèndè to (paapà anyi? Èyowà's, paapà), kwimanyina kuulu pa kashèete kakesè kàa nsàbanga anyi cintu kampànda nè kubanga kuyiisha. Yèyè nè: "Nwènu bantu bàà mu Yudaàya nè nwènu bàdi basòmbèle mu Yelusàlèma, eci cimanyiibwè kunùdi, nè tèelejàayi Mèyi àanyi. Bantu aba kí mbakwàcike maalà munùdi nwènu nudicinkila amu to, pa kumòna nè tucidi ànu pa dībà citèemà dyà ditùkù, kàdi eci ncyàkambàbo kùdi mupròfetà Yowèlà. 'Nebyènzekè mu matùkù à ndekeelu,' mùdi Nzambì wàmba, 'Nèngìcikijè Nyumà Wanyì pa mubidi wònsò. Bànà bèènu balela balùme nè bakàji nebàmbè bipròfetà, nè pa basadidi Bàanyi balùme nè bakàji Nèngìcikijè Nyumà Wanyì nè bòbò nebàmbè bipròfetà. Nèndeejè maalu à kukèma muulu mu maulu; nè panshi pàa buloba apu, kapyà, makunji à kapyà, nè mabungi à mwìshì.'" Kutùngunukayè, nè kwàkula bwà Davìdi nè bikwàbò. Nènkù pààkiimana badyùdi aba mwaba awu. . .

²⁴⁶ Kwambabò dībà adi nè: "Bakwètù wa yàaya, tudi mwà kwenza cinyi bwà twètù kusùngidiibwa?"

²⁴⁷ "Kaa, wadimuka's, Peetèlò, s'udi nè nsapì ayi milembeleja mpindyewu." Ncyà bushùwà anyi? Mukenji wà kumpàlà wà Èvànjeeliyò!

²⁴⁸ Yesù, ndambù wa matùkù kumpàlà kwà cyòci aci, kumpàlà kwà kupoopediibwaYè pa nkùrusè, wàkamba nè: "Peetèlò, Nènkupèèshè nsapì ayi. Cyònsò cyùdi wèwè uswika aci, Mémè nènciswikè; cyònsò cyùdi wèwè usuulula aci, Mémè nèncisùùlùlè. Mpindyewu, cyònsò cyùdi wenza aci, mémè nèncijingùlùlè mu Dyulu." Yèyè mwikàle Muntu wa Dìyi Dyèndè, Yèyè neàshaalè mukwàte ku Dìyi Dyèndè!

²⁴⁹ Kàdi's ke yèyè ewu mwimàne kaaba aka, Nyumà Mwímpè ùkaavwa mumanè kupòna bwà musangu Wèndè wà kumpàlà, nè bààkakonka Peetèlò nè: "Tudi mwà kwenza cinyi bwà twètù kusùngidiibwa?"

²⁵⁰ "Dimukà, udi ubweja nsapì mu Bukalenge bwà musangu wà kumpàlà. Yesù mmukwambìle, kùkaadi ndambù wa matùkù, kùkaadi matùkù dikùmi, wàmba nè: 'Ndàayi nùkabàtiizè bantu mu Dìnà dyà Taatù, Mwànà, nè Nyumà Mwímpè.' Ciwènzà ncinyi? Kàdi Yèyè wàkakupèèsha nsapì ayi bwalu wèwè uvwa nè dibuulula dyà nyumà! 'Bwalu Èkèleeziyà Wanyì neibakiibwè, nè biibi byà ifèrnò kabyena mwà kuMutàmba bukolè to.'"

²⁵¹ Nè angàtaayi twitabàayi nè mèyi maswika ènu awu, nè cyònsò cinùdi nujinga aci, kàdi necipangile byà byènza nè luse

(ncimanè kupangila), kàdi bukolè bwà Nzambi udi nè mwoyi nebutungunukè ànu nè kwenda kuya, too nè mu Cyendèlèlè. Bu mùdì mukàbà wà radium, Yèyè ùdì ùtùngunuka, mònaayi's, kàyi nè ndekeelu to.

252 “Peetèlò, wèwè ngudi nè nsapì ayi. Cyònsò cyùdì wenza kaaba aka aci, bìdì bikèngela bwà Nzambi àcìtábè mu Dyulu.” Ncyà bushùwà anyi? “Udi wamba cinyi, Peetèlò? Tudi mwà kwenza cinyi bwà kusùngidiibwa?”

253 Peetèlò kwambayè. . . Kùyi kwamba nè: “*Mwoyo Màriyà,*” cintu bu nàнку kacìtukù to, kwenza *cijila cyà matùkù citèemà*. Kùlu kulabulangana ku cyanza nè kufùnda dìnà dyèbè mu mukàndà wà èkèleeziyà nè kubàmyamina ndambù wa màyi to; kakùtu cintu bu nàнку to. Aci's ndìyi diswika dyà Kàtòlikè didi èkèleeziyà wa Mishòonyi winamina.

254 Yèyè kàakamba nè: “Nwènu bònsò ndàayi. . . Mpindyewu, Yesù mmungambìle, kùkaadi ndambù wa matùkù, bwà nwènu bònsò kuya nè kubàtìjiibwa mu dìnà dyà ‘Taatù, Mwànà, nè Nyumà Mwímpè.’” Kí mmuntu uvwa nè dibuulula dyà nyumà to, kí mmufwanyineku kwamba aci to.

255 Yèyè nè: “Nyingàlàlaayi, muntu nè muntu wa kunùdì, nè nùbatìjiibwè mu Dìnà dyà Yesù Kilistò bwà dilekelediibwa dyà mpèkaatù yènu, nènu nenùpete kupà kwà Nyumà Mwímpè. Bwalu mulayi wùdì kunùdì nwènu, nè kùdì bânà bèènu balèla, nè kùdì aba bàdì kule, nè mu búngì bwònsò bwàbìikilàbo kùdì Mukalenge Nzambi wetù abu.” Ke bwalu abu's. Pashìishe nsapi kubwelamù nè kucikànga, cyàkakàngiibwa mu Dyulu's!

256 Ke bwà cinyi Pòlò wàkambila bayiidi bàà Yone nè: “Bikèngela nùbatìjiibwè cyàkàbidì, mu Dìnà dyà Yesù Kilistò, bwà kwakidila dibàtiiza dyà Nyumà Mwímpè.”

257 Kùvwa muCìmanyè kwònsò eku to, udi muCìmanyè mpindyewu's! Huh! Bìdì ànu bìmpè. Aci ncikutàngile. Aci's ncilelèlè. Kàdi byà nzambi yisàtù, dibàtiiza dyà búsàtù kadivwakù dimanyike mu Èkèleeziyà to, mu Dipungila Dipyadiyà; ànu mu èkèleeziyà wa Kàtòlikè, nè èkèleeziyà wa Mishòonyi ùdì winaminakù. Tàngilàayi! Bantu bàábúngì mbafwànyine kunùbenga bwà bwalu abu. Kàdi, mwanèètù, bikèngela wàngate dipàngadika dyèbè.

258 Mpindyewu wèwè udi wamba nè: “Mwanèètù Branham, mémè's ntu mubàtìjiibwè mu dìnà dyà ‘Taatù, Mwànà, nè Nyumà Mwímpè.’ Mémè ndi nè dibàtiiza dyà Nyumà Mwímpè.”

259 Ncyèna ngèlèlè dìyi dyèbè mpatà to. Ncyèna nè kabingilà nànsha kàmwe kàà kwela dìyi dyèbè mpatà to; ndi ncìtabuuja. Ndi ngùtabuuja nè Nzambi wàkabàpèèsha Nyumà Mwímpè, kuntu kwàka kumpàlà kwà kubàtìjiibwabò mene; kàdi pàakabàmbilà Peetèlò cyà dyenza, bàakaya kacyènzà. Ncyà bushùwà. Mpindyewu nudi bamanyè cyà dyenza, ncyà bushùwà; kàdi wèwè mubenge kwendela mu Bukènkè pàdì Bukènkè

bùpàtuka, uyààya mu midimà. Èyo! Amen! Èyo. Mfwilaayiku luse. Ncyèna muswè bwà nwènù kumfwila luse bwà dyela dyà mbilà nè “biikalè nànkù” ku Dìyi dyà Nzambi to. To, mukalenge. Nèngèlè cyàkàbìdì lubilà nè “amen”. Ncyà bushùwà. Èyowà’s, mukalenge.

Bwà cinyi kubàtiiza mu Dìna dyà Yesù Kilistò, Mwanèètù Branham? Udi wenza nànkù bwà cinyi pamutù pàà “Taatù, Mwànà, Nyumà Mwímpè”? Bwalu ke cìdì Bible ùlongesha’s! Aci nciòòkesha anyi?

Cyùdì oweshilangana màyi ku makàsà ncinyi, Mwanèètù Branham? Bwalu Bible ùdì ùlongesha nànkù. Ndi ngiitabuuja Èvànjeeliyò mu kaabujimà. Èyo, mpindyewu.

Dibàtiiza dyà mafi dyùvwà mwakule adi ke cinyi’s? Ke dyòdì adi. Ke dyòdì adi menemene. Mwaba mukwàbò nànsha wùmwè. . . Balàayi mu Dipungila mwàmwa bwà kupeta mwaba wùdiku muntu umwèpelè. . .

²⁶⁰ Mpindyewu bwènù nwènù bânà bèètù bananga, ncyèna nnùtapa ku mwoyi to, ncyèna muswè kwenza nànkù nànsha. Ndi nnùlòmba bwà kwikala badipwekèshe nè kanùyì. . . Tàngilàayi cintu eci mu mpàlà, kàdì nùmonè cidìci cimwèka. Citàngidilaayi mu Bible, kí mmu èkèleeziyà wenù anyi mu cintu cikampàndà cyà cikùtākàne, cyà budingidingi cìdì muntu kampànda mudyùje naaci mutù to, kàdì tàngilàayi ku Dìyi dyà Nzambi. Bushùwà’s!

²⁶¹ Nudi nwela meeji nè Nzambi wa Bukolè bwònsò mmufwànyine kumpa mudimu wa bwambi wùdiYe naawù eku nè eku mùshindù ewu awu, nè bimanyinu bitàmbe-mfùkulu nè bintu bitù kacya kabìyi byànji kumòna kacya ku Dipungila Dipyadìpyà, kàdì kundekela ngèndela mu cilèma mùshindù awu anyi? To nànsha kakesè! Nènku, mwanèètù, pangààfùma dyàmwàmwa dyà mbù, ndi mpicishila citùpà cyà citàmbe bunène cyà díbà dyànyì kí mmu dyondopa dyà kùdì Nzambi nè bishimà to kàdì mu diyiisha dyà Dìyi dyà Nzambi. Aci’s ncyà bushùwà menemene. Bulelèlè menemene. Mpindyewu twànji tùmònàayibi’s.

38. Èkèleeziyà ewu ùdì ùlongesha nè bìdì bìkèngela bwà wèwè kwakula mu myakulu bwà kupeta Nyumà Mwímpè anyi?

²⁶² To, mukalenge. To, katwèna tulongesha nànkù to. Dyakula dyà mu myakulu ndipà dyà Nyumà Mwímpè, nwamònu’s, kí n’Nyumà Mwímpè to. Ndipà. Muci ewu wùdì wùkwàma bimuma byà mìshindù citèemà. Ncyà bushùwà anyi?

²⁶³ Wèwè mutàngile ku mucì wà pommes, mwikàle nè bimuma byà pommes, udi wamba nè mmuci wà pommes. Paùdì utàngila mucì kampàndà, mwikàle nè poires, s’udi wamba nè mmuci wà poires. Nànsha wòwù mwikàle nè bizubu byà sikòmò pambidi, kàdì mwikàle nè poires, mwoyi wàwù ùdì cinyi? Mwoyi wàwù’s mmwoyi wà mucì wà poires. Ncyà bushùwà anyi?

264 Mpindyewu, Muci wà Nzambi ewu wùdi wùkwàma mamuma à Nyumà citèemà. Ncyà bushùwà anyi? Èyo. Kùdi byònsò bishìilàngàne... Mbâmbè nè: “Umwe mmupèeshìibwe dilonges-... dimanya, lungènyì, luumvu, nè dyakula dyà mu myakulu, dyumvwija dyà myakulu,” mapà citèemà mashìilèshìilàngàne à Nyumà àdi àtòloka pa Muci wà Nzambi ewu. Ncyà bushùwà anyi? Èè, mpindyewu, ànu dyakula dyà mu myakulu kì ndyòdi nkààyaadi to, kùdi makwàbò muntwamu, òwò pàawò.

265 Mpindyewu udi mwà kwakula mu myakulu kàdi kùyi ànu nè Nyumà Mwímpè to. Mpindyewu, vùlukaàyi ànu aci. Mvwa mu bulelèlè... Nkàadi mumòne baamwamùlopò nè baloji bàjuuka bàakula mu myakulu, kàdi kabèèna nè Nyumà Mwímpè to. Nudi bamanyè's, nkàadi mubàmòne bàbànda bèèla mbilà nè bàtùpika, kàdi kabàyi nè Nyumà Mwímpè to. Mvwa mwimàne mu dijà dyà maja à matalà mwab'ewu ànu àbidì ìdi panshì aa, pambèlu... nè kantu kakesè kàfùmina ku Douglas, mu Arizona, lwà kuntu kwàka. Mèmè kumòna maja à matalà awu pàvwàbo bàaja kuntwaku, nè muloji awu kupàtukayè kuntwaku kwenzayè maalu à lukutukutu byà byènta bwòwà, nè bikwàbò byònsò, kwenza lukutukutu nè kumwela lupwishi pambidi kuntwaku. Aci kacivwa cyùmvwija nè ùvwa musungìdiibwe nànsha. Muntu awu ùvwa—ùvwa mpàkààmàngà.

266 Mvwa mwimàne mu Inde... mu Àfrikè nè kumòna bampàkààmàngà bàjuuka nè bangeela kadyòmbò mùshindù awu, nè dikika dyàbò dyònsò adi, nè bànwina nè mashi mu kabalùbalù kàà mutù wà muntu. Ncyà bushùwà. Mbímpè ùmanyè cyùdi wamba paùdi ukungamangana naabù. Kàdi nkàadi mumòne bukolè bwà Nzambi wa Bukolè bwònsò bùswika muntu awu mu mùshindù wà kàciyi mwà kunyungakù to. Nànku díbà adi, mèsù èndè àbàlakana bu lumwènu mùshindù awu, nè bàmwambula bàya nendè. Èyowà's, mukalenge.

267 Mwanèètù, Nzambi mmulelèlè! Ncyà bushùwà. Kàdi Nzambi ùdi Nyumà, kèna ubùmbiibwa ànu ku dyakula dyà mu myakulu to, anyì *cikampàndà*, *cikansanga*, anyì *cikankènga*. Ndi ngàmba nè muntu kanà yònsò udi... Ke lutàtù lùdì mu èkèleeziyà emu ndwòlù alu. Nwamònu's, nudi... Mpenta wàkapàmbukila pa cintu cimwèpelè aci. Bàakafika kùdi bantu... Pamutù pàà—pàà kubàtentekela byanza, bwà bòbò kwakidila Nyumà Mwímpè, bàakabàtwàla ku cyoshelu nè kubangabò kubàtuuta tuumapì paanyimà bèèla mbilà nè: “Cyàmbè! Cyàmbè! Cyàmbè!” Kàdi kwamba kwambulula mwàkù kampàndà, too nè pàdibo bàpeta cibwejàkàjì kaciyì myakulu nànsha.

268 Muntu mùshùwashùwàlè wa Nyumà Mwímpè yèyè mulediibwe kùdi Nyumà wa Nzambi, yèyè neikalè nè nsòmbelu wa difwàna dyà Nzambi. Bàmwè bàà ku bantu abu bàvwa nè nsòmbelu yà yikwàcisha bwòwà, nè nudi bamanyè nànku's, nè

mamuma àbò àkajaadika nè kabàvwa balediibwe nànkù to. Yesù wàkamba nè: “Ku mamuma àbò nkunwàbàmányinà.” Nè mamuma à Nyumà kí ndyakula dyà mu myakulu to, aci’s ndipà dyà kùdì Nyumà.

²⁶⁹ Peetèlò kàtukù kacya mwâmbè nè: “Nyingàlàlaayi, nè nùbatijiiibwè mu Dìnà dyà Yesù Kilistò, nenùpetè Nyumà Mwîmpè” to. Yèyè wàkamba nè: “Nenùpetè kupà kwà Nyumà Mwîmpè,” pàakumwàbo myakulu eyi nè bantu munkaci mwà kwakula. Ndimwè dyà ku mapà à Nyumà Mwîmpè àdìbo bàpeta. Amen. Èyo. Bikèngela ndwijakajè.

39. Ndi nè bânà bàà balùme bàbìdì (umwe, ùdì nè bidimu bìbìdì; nè umwe, ùdì nè bimu bàtaanu), nè mbamyaminyiibwe mâyi pa mutù. Bàvwa nè cyà kubàtijiibwa mu kwinyijiibwa kwà mu mâyi anyi?

²⁷⁰ Èè mpindyewu mwanèètù wa bakàji anyi mwanèètù wa balùme, nànsha wèwè mwikàle nganyi, aci’s ncikutàngile. Mémè ndi nè mwànà mukesè wa bakàji... Mwanàanyi mukesè wa balùme, Billy Paul, ùvwa nè bidimu dikùmi nè bisambòmbò, ke mémè kumubàtiiza mu Dìnà dyà Mukalenge Yesù mwab’ewu mene. Mwanàanyi mukesè wa bakàji ùvwa nè bidimu mwandamukùlù. Kulwayè kùndì nè kusòmbayè pambidi pàanyi, nè kwamba nè: “Papa, ndi muswè kwitabuuja Mukalenge Yesù Kilistò, nè ndi—ndi muswè kubàtijiibwa.” Ke mémè kubatiiza mwànà mukesè wa bakàji awu nè mvùla mwandamukùlù. Pàdì, piikala bânà bakesè abu baswè kubàtijiibwa, bàbàtiizaayi. Kabiyi nànkù to, mòna’s, piikalàbo...yaayi ànu batàngile kumpàlà, aci’s ncikutàngile wèwè, cyònsò cìdì Mukalenge mwâmbè.

40. Aba bàdì nè dibàtiiza dyà Nyumà Mwîmpè nkààyaabu ke biikalè mu Dyambwibwa dyà Èkèleeziyà, anyi beena kwitabuuja bònsò nebàmonèshiibwè anyi?

²⁷¹ Katwèna...katwèna nè díbà dyà kulingisha aci to. Kàdì, mwanèètù, ànu Mukàji-musèla wa Nyumà Mwîmpè ke wìkala mu Dyambwibwa. Nwamònu anyi? Bible...?...bakwàbò kabààkujiminakù to.

²⁷² Tàngilàayi! Nganyi wàlumbulwisha buloba? Bansantu. Danyèlè wàkamba nè: “Ndi muMumòne, ùlwa kùdì Mukùlu wa Cikondo, nè—nè Yèyè wàkalwa nè binunu dikùmi misangu binunu dikùmi byà Bansantu Bèndè.” Ncyà bushùwà anyi? Dyambwibwa, Èkèleeziyà mumanè kuya. Pashìshe kupwekabò, nènku Cilumbulwidi cikaavwa citwàdije.

²⁷³ Nè Mikàndà yàkabuuludiibwa. Ncyà bushùwà anyi? Nè Mukàndà mukwàbò wàkabuuludiibwa, wùvwa Mukàndà wà Mwoyi awu, mwena kwitabuuja mujidila uvwa kàyi mupetè Nyumà Mwîmpè awu.

²⁷⁴ Yesù kààkalongeshakù nè baavirgò dikùmi bààkapàtukà bwà katwilangana nè Mubàki anyi? Nènku bàtaanu bàà

kùdìbo... anyi bônso bwàbù abu bàvwa virgò, bakezùke, bàà cijila. Nènku bôbò, *aba*, bààkaya mu tulù kàdi kabààkapeta Nyumà Mwîmpè to; kàdi *aba* bààkapeta Nyumà Mwîmpè nè bààkadi nè Maanyi mu myëndù yàbò. Nènku pààkalwà Mubàki, Dìyi kulwadi, dyèla lubilà, bôbò kwamba nè: “Kaa, túbwelàâyimu. Tùpèèshaayiku ndambù wa Maanyi ènù!”

²⁷⁵ Yèyè nè: “Ndàâyì kùdì bàdì bàsùmba, sambilaayi, nukaÀsùmbè mpindyewu.” Kàdi bôbò kabàvwa mwà kucyènta to. Nènku pàvwàbo bènda bàya apu, baa—baavirgò abu bààkabwela mu Didyà dyà Dibanjì, nènku bààkeediibwa mu mîdimù yà pambèlu, mùvwàbo bàdila myadi nè bàtwa mikèmù nè bàsumakaja mènù. Bwàkabuulwibwà, dilòlò dishààle edi, mu nshapità wa 12, dilòlò dyà kumpàlà kwà dishààle edi, kèna ùlongeshakù nè dragon mukúnze wàkapwìdija máyi mukana mwèndè bwà kwela *bashààdilè* bàà ku Dimiinu dyà mukàji abu mvità, bàvwà nè diitabuujà kùdì Nzambì nè balamè mikenji yà Yesù Kìlistò abu anyi?

²⁷⁶ Bwènú nwènú bakàji, panùdì nwadija citembelu apu. Ncipesè cîmpè cyà cilàmbà, cilàmbà cìmwècìmwè ciikàlemù, kàdi's nudi nwangata mùshindù *ewu* nutèèka citembelu cyènù ànu mu mùshindù wunùdì baswè kucikòsa awu. Nè pashìishe nucikòsa. Abu's mbunùtàngile. Kàdi nudi nwangata cilàmbà cinùdì nukòsa aci, bwà kwenzelakù civwàlù aci, nènku byàci bìdì bishààla abi bàdì bàkwàta naabi mudimu. Ncilàmbà ànu cîmpè mùdì bikwàbò byàci abi, kàdi ku disungula nkùdì musungùle *aci*. Ncyà bushùwà anyi? Bikwàbò byàci bìdì bishààle abi bìdì ànu byà cijila nè bìmpè ànu, nè byà musinga mukolè bu bikwàbò abi, kàdi aci's civwa ànu disungula dyèbè.

²⁷⁷ Nè Nzambì mmulayè nè twètù netùye mu Dyambwibwa ku disungula! Nè Bible mmwàmbè nè: “Nè bafwè bakwàbò kabààkiikala nè mwoyi to munda mwà bidimu cinunu.” Ncyà bushùwà anyi? Pa nàнку ànu... Kwàkujìminakù to, kàdi Mukàji-musèla muujìibwe tètè nè Nyumà Mwîmpè neàye mu Dyambwibwa. Bashààdilè bàà kùdìbo abu nebàpicile ku Cilumbulwidi; pàvwà Abu kabàyi naaci to.

41. Pùikalàbi nè udi nè cyà kubàtìijìibwa mu Dìnà dyà Yesù, bwà cinyi Yesù mmufwànyine kwamba mu Maatàayi 28 nè: “Bàtìijìibwàyi mu dìnà dyà Taatù, Mwànà, Nyumà Mwîmpè”? Alu lùdì ànu lùndì mfùmìna ku dyumvwija, alu nàнку's.

²⁷⁸ Èyo, nukàadi nucyòka anyi? Ndi mumanyè nè nukàadi nucyòka.

42. Kàdi Nzambì kàtukù nè kaneemu bwà dibàtiiza dyà “Taatu, Mwànà, nè Nyumà Mwîmpè anyi”? Kakwènakù bantu bàdì babàtìijìibwe mu dìnà, mu mènà aa, bapetè Nyumà Mwîmpè anyi? Yesù wàkalwa bwà kutùmbisha Taatù anyi? Dibàtiiza edì kí ndifwànyineku kwitabijìibwa anyi?

279 Èyowà, Yesù wàkalwa bwà kutùmbisha Taatù. Tàngilàayi mu Yone Munsantu nshapità wa 14. Ndi ànu bu... Ndi nè... Bu nwènu ànu mwà kwindilakù ànu bwà mikwàbò yisàtu cyanààna, netùlùjikijè, ngèèla meeji. Tàngilàayi, díbà adi tudi tupeta ndambù wa mikwàbò yà mipyamìpyà mààlabà, díbà adi, bwalu ncyà bushùwà nè nebàngalùjila yimwè kuumukila ku dilòdòlò edi, ngèèla meeji. Mònaayi's, eci ng'èkèleeziyà, nànsha nànkù, eci. Tudi tutùngunuka.

280 Tàngilàayi, Yesù wàkalwa bwà kumwènesha Taatù. Tàngilàayi, ku cibangidilu, Nzambì wàkenza muntu mu cimfwànyì Cyèndè Yèyè mwinè. Mmwómò anyi? Èè, Nzambì ncinyi? Nyumà. Yone Munsantu nshapità mwi4, Yesù wàkula nè mukàji wa ku ciinà cyà màyi awu, Yèyè kwamba nè: "Nzambì ùdi Nyumà nè aba bàdi bàMukuukwilà bàdi nè cyà kuMukuukwila mu Nyumà nè mu Bulelèlà." Ncyà bushùwà anyi? Pìikalàbi nè Nzambì wàkenza muntu mu cimfwànyì Cyèndè Yèyè mwine, mmuntu wa mùshindù kaayi wàkenzàYe díbà adi awu? Muntu wa nyumà.

281 Mu Genèsè 2, kakùvwa muntu bwà kudima buloba to, nè Nzambì è kwenza muntu ku lupwishi lwà buloba; kî mmu cimfwànyì Cyèndè to, kàdi mu cimfwànyì cyà mwoyi wà nyama. Nè Yèyè kutèeka nyumà wa muntu mu muntu nyama ewu kaaba aka, nè wàkalwa musùukà wùdi nè mwoyi. Mpindyewu, ke dishiilangana didi pankacì pàà muntu awu nè nyama ndyòdi adi.

Nyama kàtu wènza tudyèndelandelà to, kàtu wènza bintu bu mùdi kukwàcisha mwoyi wèndè, nè bikwàbò byà mùshindù awu nànsha. Yèyè nnyama, mubùla lungènyi. Kèna nè musùukà to. Kèna mwà kubala nè kufùnda to. Kèna mwà kuyiikila, kwakula to. Yèyè nkamàmà ànu mu kaabujimà.

Kàdi muntu ùdi mu mubidi bu mùdi nyama amu, kàdi ùdi nè musùukà wà Nzambì munda mwèndè, ùdi ùmuvwija kàyi mwà kufwà to. Nènku ùdi mwà kufwimba bintu... Tàngilàayi cidiye mwà kwenza's! Yèyè ukaadi pa, pàmwè nè yònsò, pa mwomùmwè nè Nzambì, bwalu yèyè mmwàna wa balùme wa Nzambì mu ngiikàdilù wèndè wa mudishinde awu. Yèyè's mmulenga wa dikèmà's! Mutàngilaayi nùmonè's! Nwamònu anyi? Ke bwalu abu's.

282 Díbà adi pàvwà muntu ùdìshinda mu mubidi... Nè pìikalàbi nè Nzambì wàkatùma muntu-nkààyà mukwàbò kàyi Yèyè mwinè to, Úvwa mwena kansungànsungà. Mùshindù wùmwpelè wùvwà Nzambì mwà kucyènza mu mùshindù mujaalàme wùvwà wà kwangata kaaba kaa muntu awu Yèyè mwinè.

283 Ambàbi tũng bu mèmè mwà kwenza nè Mwanèètù Neville àfwilèku mukàji ewu kaaba aka? Ambàbi tũng bu mèmè mwènzè bwà mukàji ewu àfwe bwà mukàji ewu mwaba ewu, bu nè bìvwa nè mèmè nguvwa nè bukòokeshi pa nwènu? Ncyèna

mufwànyine kwikala mwakàne kàdi kwenza nàнку to. Bu mèmè mushindùmune lufù, nè muswè bwà wikalè nè mwoyi, bikèngela ngàngatè kaaba kèèbè bwà kukubingisha.

²⁸⁴ Nè pashìshe Nzambì, Uvwa mu cimfwànyì cyà Nyumà awu...kàyi nè cimfwànyì to, èyowà's. Bible mmwâmbè nè: "Nzambì kàtu nè mbùngakeenu to." Èyo. Pashìshe byàkakèngela bwà Nzambì kulwata mmwènekèlu, nè Wàkabwikidija virgò kampàndà nè mundidimbi nè kufùka munda mwèndè Kabùlù kàà Mashi, kakùyì disangila dya mulùme nè mukàji anyi cintu kampàndà cyà dyenza to, nè kufùka Kabùlù kàà Mashi kààkadyunda kulwa Mwànà wa Nzambì. Nènku Nzambì wàkatùùluka nè kusòmbela mu Mwàn'Èndè, Kilistò Yesù, kuMuvwija Nzambì pa buloba.

²⁸⁵ Pàdibi nè, Yone Munsantu...Toomààsè wàkamba nè: "Mukalenge, tùleejè Taatù, nè cidi citùkumbana."

²⁸⁶ Yèyè nè "Ndi neenu ntàntà mule be kàdi wèwè kwèna muMmanyè to?" Yèyè nè: "Bwà cinyi udi wamba nè: 'Tùleejekù Taatù?'" Mòna's, Yèyè wàkamba nè: "Paùdi uMmòna Mèmè udi umòna Taatù. Mèmè nè Taatù Wanyì tudi Umwe. Taatù Wanyì mmusòmbèle munda Mwànyì."

²⁸⁷ Inàbànza kampàndà mwab'ewu ànu àbìdì àdi panshi aa, mvwa nyiikila mwab'awu, kutùpikayè, wamba nè: "Kaa, Mwanèètù Branham," yèyè nè, "ndi mumanyè cyùdi muswè kwamba aci. Bàdi umwe, ncyà bushùwà nè bàdi umwe." Yèyè nè: "Wèwè nè mukàjèèbè nudi umwe, pèènu's. Ke mùshindù wà bùmwe wùdibo ngwòwò awu."

²⁸⁸ Mèmè nè: "Mfwilèku luse," mèmè nè, "kabyèna nàнку to." Mèmè nè: "Udi mummòne anyi?"

Yèyè nè: "Bushùwà's."

Mèmè nè: "Udi umòna mukàjàànyì anyi?"

Yèyè nè: "To."

²⁸⁹ Mèmè nè: "Mwaba awu's! Dìbà adi bàdi mu mùshindù mushiilàngàne wà bùmwe kutàmba wùndi mèmè nè mukàjàànyì twikalangana." Nwamònu anyi? Mèmè nè: "Ncyà bushùwà."

²⁹⁰ Yesù wàkamba nè: "Kanwèna mwà kuMmòna Mèmè kanùyì numòna Taatù to." Nànsha kakesè! Ncitùpà ciibìdì cyà kaludikilu kàà makàsà àsàtù aku, kaludikilu kàmwèkàmwe aku. N'Nzambì. Yesù Kilistò ùvwa anyi Nzambì anyi museeswishi mutàmbe bunène ukaadiku bàà pa buloba bapeté.

²⁹¹ Tèèlejààyi! Mukàji mukwàbò wàkangambila ànu àbìdì àdi panshi aa, wamba nè: "Nènkujaadikilè," mukàji mwena Science Chrétienne. Mpindyewu, wèwè mulundà wanyì mwena Science Chrétienne, ikàlà nè kaneemu bwà katanci kakesè cyanààna, nwamònu's. Yèyè nè: "Mèmè nènkujaadikilè nè Yèyè kàvwa cingà cintu to ànu muntu wetù ewu." Yèyè nè: "Wèwè udi utàmbe kuzànjika Yesù bikolè be."

292 Mémè nè: “Bu mémè mwà kuzànjika muunyà nè bufùku ncìvwa mwà kuMupèèsha cidi ciMukùmbànyine aci to.” Mémè nè: “Kabyèna bikèmesha to mùdi. . .”

293 Mòna’s, Yeshàayi wàkateeta kuMutwà mènà, wàkamba nè: “Yèyè m’Mukèmeshi, Mubedyanganyi, Mfùmù wa Ditalala, Nzambì wa Bukolè, Taatù wa Kashidi.” Byònsò abi! “Yèyè ùdi Alpha, Omega, Cibangidilu nè Ndekeelu, Muji nè Mùtòlokù wà Davidi, Mùtootò wùdi Wùbàlakanà wà mu Dindà; Taatù, Mwànà, nè Nyumà Mwímpè.” “Munda Mwèndè mùvwa musòmbèle kaabujimà kàà Bunzambì mu mùshindù wà mubidi,” mmùdi Bible mwàmbè. Kaabujimà kàà Nzambì kàvwa munda Mwèndè!

294 Yèyè nè: “Nènkwbambilè nè, pàakayaye bwà kasambidila Lazàrò, bwà kubiisha Lazàrò ku lufù,” yèyè nè: “Nènkujaadikilè nè yèyè ùvwa ànu muntu wetù ewu.”

295 Mémè nè: “Twànji tùmonèbi mùdi ucyenza!”

296 Yèyè nè: “Bible mmwàmbè nè: ‘Yèyè wàkadila mwadi.’ Nè aci’s cidi cijaadika nè yèyè ùvwa muntu, ùvwa mwà kudila mwadi.”

297 Mémè nè: “Bushùwà’s, awu’s ùvwa m’Mwànà uvwa udila.”

298 Yèyè ùvwa Muntu-Nzambì. Ùvwa muntu wa buumùntù pàsàtù ànu bu mémè, bu munùdi; tudi musùukà, mubidi, nè nyumà. Yèyè ùvwa Taatù, Mwànà, nè Nyumà Mwímpè, mu Bunzambì bwà Nzambì; ke CyàkadiYe aci’s. Ùvwa Bunzambì Yèyè mwinè! Mmunyi mùvwàYe mwà kwenza cintu kampànda muntwamu pàdi. . .Bèndè bânà Yèyè mwinè bèèla mbilà bālòmba Mashì Èndè? Bu nè civwa ncintu kampànda cikwàbò. . .Aci’s civwa mbânà Bèndè Sungasunga bèèla mbilà bālòmba Mashì Èndè; kabyèna bikèmesha to mwàkadilàYe mwadi bwàbò. Mmunyi mùdi muntu mufwànyine. . .nè bânà Bèndè Yèyè mwinè bèèla mbilà bālòmba Mashì Èndè, mmunyi mùdiYe mwà kudyùmvwa? Anyi kubàpiisha mu ifernò bwà kashidi, anyi kufila mwoyi Wèndè; Yèyè ùvwa Nzambì mwikàle ùfila mwoyi Wèndè bwà bânà Bèndè! Bunzambì bùvwa busòmbèle munda Mwèndè! Ke civwàYe ncyòci aci.

299 Mukàji awu kwambayè nè: “Tàngilà,” yèyè nè, “Révérend Branham, nènkujaadikilè! Pàakadilàye mwadi apu, cyàkajaadika nè yèyè ùvwa muntu.”

300 Mémè nè: “Inàbànzà, Yèyè’s ùvwa muntu pàvwàYe ùsambi-. . .anyi pàvwàYe ùdila, ncyà bushùwà. Yèyè ùvwa muntu pàvwàYe ùdila mwadi apu, kadi pàakwololàYe mubidi Wèndè mukesè wà mutekètàngàne awu nè kwambila muntu uvwa mufwè kùkaavwa matùkù ànaayi nè: ‘Lazàrò, pàtukà!’ Nè muntu uvwa mufwe kùkaavwa matùkù ànaayi, mubole, nè misàndà yà mu dikoba yènda yidìkoka munda mwèndè, dibola dyàkamanya Mfùmwàdi nè musùukà wàkamanya Mufùki wawù, nè muntu uvwa mufwè kùkaavwa matùkù ànaayi kwimanayè

ku makàsà èndè nè kushààlayè cyàkàbìdì nè mwoyi! Awu's ùvwa mutàmbe nè muntu!"

301 Ûvwa muntu pàakatùùlukàYe ku mukùnà dilòòlò adi, mwikàle nè nzala, wènda ùkènzakana ku mucì ùkèba cintu kampàndà cyà kudyà. Yèyè ùvwa muntu pàvwàYe wènda ùkèba cintu kampàndà cyà kudyà ku mucì wà mfigi awu. Kàdi pààkangatàYe mampà àtaanu nè mishipa yibìdì nè kudiisha bantu binunu bitaanu apu, aci's cívwa citàmbe nè muntu! Aci's cívwa n'Nzambì muntwamu! Mufùki umwèpelè Uvwa mwà kwangata mushipa mulàmba nè kuwùcìbulula nè ùcívwa ànu mushipa mulàmba, kwangata dyàmpà dyosha nè kudicìbulula; nkapwishipwishi kàà mùshindù kaayi kààkalekelelàYe aku's? Alèluuyàh! Yèyè ùvwa Nzambì, Mufùki wa tupwishipwishi nè bintu byònsò! Aci's cívwa citàmbe nè muntu!

302 Ûvwa muntu pàvwàYe kuntwaku mu bwàtù abu dilòòlò adi, paanyimà pàà mumane kuyiisha ditùkù dijimà nè dyondopa dyà babèèdì, mucyòke bikolè, mu mùshindù wà nè démons binunu dikùmi yà mu mbù midicìpe nè neyiMushebèyè. Kaabwàtù kakesè kàà kale aku kuntwaku, kàdikùpa eku nè eku cyenzè bu cijìkù cyà mùlàngì, mavwala manène àpenya ku mwaba nè ku mwaba, kàdi Yèyè mudyolòle, mucyòke cyò mu mùshindù wà nè mavwala kaàvwakù mwà kuMubiisha to. Démons yivwa munkacì mwà kukungula, yàmba nè: "Netùmupetè mpindyewu pàdiye mulàale tulù apu." Kàdi pààkabiikàYe, mwab'awu, Yèyè ùvwa muntu, Yèyè ùvwa mucyòke bikolè. Kàdi pàakatèekàYe dikàsà Dyèndè pa mubàngubangu wà bwàtù, kwela mèsù pambèlu kwamba nè: "Ditalala, shààla mupùwe!" nènku mpeepèlè nè mavwala kuMutùmikilabì. Awu's ùvwa mutàmbe nè muntu! Awu ùvwa n'Nzambì, Mufùki Wàkenza Maulu awu.

303 Kabyèna bikèmesha to pààkambà mùpostòlò awu nè: "Ewu mmuntu wa mùshindù kaayi mene udi mpeepèlè nè mavwala bìMutùmikila's wè!"

304 Awu's ùvwa mutàmbe nè muntu. Awu's ùvwa n'Nzambì. Yèyè ùvwa muntu pàvwàYe mupoopela pa nkùrusè bu Mulàmbù, bwà kuumusha mpèkaatù. Yèyè ùvwa muntu nè misonso miMucimpika mu cyanza. Yèyè ùvwa muntu nè mèbà ku mutù Wendè. Yèyè ùvwa muntu nè matè à tuseku twà bàsàlaayi pambidi Pèndè. Yèyè ùvwa muntu uvwa mucibùdiibwe, mutuucìke mfimbù, nè mutàpìke. Yèyè ùvwa muntu's! Yèyè ùvwa muntu pààkeelàYe lubilà nè: "Nzambì Wanyi, WàNdekèdì bwà cinyi?" Yèyè ùvwa muntu ùdila mwadi ùkèba dikwàcisha. Kàdi mu dindà dyà Paasàkà pààkasùùludiibwa bitampì byà lufù ku lukità aku, awu ùvwa mutàmbe nè muntu! Wàkajaadika nè Yèyè ùvwa Nzambì.

Mu kwikala nè mwoyi, Yèyè wàkannanga; mu kufwà, Yèyè wàkansungila;

Mujiikiibwe, Yêyè wàkangata mpèkaatù yànyì
è kuya naayi kule;

Ùbiika ku lufù, Yêyè wàkabingisha cyanààna
bwà kashidi:

Dîngà ditùkù Yêyè ùlwalwa—kaa, ditùkù dyà
butùmbi's wè!

Kaa, munkaci mwà mbwebwe yitaayika nè
maulu munkaci mwà kufiikuluka,

Musùngidi wanyì kwinyika Yè mutù panshi nè
kufwà;

Dikàngula dyà cilàmbà cikùdika kubuulula
njila

Ku masànkà à mu Dyulu nè ditùkù dyà kadiyì
ndekeelu.

305 Kabyèna bikèmesha to pàakeelà Eddie Perronet lubilà lukolè
nè:

Bònsò bàsekelelè bukolè bwà Dîna dyà Yesù!

Banjèlò bàponè mikookwela;

Lwáyì nè cifùlù cyà butùmbi cyà bumfùmù,

Nè nuMwasèci bu Mukalenge wa bònsò.

306 Ke Mupèrsonà munène awu, Mukalenge Yesù. Yêyè ùvwa
Yèhowàh, Nzambi mujìngila mu mubidi. Bible mmwàmbè nè:
“Cyònsò cinùkènjì mu dyakula anyì mu cyenedi, cyènzàayi
cyònsò mu Dîna Dyèndè.” Bible mmwàmbè nè: “Dìkù dijimà
mu Dyulu ndiinyikiibwe nè ‘Yesù,’ nè dìkù dijimà pa buloba
ndiinyikiibwe nè ‘Yesù.’” Tùsambilàayi mu Dîna Dyèndè,
twìkalàayi nè mwoyi mu Dîna Dyèndè, tulongeshàayi mu Dîna
Dyèndè, tufwayi mu Dîna Dyèndè, tujiikiibwè mu Dîna Dyèndè,
tubàtijiibwè mu Dîna Dyèndè, tùbiikè ku lufù mu Dîna Dyèndè,
tùyaayi mu Dyulu mu Dîna Dyèndè. Ke Dîna Dyèndè ndyòdi adi,
nè Mukàj’Èndè—musèla mwinyikiibwe dîna nè “Màndàmù Yesù.”
Necyùmushe cisàmbà mu bàà Bisàmbà byà bendè, bwà bwalu
bwà Dîna Dyèndè.

307 Nè mèmè ncyèna Unitaire to. To, mukalenge. Nwènu ba-
Trinitaires umùshaayi aci kule neenù. Mèmè ncyèna Unitaire to.
To, mukalenge. Mèmè ncyèna Unitaire, anyì trinitaire to. Ndi
ngiitabuuja cidi Bible wamba. Aci's cidi mu cyòci menemene.
Amen. Yòyòyò! Ndi munènge bikolè pa lumwèpelè. Cìvwa ncinyi
aci? Mvwa mulùpàtùle anyì? Anyì, tùmonebi, cìvwa ncinyi? Kaa,
èyowà's, ncyà bushùwà, bwà . . . mùvwà Taatù mu Kilistò amu.
Yêyè ùvwa Muntu, Ùvwa Muntu-Nzambi.

**43. Èkèleeziyà wa beena Mpenta kèna ùbàtiiza mu Dîna dyà
Taatù, Mwànà, nè Nyumà Mwimpè anyì? Yimwè yà ku yòyi's.**

**44. Muntu yêyè mufwè kàyì nè dibàtiiza dyà Nyumà Mwimpè
to, neikalè mujimine anyì?**

308 To, mukalenge. Yêyè mwikàle mwena kwitabuuja, neàbwele
mu dibìikà dyà ku lufù, dibìikà dyà ku lufu diibìdì. Yêyè

nè dibàtiiza, neàye mu dibìikà dyà kumpàlà dyà ku lufù. Mpindyewu, nudi nè cyà kwangata diyì dyanyi menemene. Aci cyôci kaciyi cisankisha to, dîbà adi nùdi—nùndòmbè, nènùpèèshè Mufundu. Bwalu, ndi nteeta bwà kwangata mikwàbò yibìdi anyi yisatù eyi kaaba aka, dîbà adi kwètù nkujikè.

45. Mwanèètù Bill, Bible ùdikù wàmba cintu kampàndà pa bwalu bwà twartà twà mfrangà anyi?

³⁰⁹ Èyo, Ùdi wàmba nàнку, kàdi ncyèna mwà kucitèèla mpindyewu to. Ndi mumanyè nè bàsàlaayi bààkeela nshòòbò bwà bilàmbà Byèndè, nè bikwàbò mùshindù awu, kàdi ncyèna mwà kucyàmba to.

46. Udiku mwà kuumvwija Kolintò wa Kumpàlà 15.29 anyi?

³¹⁰ Mpetèlèku bwalu abu mwómò amu, bu wèwè mwà kuswà, Mwanèètù Neville, Kolintò wa Kumpàlà 15.29. Netùcipetè.

³¹¹ Mpindyewu, nènku pàmwāpa màalabà ndi mwà kunùpetelaci cyàkàbìdi. Bu mùdi. . .Màleetà awu, mùshindù mwinè wùdiwu àbadiibwa ku dileeta ku dileeta nè: “VICARIVS FILII DEI.” Nwènù naaci dijinga, mmanyishaayi.

47. Ciprófetà cyà Yèhezèkèlè 38 nè 39 necyùlè kumpàlà kwà Dyambwibwa anyi?

³¹² Ncyèna ngèèla meeji nè bìdi nàнку to. Ndi ngèèla meeji nè cintu cìdi cìlondà citùdi bindile n’Dyambwibwa dyà Èkèleeziyà. Nè pashiishe: “pààpweka Ogà nè Magògà,” ke bilwilu byà beena Russie bìdi bibwelà mu. . .

³¹³ Tàngilàayi, Mukalenge Bohanon ke uvwa pa ciibidilu mulombodi mwab’ewu wa Midimu yà Cyápù cyà Mbùlāmatadi, mwena Kilistò wa maalu malenga wa dikemà. Ke yèyè kwakula naanyi dīngà ditùkù, kwambayè nè: “Billy, ndi muteetè kubala, nè ndi muteetè kulòmba mpaasàtà wanyi bwà kuumvwija Bwàkabuulwibwà.” Yèyè nè: “Tudi bafike kuntwaku nè twètù kuCibwejakaja cyònsò.” Yèyè nè: “Yone ùvwa nè cyà kwikala mudyè cintu kampàndà—kampàndà dilòòlò adi nè mupetè cilòòta.”

Mémè nè: “Mukalenge Bohanon, bundù bwèbè.” Mémè nè. . .

Yèyè nè: “Èè, muntu nànsha umwe kèna mwà kuumvwa Aci to.”

³¹⁴ Mémè nè: “Kî mmuntu wa mubidi to, kàdi Nyumà Mwîmpè ùdi mwà kuCibuulula.”

³¹⁵ Yèyè nè: “Èè, tàngilà kùnweku, Billy.” Yèyè nè: “Mukàji-musèla ùvwa mwimàne pa Mukùnà wà Sinaayi. Kàdi ke màyi ngòwò aa mapwidija mukana mwà dragon, bwà kwenza Mukàji-musèla mvità—mvità. Nè Mukàji-musèla ùvwa mu Dyulu musangu wùmwèwùmwè awu. Difwànyikijilaayi aci’s!”

316 Mémè nè: “Mukalenge Bohanon, cintu cimwèpelè cyúdi naaci, udi nè bintu bisàtù bishiilàngàne bisopakaja, ucibiikila nè ‘Mukàji-musèla.’ Udi ubiikila *binunu lukàmà nè makùmi ànaayi nè binaayi*, biiwà biimàne nè Mwànà wa mùkòòkò pa Mukùnà wa Sinàayi nè: ‘Mukàji-musèla.’ Kabàvwa nànkù to. Udi ubiikila (ewu wàkapwìdija màyi mukana mwèndè, bwà kwenza mvità nè) *bàshààdìlè* bàà ku Dimiinu dyà mukàji, bàvwà kabàyi Mukàji-musèla abu; Aci ke civwà cishààle ncyòci aci. Mukàji-musèla ùvwa mu *Dyulu*; binunu lukàmà nè makùmi ànaayi nè *binaayi abi*; nè mwena Kilistò wa ku dìnà awu ùpicila *apa* mu dikèngeshiibwa. Nènku aci’s ncyà bushùwà.”

317 Balà, mwanèètù, mpindyewu panwìkalà naaci. [Mwanèètù Neville ùdi ùbala Kolintò wa Kumpalà 15.29—Muf.]

[*Ncinyi cikwabò cyènzabo kùdi bàdi babàtìjìibwe bwà bafwè, piikalà bafwè kabàyi bàjuuka nànsha kakesè? bwà cinyi bàakabàtìjìibwa dìbà adi bwà bafwè?*]

318 Mpindyewu, mpindyewu, bânà bèètù, kùdi cisàmbà cimwèpelè—cimwèpelè cìdì cìtabuuja aci, bàdi babàtìiza bwà bafwè, mbeena Mormon. Kàdi’s mwà mu ntempèlù yàbò, misangu yàbùngì, mbantu bìmpè bàà menemene. Nènku udi mwà kwikala mwena Mormon, mpindyewu’s. Ncyèna nteeta bwà kukutàpa ku mwoyi to. Kàdi, wèwè mulundà wanyi munanga, kwèna mwà kubàtìjìibwa bwà tatwèbè to; aci ncyenzi civwà cikèngelà bwà yèyè kwenza. “Kùdi mucì mwinàmìne aku, ke kùdiwu wùpònena.”

Pòlò, pàdiye wàkula kaaba aka, ùvwa wàkula bwà “mufwè,” Yesù Kilistò, “piikalàbi nè bafwè kabèèna bàbiika to, bwà cinyi udi mubàtìjìibwe mu Dìnà dyà Yesù Kilistò dìbà adi piikalàbi nè bafwè kabèèna bàbiika to?” Nudi numòna cìndi muswè kwamba aci anyi? Dìbà adi udi. . . Yèyè nè: “Tùdyayi, tùnwayi, nè tucyònkomokàayi, bwalu mààlabà tudi tufwà, piikalàbi nè bafwè kabèèna bàbiika to.” Kàdi yèyè ùdi ùtùngunuka nè kutumbisha Nzambi bwà dibiishiibwa dyà bafwè. Nènku tudi babàtìjìibwe kùdi Yesù Kilistò, ku lufù Lwèndè, dijiikiibwa, nè dibiikà dyà ku lufù. Ke bwà cinyi tudi babàtìjìibwe bwà “bafwè.” Èyo.

Ndi ngèèla meeji, mpindyewu nè, elu lùdi ànu bu lukwàbò lùmwè paanyimà pàà elu nùnkù.

48. Mwanèètù Bill, bu wèwè mwà kuswà ngambìlèku mùshindù wà—wà kupeta dibàtìiza dyà Nyumà Mwìmpè. Nku disambila, mwoyi mulekelela, kuMwitabuujà bu mutùdi twitabuujà dyondopa anyi? Ndi mumanyè cìdì kwikala nè diitabuujà bwà dyondopa pawàkansambidila mwab’ewu. Nudi nusambila nè nutentekela byanza, bwà dibàtìiza dyà Nyumà Mwìmpè anyi? Ngàkabàtìjìibwa mu dìnà dyà “Taatu, Mwànà, nè Nyumà Mwìmpè.” Bu wèwè mwà kuswà ngambìlèku ní bivwa bikèngela bwà mémè kwikala

mubàtiiiibwe cyàkàbìdì mu Dìnà dyà Yesù, bu muwàkambà ànu matùkù makesè aa amu.

Mpindyewu, wêwè mulundà wanyì mwena Kilistò munanga, ncyèna nkwambila cyà dyanza to. Ndi ngàdija ànu Mufundu panshi cyanàànà. Nènku nudi bamanyè mùdì bwalu's, mùdì Nyumà Mwîmpè mwà kulwa mpindyewu mene patùdì twakula apa. Nyumà Mwîmpè ndipà dyà kùdì Nzambi. Nwamònu anyi? Aci's ndipà dyà Nzambi. Ûdi mwà kulwa patùdì twakula apa. Nènku nènwwambilè nè, piikalà . . . Bu bantu balongèshiiibwe mu mùshindù mujaalàme, . . .

Bàmwè bàà kunùdì beena kale aba, lekèlaayi nnùkonkèku cintu kampàndà, nwènù beena kale bàtù mu tabernacle abu. Tàngilàayi pàndì mbatiiiza bantu. Nè nwènù bambi angàtaayi eci bu cileejilu. Ndi mulongeshe bantu abu too nè pàdìbo bàkezula nsòmbelu awu kumpàlà kwà kuyab ku màyi awu, nè mvwa mbàfikisha ku diitabuuja nè Nzambi ùvwa mwenzèjiiibwe bwà kushààla mukwàte ku mulayi Wèndè; pàvwbo ànu nè bábàtiiiibu mu Dìnà dyà Yesù Kilistò, Nyumà Mwîmpè ùvwa mwaba awu mene bwà kubàakidila. Nènku pàvwàbo bapàtuka mu màyi, bàvwa bàakidila Nyumà Mwîmpè. Ncyà bushùwà. Bu nwènù ànu . . .

³¹⁹ Balami bàà mìkòòkò, longèshaayi mìkòòkò yènù, ndàayi naayi mu Bible *emu*. Umùkaayi ku mukàndà wà kale wà èkèleeziyà kampàndà awu, nè pwekàayi mu Bible *emu* mùdì Nzambi mulongeshe, nènku kanwàkupeta ntàtu ayi to.

³²⁰ Èyo, ditentekelangana dyà byanza ke mùshindù wutùdì mwà kupeta Nyumà Mwîmpè, kùdì muntu kampàndà mulaaba ùtentekelangana byanza.

49. Mwanèètù Bill, cidi . . . Mbipàtùke mu bulongàme bwà muntu kampàndà kujuuka bwà kufila mikenji mu myakulu pàdì muyiishi munkaci mwà kufila . . . Dîyi anyi? Muntu ewu ùdi nè nkonko yisàtù kaaba aka.

49b. Nènku lukwàbò alu lùdì nè: **Kàbìdì, mbipàtùke mu bulongàme bwà kwenza mùshindù wùmwèwùmwè awu pàdìbo munkaci mwà kwenza dibiiikila dyà bantu ku cyoshelu anyi?**

50. Lwisàtù, lwisàtù alu: **Kàbìdì, ncipàtùke mu . . . Ncipàtùke mu bulongàme bwà muntu kampàndà kujuukayè mu èkèleeziyà nè kudyùla mwambi kampàndà bwà cintu kampàndà cidiye mwambe anyi mwenze munkaci mwà disangisha, pèndè yèyè paanyimà pàà cyambilu cyà cijila anyi? Bintu byònsò ebi mbyenjiiibwe mu tabernacle misangu nè misangu.**

³²¹ Mpindyewu, ngànji nye ku cyôci eci lùkàsàlùkàsà mpindyewu, eci cidi citàngile èkèleeziyà mpindyewu. Ndi . . . Mpindyewu, bwènù nwènù beenyi bàdì munkaci mwètù, bikèngela nnàngulèku èkèleeziyà kaadipi kakesè mpindyewu,

pa nàнку nudi—nudi ànu bu nudi mwà kushààla nè lutùùlù bwà katanci kakesè cyanààna, nwamònu's, bu nwènù mwà kuswà.

³²² Teèlejààyi, bânà bàanyi! Mapà awu mmalenga be. Muntu nànsha umwe kí mmumanyè mündi nwanýisha to, nè ndi munùngè nè dinanga dyà cijila. Kàdi mapà awu àdi mwà kunwènzela bwalu bubì kunùdi panwikalà kanùyì nukwàta naawù mudimu mu mwaba mujaalàme.

³²³ Tàngilààyi bantu leelù ewu, bantu balenga bàà dikèma mu budimi bwà bwambi, bàsambidila babèèdi nè bàfucisha mfrangà bwà bwalu abu. Aci's ncibi. Muntu yèyè nè diitabuuja bwà dyondopiibwa nè ùsambidila babèèdi, bìvwa bikèngela kwikalayè muntu wa bukàlànga bukùmbàne bwà kusambidila bantu kakùyì byà mfrangà to. Twasàkidila Nzambi! Mwanèètù, ndi muswè kwamba aci, kí mbwànyì mèmè mwinè to, kàdi bwà butùmbì bwà Nzambi, kacya musangu nànsha wùmwe ncitukù mwànji kwangata mfrangà kùdi bantu, anyì nì ncinyì cyà mùshindù awu to; nè kubènga, ànu menemene, mùlyìò mujimà, binunu nkàmà yìtaanu byà ndola, mu mulàmbù wùmwepelè. Nènku nwènù's nudi bacimanye; cìvwa mwaba ewu mene, cibèjibeji. Nwamònu anyi? Ncyà bushùwà. Kí mbwà... Paùdi wenza nàнку, neùjimije diitabuuja dyèbè kumpalà kwà Nzambi.

³²⁴ Mpindyewu nwènù bàdi bàakulà mu myakulu nè biikàle nè mapà à myakulu abu, Nzambi ànùbènèshè. Tudi neenù dijinga mu tabernacle ewu. Ndi muswè nwìkalè kaaba aka. Kàdi, mpindyewu, cintu aci—aci cìdi mu bulongàme, kanùcyenjìku pàdi muyiishi munkaci mwà kuyiisha to. Wèwè mwenze nàнку, udi pambèlu pàà bulongàme. Nwamònu anyi? Kwèna nè cyà kucyènzà to. Bwalu Bible mmwambè nè: “Nyumà wa mupròfetà ùdi ùkòokela mupròfetà.” Nènku pàdi muntu kampàndà munkaci mwà kuyiisha, yèyè's ki udi nè cyalu, yèyè ùdi nè batèèleji, Nyumà Mwimpè neàkwilè kùdiye. Pààjikijàye, pashìshe ke dîbà dyà mukenji adi, nudi numòna's. Pa nàнку kanùpàtuki mu bulongàme to; nwènù bènzè nàнку, dîbà adi nudi nwimanyika nènku nenwikalè—nudi nubungamija Nyumà Mwimpè nè mukenji wùdi munkaci mwà kupàtuka awu.

³²⁵ Mùnwemu emu ànu àbìdi mashààle aa, mwà nsanganyiibwa mu disangisha kampàndà mùnwemu mu Washington emu, bantu binunu byàbùngì bàvwa basòmbe mwaba awu. Nè mulongolodi wanyì wa ndongamu, udi muumvwiji mulèlèla wa Bible, ùvwa mwimàne mwaba awu wàkula bwà dyondopa dyà kùdi Nzambi, mwediibwe maanyì, Nyumà Mwimpè nguwwa wakula awu. Inàbànza kampàndà kujuukilayè kuulu nè kubangayè kwakula mu myakulu, nè kwindilayè ànu katanci kakesè cyanààna, pashìshe kubangayè. Nyumà Mwimpè wàkabanga...mubungàme, uvwa mwà kucimòna munkaci mwà bantu. Wàkabanga kwakula cyàkàbìdi, nè mukàji awu wàkiimana kuulu. Yèyè nè: “Mwanèètù wa bakàji, sòmba panshì, mu Dìna dyà Mukalenge.” Yèyè nè: “Udi pambèlu

pàa bulongàme.” Ke bambi kuyabo nendè kuntwaku nè kumuleejabò.

³²⁶ Mpindyewu, bwalu bùdi nè, mapà awu àdi pa buloba, àdi mu èkèleeziyà mpindyewu. Mapà adi mu èkèleeziyà, kàdi bânà bakesè bakwàte nè byà luse abu bàdi nè mapà awu kàdi kabàyi nè dilongesha bwà kumanya mwà kubikòntonona to. Nwènù bafwànyine kupanga kubikòntonona, neütambè kwenza bibi kupita munùdi mwà kwenza bîmpè. Nwamònu anyi?

³²⁷ Ànu mùdi muntu ùpàtuka, ùsambidila babèèdi nè muntu kampàndà wòndopiibwa, wàmba nè: “Mpindyewu, bìwwa bikèngela bwà wèwè kumpèèsha ndola cinunu bwà bwalu abu.” Mpindyewu, mmwenze bibi byàbùngi be kutàmba mùdiye wenza bîmpè. Bivwa bitàmbe bîmpè bu muntu awu mwà kufwà ànu difwa pamutù pàa kutwàla bundù bwà mùshindù awu pa bwalu bwà Kilistò.

³²⁸ Mpindyewu, paùdi. . . Pàdi mpaasàtà anyi mutangadiki, anyi ní nganyi yònsò udikù awu, ùdi ùyiisha, shààla wèwè mupùwe. Pòlò ngwákamba bwà kwenza cyòci aci, nudi numòna’s. Mpindyewu, ke pashiishe yèyè kwamba nè: “Nudi bònsò mwà kwakula, ku muntu ku muntu.” Aci’s ncilelèlà bikùmbàne. Ke yèyè nè: “Ndi muswè bwà nwènù bònsò kwakula mu myakulu. Abi’s mbîmpè.”

³²⁹ Kàdi kwèna mwà kwakula mu myakulu paùdi kùyì nè dipà dyà myakulu to. Nènku kakùyì mpatà nànsha kakesè to kùdi mapà àbùngi à nànku mu èkèleeziyà emu mpindyewu. Kùdi mapà àbùngi à cyòci aci mu èkèleeziyà wa ba-Méthodistes emu, kùdi àbùngi à ku ówò lwà mu èkèleeziyà wa ba-Baptistes emu, bu nè civwa ànu ciyiishiibwe bwà dipà dyàmòna mwà kudítwa ku mudimu.

³³⁰ Mùshindù kaayi? Wèwè mwele dimiinu mu buloba nè kùyì udiipidila to, ncinyi cyàdyènzekela? Nwamònu’s, nedishaalè mwaba awu mu lupwishi lùmè, nè kuboladi; kadyàkwambulwisha to. Mapà aa àkaadi mu èkèleeziyà kwine kwònsò aku, kàdi ànu mpindyewu màyi mmabange kumata, mvùla wa Mpenta, bwà kudimyamina màyi nè kukwàma mamuma. Mpindyewu, kukwàta naadi mudimu mu mwaba mujaalàme.

³³¹ Mpindyewu, cidi cyàmba nè, èè, ngèèla meeji nè lukonko lùvwà lùlondà lùvwàku, muntu awu kwelayè lukonko, kwambayè nè:

Pàdi. . . pàdibo bènza dibìkila dyà ku cyoshelu apu?

³³² To, ncyèna mufwànyine kwela meeji nànku dîbà adi to. Nwènù bamòne, nè angàtaayi Kolintò nè nùmubalè, bàmwè bàà kunùdi kaaba aka, nwènù—nwènù nè mapà à dyakula dyà mu myakulu, dîbà adi tàngilàayi. Mu Bible, pàvwàbo nè. . . paanyimà pàa disangisha dimanè kujika, dibènesha dyà Nzambi dyàkatùuluka pa disangisha, pashiishe kubangabo kwakula,

pashiishe kubangabo kutumbisha Nzambi. Nèngu, musangu wònsò, mmukenji wa buludi bwà muntu kampàndà. Kabiya . . . Bikèngela nùtábaleele aci mpindyewu. Nwamònu anyi? Kacyèna ànu cintu kampàndà mu musunya to. Neciikalè mukenji bwà muntu kampàndà, bwà muntu kampàndà kwenzaye cintu kampàndà, anyi cintu kampàndà bwà kwibaka èkèleeziyà. Neciikale cintu kampàndà bwà kutumbisha èkèleeziyà.

³³³ Ke mwaba wùdi beena Mpenta batwàle bundù ku dìnà dyàbò. Dìnà mene dyà *Mpenta*, nudi mwà kuditèela nè bantu nebùumukè ànu cyanààna bàmba nè: “Macimbu’s,” bwalu mbamòne lukutukutu bùngì cyanààna; pààbi, bantu biikàle mu meeji matòoke kàdi kabàyi balongeshiibwe to.

³³⁴ Pòlò mmwàmbè nè: “Pangààfikà ku èkèleeziyà wa beena Mpenta kuntu kwàka,” yèyè nè, “Nèncitèèkè mu bulongàme.” Cìdi nè cyà kwikala mu bulongàme, nè bintu byònsò bìdi nè cyà kwenzeka mu bulongàme, ànu mùdi Nyumà mubìlongòlòle. Nàngu yèyè nè: “Mpindyewu, bu mèmè mwà kubwela, nè nwènù bònsò nubanga kwakula mu myakulu; nè udi kàyì mulongèshiibwe yèyè mubwele, neàmbe nè: ‘Èè, nwènù bònsò kanwèna bapàle anyi?’; ùpàtuka ùya.”

³³⁵ Ke cyòci aci cidi èkèleeziyà wa beena Mpenta wènza. Yèyè kwamba nè: “Mpindyewu, pamutù pàà nè, bu umwe wa kunùdi mwà kwamba cipròfetà nè kubuulula minsokòntù yà cintu kampàndà, (umwe wa kunùdi bwà kwikala mupròfetà, mu ngaakwilù mukwàbò),” mwàkambàye, “dìbà adi bantu kabààkupònakù pànshì kwamba nè ‘Nzambi ùdi neenù’ anyi?”

³³⁶ Èè, mmunyi mùndiku mwà kuvila dipà dyà dyakula dyà mu myakulu pààbi mwà kukèngela bwà mèmè kuvila dipà dyà cipròfetà, s’bìvwa mwà kukèngela bwà mèmè kuvila makwàbò mapà aa’s? Mpindyewu, yàbùngì yà ku èkèleeziyà ayi, èkèleeziyà minène ayi, ba-Nazaréens, ba-Pèlerins de la Sainteté, nè bikwàbò, bàdi bèela meeji nè muntu yèyè wàkula mu myakulu yèyè ndémon. Aci’s ndipenda dyà Nyumà Mwimpè, mu mùshindù wà nè kakwènakù difwidiibwa dyà luse to. Ke cyàkenzà beena Yudà, bèèlulwila bantu nè Nyumà Mwimpè, nè bàakapiishiibwa nè kujìmina, bwà bwalu abu. Mmwòmò! Yesù kàakambakù nè: “Wèwè mwàmbè dýì dibi dimwèpelè bwà Nyumà Mwimpè, kadyàkukufwidiibwakù luse to ní mmu cikondo eci ní mmu cikondo cìcilwalwà anyi?” Nàngu nwàtapaayi ntààlà nwàdimuka; nwènù kanùyì nuumvwa to, sòmbaayi bapùwe.

³³⁷ Nè nwènù bàdi nè Nyumà Mwimpè nè babiikidiibwe bwà kubwela mu midimu, balongeshi . . . Mpindyewu, nudikù mwà kudifwànyikijila . . . mmèmè ewu mwimàne kaaba aka nteeta bwà kulongesha, nèngu ke muntu ewu ùtùmpika ùbànda apa, wimana ku luseka lwànyi, nè ùtwàdija kulongesha ànu pa dìbà

dimwèdimwè adi, muntu mukwàbò mwimàne lwà apa wimba musambu wà cyanga? Èè, ncibwejàkàjì kaayipu's wè!

338 Èè, mùshindù awu ke wùdibi bwà dyakula dyà mu myakulu. Cìlekèlaayi cìlwe mu bulongàme, ànu mwàcifulà Nyumà amu, udi mwà kwakula mu myakulu.

339 Mpindyewu wèwè udi wamba nè: “Èè, Mwanèètù Branham, ncyèna nè cìndi mwà kwenza to.”

340 Kaa, èyowà's, udi mwà kucyènza! Pòlò's mmwambè nè uvwa mwà kucyènza. Yèyè nè: “Kwòkò muntu kampàndà wa kunùdi, munkaci mwènù, udi wakula mu myakulu, kàdi kakùyì mwandamunyi to, yèyè àpuwè.” Nànsha cyòci ciswè kwakula bishi, shààla mupùwe. Aci's ndipà, mwanèètù. Ndi—ndi ndòmba nè, Nzambi neànyishè bwà mèmè kwenza ditàbuluja kaaba aka dimwè dyà ku matùkù àdi panshi aa bwà twàmònakù mwà kubwela mu bintu abi bwènù nwènù, nudi numòna's. Mwaba wùdi mwà kumòna nè ndipà, nènkù dipà adi ndiswè kukwàta mudimu dìbà dyònsò. Nwamònu anyi? Kàdi bikèngela wikalè nè lungènyì lwà Nyumà Mwímpè kaaba aka bwà kumanya dìbà nè mùshindù wà kukwàta mudimu nè dipà adi. Nènkù aci. . .

341 Wèwè udi wamba nè: “Èè, butùmbi kùdi Nzambi, Bible's mmwâmbè nè pàdi Nyumà Mwímpè ùlwa kanwèna dijinga nè mulongeshi nànsha umwe to. Yèyè ke Mulongeshi Yèyè mwinè.” Kaa, mwanèètù, mmunyi mùdiku mwà kwikala mukesè bikolè bwà kubala Mufùn-. . .Bwà cinyi Nyumà Mwímpè wàkatèeka balongeshi mu èkèleeziyà, dìbà adi's?

342 Wamba nè “Kabyèna bikèngela bwà muntu nànsha umwe kundongeshayè to. Nyumà Mwímpè ngudi undongesha.” Ùdi ùlongeshila, kùdi mulongeshi. Yèyè's ùdi ùteekà balongeshi mu èkèleeziyà.

343 Yèyè nè: “Bònsò mbalongeshi, bònsò mbàpostòlò, bònsò mmapà à dyondopa anyi?” Nyumà Mwímpè mmutèèke bintu ebi mu èkèleeziyà, nè Yèyè ùdi ùkwàta naabi byònsò mudimu, nè yònsò wa kùdìbo ùdi ùkwàta mudimu mu bulongàme.

344 Mpindyewu mbyenze ànu mùdi dikàsà dyànyì emu; dimwè dyà kùdiwo dyàmba nè: “Nyààya mu *nùnkù*,” dikwàbò dyàmba nè: “Ndi ngàalukila mu *nùnkù* ewu.” Mpindyewu, ciwènzà ncyènyì? Cyanza kwamba nè: “Ndi mbànda,” nè cikwàbò aci cinyunguluka mùshindù ewu. Mmu mbùngakeenu wa mùshindù kaayi wikala mubidi mwà kubwela? Nwamònu anyi?

345 Kàdi, mpindyewu, pìikalà meeji mwaba ewu àmba nè: “Dikàsà, asà lwendu ùye kumpàlà, bùbìdì bwènù. Cyanza, ndààku naabù. Mutù, shààla wèwè ànu mululàme. Mabòkò, enzàayi cintu cìmwècìmwè aci,” byònsò byenda mu dyumvwangana. Mpindyewu, pàngààfikà kuntwaku, ncyèna mukwàte mudimu nè mabòkò àanyì to. Mpindyewu, dikàsà ndìmanè kwenza wàdi mudimu, mpaasàtà wàjikijì diyiiisha;

mpindyewu, mabòkò, nwênù enzààyi wènù mudimu. Nwamònu anyi? Nudi bumvwè cìndi muswè kwamba aci anyi?

³⁴⁶ Èè, ambààyi bì tǔng bu mabòkò mwà kwololoka mùshindù ewu nè: “Kaa, cidi penyì? Cidi penyì?” nè makàsà munkaci mwà kuyiisha anyi? Nwamònu’s, kwèna mwànǎjì kufikakù to. Nwamònu’s, shààla pòlàà, dibòkò; neciikale dǐbà dǎ dyà kukwàtabò neebè mudimu paanyimà pàà katanci; indilà too nè pawàfika kuntwaku. Nudi bùmvwè cìndi muswè kwamba aci anyi? Ke dipà ndyòdì adi, ke dipà dyà Nyumà àdi munkaci mwà kukwàta mudimu.

³⁴⁷ Ndi munange Mukalenge. Kàdi nwênù pèènu? Amen. Tèèlejàayi, ndi mumanyè cintu cìmwèpelè cìndi mwà kwamba bwènù nwênù, ncyà bushùwà nè nudi nè lutùulù; tusunsa makùmi àbìdì paanyimà pàà dǐbà dikùmi. Mpindyewu, balundà bàanyi, tàngilàayi kùnweku mùshindù ewu mpindyewu. Ndi . . . Eci ke cìdì citàmbe bwìmpè cyà ku dyànyì pàànyì dimanya. Ndi nè cyà kulwijakaja mu mushiki wàayi munène ewu mùshindù ewu. Bu mèmè . . . Wèwè kùyi upetangana nè aci, kùmbèngi to. Wèwè ikàlà ànu mwanèètù wa balùme, wamònu’s. Ndi mukunangè, nè ndi ngàmba ànu bintu ebi bwalu bìdì mu mwoyi wànyì. Ke cìndi mèmè ngiitabuujà aci, nènku ke mùshindù awu wùndì ncyùmwijà, nè mùshindù awu ke wùndì ncitwàla, ncyà mu Bible.

³⁴⁸ Mpindyewu, wèwè wamba nè: “Mwanèètù Branham, mèmè ncyèna ànu nciitabuujà mùshindù awu to.” Abi’s nebiikalè bǐmpè menemene, nwamònu’s. Katwàdyàkwela meeji mu mùshindù mushiilàngàne to, netùtùngunukè ànu nè kwikala bu bânà bàà muntu nè balundà.

³⁴⁹ Nènku—nènku wèwè wamba nè: “Èè, mèmè—mèmè ndi ngèèla meeji nè mèmè mwikàle wa mu èkèleeziyà wa ba-Méthodistes anyi wa ba-Baptistes, Nànsha byà munyì nénsungidiibwè ànu.” Eyo, mwanèètù, abi’s mbǐmpè byà menemene. Ncìdì ànu nkubiikila nè “mwanèètù wa balùme,” bwalu udi witabuujà Yesù Kilistò. Nwamònu anyi? Ncyà bushùwà. Pa nàнку netwikalè bânà bàà muntu nè balundà ànu mwètù nè kale amu.

³⁵⁰ Kàdi ndi ànu ngàdijila èkèleeziyà ewu, mu matùkù makesè emu, Dilongesha didì èkèleeziyà wimanyina. Nwamònu anyi? Ke cidi èkèleeziyà útwa nyama ku mikòlò ncyòci aci! Nènku kwòkò mulami mwaba ewu udi kàyi wítabuujà dibàtiiza mu Dìná dyà Yesù Kilistò, nè dibàtiiza dyà Nyumà Mwǐmpè, anyi mapà à Nyumà miikàle mamwènèshìibwe, awu mulami yèyè, ànu mwab’ewu mene pàncidi mwimàne kaaba aka apa, kí mmukùmbànyìne kwikala mu èkèleeziyà to ànu yèyè mudilongòlòle. Aci’s ncyà bushùwà menemene. Nènku bìvwà bikèngela bwà kasùmbù kàà balombodi kumònakù cyòci aci. Menemene’s! Èkèleeziyà ewu kí mmukòntononyiibwe kùdì

balami to; èkèleeziyà ewu mmukòntononyiibwe kùdi Bible nè Nyumà Mwímpè, nkààyendè. Èyowà's, mukalenge. Mpindyewu, pa nàнку bintu abi, tudi twitabuuja nè ke Dilongesha dyà èkèleeziyà ewu ndyòdi adi.

³⁵¹ Katwèna nè byà buumambàlà abi to nànsha kakesè. Kakwèna muntu nànsha umwe cidimba kaaba aka to, kàdi muntu yònsò utu ulwa awu ncidimba, bwalu tudi twitabuuja nè tudi bònsò bidimba byà Mubidi wùmwè ku dibàtiiza dyà Nyumà Mwímpè.

³⁵² Nènku tudi tukwenzeja, wèwè mwanèètù munanga wa balùme mwena Kilistò anyi wa bakàji, bwà kubàtijiibwa mu Dìna dyà Yesù Kilistò nè kupeta Nyumà Mwímpè. Piikalàbi nè ukàadi mumanè kupeta Nyumà Mwímpè, paanyimà pàà wèwè mumanè kubàtijiibwa mu dìnà dyà Taatù, Mwànà, Nyumà Mwímpè, Nzambi àkubènèshè! Wèwè udi wamba nè: “Mwanèètù Branham, bìvwa bikèngela ngènzè cinyi pa bwalu abu's?” Lukonko alu lùkaavwa lwandàmùnyiiibwe. Mémè ndi mwà kwamba ànu muvwa Pòlò mwàmbè amu, udi nè cyà kubàtijiibwa cyàkàbìdi!

³⁵³ Mpindyewu, tàngilàayi kùnweku, Byenedi. Lekèlaayi nùbale eci, Ngalàtiyà 1.9. Cìfùndaayi, nwènù bàdi bàcìfùnda abu. Pòlò mmwàmbè, muntu umwèumwè wàkamba cyòci eci ewu, wàkalongesha cintu eci. Nudi nwitabuuja nàнку mpindyewu anyi? Ncyà bushùwà anyi? Pòlò ùkaavwa mubàmbile nè bìvwa bikèngela bwà kubàtijiiludiibwabò mu Dìna dyà Yesù Kilistò. Ke Pòlò kwambayè nè: “Bu Mwanjèlò wa mu Dyulu. . .” Ngalàtiyà 1.8: “Bu Mwanjèlò wa mu Dyulu mwà kunùlongesha cingà cintu pa kuumusha Eci, èdiibwè mulawu kunùdi.” Ìkalè mwèpiskòpò mutàmbidile, ìkalè paapà, ìkalè mwambi kampàndà, ìkalè mupròfetà kampàndà, ìkalè wa kuneemekiiibwa kampàndà, ìkalè Mwanjèlò wa mu Dyulu, anyi ní nganyi udiyè mwà kwikala awu, wàkamba nè: “Yèyè mulongèshe cintu kampàndà cikwàbò pa kuumusha Eci, èdiibwè mulawu kunùdi!” Ncyà bushùwà anyi? Nènku wàkacyàmbulula cyàkàbìdi, kwamba nè: “Ànu mùmvwà mwàmbè, ke mùndi ngàmba kàbìdi nè: Yèyè mulongèshe cingà cintu pa kuumusha Eci, èdiibwè mulawu!” Ncyà bushùwà anyi?

³⁵⁴ Pa nàнку Mukalenge ànùbènèshè. Ndi mucìbadile ku Dìyi, nènku nwàngataayi dipangadika dyènù.

³⁵⁵ Mpindyewu mbanganyi bàtù banangè musambu mwímpè wà kale awu:

Diitabuuja dyànyì nditàngile Kùdi,
Wèwè Mwànà wa mùkòòkò wà ku Kàlvaryò,
Musùngidi wa kùdi Nzambi;
Mpindyewu ngumvwilèku pàndi nsambila apa,
Umùshàku dipiilà dyànyì dyònsò,
Nènku anyishàku bwà kuumukila ku leelù ewu

Mèmè yònsò ngiikalè ànu Webè!

³⁵⁶ Ndi muswè kunùkonkakù cintu kampàndà, nwênù bàdì mu èkèleeziyà ewu aba. Bu muntu udi upùnga nè lufù munkaci mwà kuyiisha muntu udi upùnga nè lufù, mumanyè nè edi didi mwà kwikala diyiisha dyà ndekeelu dîndi mèmè nyiisha; nènku ndi nteeta kuyiisha diyiisha dyònsò dîndi nyiisha adi, bu nè òwà dyànyì dyà ndekeelu, bu muntu wa upùnga nè lufù ùyiisha muntu wa upùnga nè lufù. Mpindyewu ndi nnùkonka, bàna bèètù, nè nwênù baanyaànaanyì bàà mu musùmbà wa bantu ewu nè mu ditùnga emu nè, nudi bulelèlè nudyùmvwa nè bìdi binùkèngela lwendu lwà sheemàsheemà nè Nzambi paanyimà pàà masangisha aa anyi? Nzambi ànùbènéshè! Mèmè ewu bu . . . mwanèènu wa balùme, munkaci mwà kwakula neenu, disambila dyànyì dyà meeji matòòke adi, bwènu nwênù, mbwà nwàpetakù lwendu lwà sheemàsheemà elu nè Nzambi.

³⁵⁷ Nènku byènzekeku nè, ku Ditùkù dyà Cilumbulwidi, pìikalà malòòlò àmvwà munkaci mwà kuyiisha aa, nekwikaleku bu—bu dyela dinènè dyà mikàbà yà mèyi mu Ditùkù adi, nè òyi dyànyì nedyùmvwike, nèbikèngele bwà mèmè kwimana kuntwaku bwà kulumbulula, bwalu mèyi àànyì anyi neàmbeénéshè peeshì neàmpiishe ku Ditùkù adi. Nènku aci ke cìvwa mèyi àànyì bwà bidimu makùmi àbìdì nè byà mu njila bishààle ebi, muciiakàle mwànà mukèsè wa balùme wa bidimu bitwè ku makùmi àbìdì, mwikàle nyiisha Èvànjeeliyò, kàdi's ndi mpindyewu nè bidimu makùmi ànaayi nè bitaanu, nènku kacya ncitukù mwanji kucishintulula nànsha kakesè to, bwalu ncyèna mwà kucishintulula to pàdìbi ànu nè Bible ùdi ùshààla mùshindù awu.

³⁵⁸ Nkàadi muCyàmbile bèèpiskòpò nè bikwàbò byònsò, kàdi kacya ncitukù mwanji kumòna muntu nànsha umwe udi mwà kwakula bibeèngàngàane naaCì to, bilondèshile Dìyi. Bàdi bàmba . . . Èè, mpindyewu, ndi . . . Nsaserdòsè ewu, mwaba ewu kukaadi ndambù wa matùkù, kwambayè nè: “Révérend Branham, twètù katùtu twangata Bible to; èkèleeziyà ngudi nè bwalu, bwètù twètù.” Pa nànkù kwèna mwà kuyiikila nè muntu awu to. Kàdi wèwè nè cyà kucishindamijila pa Bible, abi's mbishiilàngàne. Nwamònu anyi?

³⁵⁹ Ndi ndòmba bwà Nzambi wènzakù . . . Yònsò wa ku balundà bàànyì beena Kàtòlikè mwab'ewu, nè yònsò wa ku balundà bàànyì beena Mishòonyi, nènku nànsha . . . Kabàcyèna kàbìdì . . . Muntu nànsha umwe . . . Mèmè—mèmè ntu ànu munangè yònsò wa kunùdi. Nè Nzambi mmumanyè nè aci ncilelèlè anyi kì ncilelèlè to. Tàngilàayi mu mulongo wà babèèdi, pàdi mpofo—mpofo nè balèmà, Yèyè kàtukù wamba nè: “Kàtòlikè to.”

³⁶⁰ Muntu mulùme nyèyè ewu musòmbe kaaba aka mene pa cìbùmb- . . . apa mene, mwena Kàtòlikè, upùnga nè lufù lwà kànsèrè, kamudyè yònsò; kulwayè kwànyì kumbèlu, nè Nyumà

Mwîmpè kulwaYè pambidi pèndè, kumwondopa ku kànsèrè aku. Yèyè kacya kàakamwambilakù nè ùvwa mwena Kàtòlikè anyi to; kacya ncitukù mumwambilekù mwâkù nànsha wùmwe to. Wàkalwa, wàkabàtijiibwa mu Dìna dyà Yesù Kilistò nè kupeta Nyumà Mwîmpè. Ke muntu awu musòmbè mwaba awu mene, mwena kantu-ku-byanza mu Louisville. Èyowà. Nwamònu anyi?

³⁶¹ Kacitu cikonka ní udi mwena Kàtòlikè anyi kwèna mwena Kàtòlikè to. Cìdi nè mwoyi wèbè ní wùdi nè nzala yà Nzambi. “Bàà disànka ng’aba bàdi nè nzala nè nyòòtà yà bwakàne, bwalu bòbò nèbùujiibwè.” Ncyà bushùwà anyi? Amen. Mukalenge ànùbènèshè.


³⁶² Mbanganyi bàdi bamanyè musambu mwîmpè wà kale ewu wà nè: *Mwonji Wùdi Wùswikakaja Wùbèneshiibwè?* Mbantu bûngì kaayi mwab’ewu bàdi pamutù pàà bidimu makùmi ànaayi, elàayi byanza byènù muulu pàmwe naanyi, nwamba nè: “Ndi mvùluka musambu wà kale awu, wà kacya kùkaadi bidimu makùmi ànaayi nè: *Mwonji Wùdi Wùswikakaja Wùbèneshiibwè?*”

Mwonji wùdi wùswikakaja wùbèneshiibwè
Myoyi yètù mu dinanga dyà bwena Kilistò;
Bwobùmwe bwà meeji à buuwetù
Mbufwànàngàne nè bwà ku Dyulu.

³⁶³ Kanwènaayikù banangè misambu yà kale ayi anyi? Tèèlejàayi, ndi muswè kwamba nunku ewu, bu twètù nè misambu yà kale ayi yàbûngì pamutù pàà lukutukutu luvulè lutùdi naalù elu, ngèèla meeji nè èkèleeziyà ùvwa mwà kwikala mutàmbe bwîmpè. Mèmè ntu munangè misambu mîmpè yà kale ayi, yàkafundiibwà kùdi Nyumà Mwîmpè ayi.

³⁶⁴ Beena kale abu, mvwa nè ciibidilu cyà kuvùluka, muntu mukùlàkàji wa bafìke, ùvwa ne ciibidilu cyà kusòmba kunfundu kwà nzùbu, lwà mu mikùnà yà mu Kentucky mwàmwa. Pàvwàye mwà kucyòka, ùvwa mwà kusòmba pa citùpà cyà mucì cyà kale—cyà kale aci nè ùvwa mwà kutuuta byanza pa citùpà cyà mucì aci. Ndi mumuvùlùke ànu bîmpè, mwikàle nè kajèngù kakesè kàà nsukì mitòòke ku mutù. Ùvwa wimba musambu wà kale awu, musambu wà kale awu nè:

Nèmbiikè nye kùdi Yesù,
Yèyè neànguupùkilè mu mabòkò Èndè;
Mu mabòkò à Musùngidi wanyi munanga,
Kaa, kùdi binunu dikùmi byà masànkà.

³⁶⁵ Kî mmuyengà wà menemene to. Mbanganyi bàkaadiku bumvwè musambu wà kale awu? [Disangisha dìdi dyàmba nè: “Amen.”—Muf.] Ekèlekèle! Abi’s mbîmpè. Tèèlejàayi. . . 

54-0515 Nkonko Nè Mandamuna
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org